

Ipewaliste

Génesis
en
Nahuat del Este de Durango



Primera edición
Génesis
Nahuatl del Este de Durango
azd 18-003 2C
©2018 Wycliff e Bible Translators, Inc.

Versión electrónica ©Wycliffe Bible Translators, Inc. 2019
www.scriptureearth.org

Licencia Creative Commons (Reconocimiento-NoComercial-SinObraDerivada 4.0 Unported)

- Compartir — Usted es libre de copiar, distribuir y comunicar públicamente la obra.
- Reconocimiento — Debe reconocer los créditos de la obra.
- No comercial — No puede utilizar esta obra para fines comerciales.
- Sin obras derivadas — No se puede alterar, transformar o generar una obra derivada.

(<http://creativecommons.org/licenses/by-nc-nd/4.0/>)

Ipewaliste

Dyos okichi mochiten

- 1** ¹Kimani okinpewalti mochiten, Dyos,
okichi takpakIlwikak wan tal.
- ² Wan tal amo kipiyaya tachiwaliste wan amoten kipiyaya,
wan atim wehwekatim kitapachowaya se tatikomat,
wan in EspirituDyos moliniya ipa atim,
ipa wehwe'atim pa kishki we.
- ³ Wan Dyos kito: “Ma ye tawiliste!”
Wan ye tawiliste.
- ⁴ Wan Dyos okit kina kwal katka tawiliste
wan kiseseman ka tayowaliste.
- ⁵ Dyos okitokayolti tawiliste “tahka”,
wan tayowaliste, “tayo”.
Wan yok o'as se tyotak, wan yok o'as se watsinko:
ka se tonat.
- ⁶ Wan Dyos kito: “Ma ye se tatsakwaliste
ipanta atim, pa yok mosesemanaske atim ka atim!”
- ⁷ Okichi Dyos tatsakwaliste
wan kiseseman atim yewal katka itsinta,
tatsakwaliste ka atim wan katkaloya ipa tatsakwaliste
wan yok omotachi.
- ⁸ Wan Dyos kitokayolti tatsakwaliste “ilwikak”.
Wan yok o'as se tyotak, wan yok o'as se watsinko:
ka ome tonatim.
- ⁹ Wan Dyos kito: “In atim inik kat itsinta tatsakwaliste
ilwikak
ma monichikok,
ma moneshte tal wak!”
Yok omotachi. ¹⁰Wan Dyos yok okitokayolti wak “tal”,

wan inik atim monichikok okitokayolti “wehwe’atim”.

Wan yok kina kwal okit Dyos.

¹¹ Kwakin Dyos kito: “Ma ye mochiten pa tal;
ma motashosholti ka tashosholtik ma kipiyak nishinashte,
wan kwawim temakal taki,
yok kina sesen nesil!”

Wan yok omotachi. ¹² Okitakatilti tal tashosholtik:
ka shosholtik ka nishinashte,
inik kwawim ka nitakilme ka nishinashte,
kina takil sesen.

Wan Dyos kina kwal okit.

¹³ Wan yok o’as se tyotak, wan yok o’as se watsinko:
ka yey tonatim.

¹⁴ Wan Dyos kito: “Ma yek tawiliste ka tatsakwaliste pa
takpakIlwikak
yok mosesemanaske tahka ka tayo;
ma ye kina taneshtiliste pa kimatiske kimani tonalko wan
shopanta,

pa tonatim wan shiwim,

¹⁵ ma tipitakak pa tatsakwaliste ka takpakIlwikak
pa tawiske pa mochital!”

Kwakin yok omotachi.

¹⁶ Okichi Dyos ome tawiliste:
wehwe tawiliste tatake tahka,
wan amoyok we tawiliste tatake tayo.
Wan niyok okinchi sitalme.

¹⁷ Okintal Dyos pa takpakIlwikak
tawiliste pa tanesiskya pa mochital.


¹⁸ Okinchi pa tatakewaske pa tahka wan tayo,
yok kinseseman tawiliste ka tayowaliste.

Dyos okit kina kwal katka.

¹⁹ Wan yok o’as se tyotak, wan yok o’as se watsinko:
ka in nawi tonatim.

²⁰ Wan Dyos kito: “Ma mochiwak pa atim myak yolikilme,
wan totom patanilme ipa tal
pa tatsawaliste takpakIlwikak!”

²¹ Kwakin okinchi Dyos yolikilme wehwe pa atim,
wan moshte inik yolikilme



*Pa makwil tonat kinchi yolikilme
wehwe pa atim (Ipewaliste 1:20)*

yehwante molinilme pa atim
wan niyok okinchi yehwante kishki kinpiyal
ininnastakapalme,
kina sesen.

Wan yok kina kwal okit Dyos,

²² wan Dyos kinmashti kitowaya:

“Shimomiyaptik;
wan shikintemiltik atim ka wehwe'atim.
Ma momiyaptik totom pa mochital!”

²³ Wan yok o'as se tyotak, wan yok o'as se watsinko:
ka makwil tonatim.

²⁴ Wan Dyos kito: “Ma takatik pa mochital yolikilme kina
sesen nesil:

tekwanim mochantil pa kwawim, yolikilme kintikipanol
 takam,
 wan kowam, kina sesen nesil!”

Wan yok omotachi.

²⁵ Dyos okinchi tekwanim mochantilme pa kwawim,
 wan yolikilme kitikipanol takam,
 wan yolikilme mowilanlan pa tal,
 kina sesen nesil.

Wan yok kwal okit Dyos,

²⁶ wan Dyos kito: “Ma tikchiwak se masewal
 kina tehwante.

Ma kipyas chikawaliste ipa we'at pa michim,
 wan ipa totom patanilme takpakIlwikak;
 ipa yolikilme kitikipanol takam,
 wan tekwanim mochantilme pa kwawim,
 wan ipa yolikilme
 yehwante mowilanlan ipa tal.”

²⁷ Kwakin okichi se masewal kina nes;
 okichi kina Dyos.

Takat wan siwat okinchi,

²⁸ kinmashti Dyos wan kinmili:
 “Shikintakatiltik wan shimomiyaptik;
 shiktemiltik mochital wan shitatakewak;
 shikinmansotik michim pa we'at wan totom patanilme
 takpakIlwikak,
 wan mochiten yewal mowilanlan ipa tal.”

²⁹ Wan Dyos kinmili: “Annimishmak yewal onka ipa tal
 shosholtik temakal nishinashte
 mochi kwawim temakal takilme wan temakal shinashte;
 mochiten ina kwal ankikwaske.

³⁰ Wan mochi tekwanim pa mochital,
 wan mochi patanilme pa takpakIlwikak,
 wan mochi mowilanlanme pa tal,
 mochi kishki kipyal yoliliste,
 mochi shosholtik nikinmak pa kipyaske pa kikwaske.”
 Wan yok omotachi.

³¹ Kwah Dyos okit mochiten yewal okichi,
 wan kwal katka.

Wan yok o'as se tyotak, wan yok o'as se watsinko:
 ka chikwase tonatim.



© 1996 David C. Cook

Mochi tachiwaliste kwal oye (Ipewaliste 1:31)

- 2** ¹Otam okichi Dyos takpakIlwikak wan mochital,
wan mochiten onka pa mochital.
² Pa chikome tonatim, Dyos mosewiyyaya
kampa tamiyaya nitikipanoliste ten kichiptikatkaya.
³ Wan kimashti Dyos pa tonat chikome, okichi se tonat we,
pa yewal mosewi kwah otam okichi mochi nitikipanoliste.
⁴ Ina nitapowaliste ka ipewaliste
ka takpakIlwikak wan mochital kimani oyek tachiwalme.

In masewal kaha motashot itok Edén

Kimani Dyos in WeTatsDyos okichi mochital wan takpakIlwikak, ⁵wan mochi tashosholtik pa kwawim kimani ayamo kisaloya shosholtik, kampa Dyos in WeTatsDyos ayamo kiwaltitaniyaya kyawit pa mochital wan amo katka masewal kitikipanoskya tal. ⁶Ma yok, nalkistikatka pa tal

nitonalmikiliste at ki'ahwiliyaya mochital. ⁷Kwakin Dyos in WeTatsDyos okichi se masewal ka nipohtiTal, wan okipits pa niyakatsol ka ni'ihyo kimak yoliliste, wan ye se masewal yolke.

⁸Wan Dyos in WeTatsDyos okitok se kwahmil itok Edén kaha kis tonat, ompa okika masewal yewal okichi. ⁹Dyos in WeTatsDyos okichi pa kisaloskya kwawim kwal nesiloya inintaki pa kikwaloskya. Ipanta tashotanilme katkaloya ome kwawim, se tayolti, wan okse kimashti ten kwal wan ten amokwal.

¹⁰Kistikatka pa Edén se atenko we ki'ahwiliyaya in kwahmil, kipiyaya nawi nimashaltik atenko. ¹¹Se itoka Pishón, wan kiyawalowaya tal Hawilá, kampa katka oro. ¹²In oro kina kwal katka pa in tal, niyok onka ompa kwawitito ahwiyal kwal frangante wan niyok ompa onka tet itok onish. ¹³In okse atenko itok Gihón, in atenko kiyawalo in tal itoka Kush. ¹⁴In okse atenko itok Tigris, wan totok pa itenko pueblo Asirya kaha walkis tonat. Wan in okse atenko itoka Éprates.

¹⁵Dyos in WeTatsDyos okika in masewal pa kwahmil Edén pa kitikipanoskya wan kikwitawiskya, ¹⁶wan WeTatsDyos kili masewal: “Pa mochi inik kwawim takilme kwal tewal tikwas, ¹⁷ma yok kwawit kinmashti ten kwal wan ten amokwal amo tikwas, kimani yewal tonat tikwas melak timikis.”

¹⁸Kwakin Dyos in WeTatsDyos kito: “Amokwal isel yes masewal. Nikchiwilis se pa kipaleptiyas se nihni nesis kina yewal.” ¹⁹Wan Dyos in WeTatsDyos okinchi ka tal mochi



© 1996 David C. Cook

*Ome kwawim se tayolti wan se tamashti ten
kwal ten amokwal (Ipewaliste 2.17)*

inik tekwanim yolil ka takam wan yolil pa kwawim wan mochi totom pa takpakllwikak, wan okinwikil masewal pa kintokayoltiskya. Yewal takat kintokayolti, yok kina ashka itokal.²⁰ Yok kintokayolti mochi inik tekwanim yolil pa kwawim, wan totom pa takpakllwikak wan inik yolil ka takam. Ma yok, masewal amo okit ak kipalewiskya se nihni nesis kina yewal.

²¹ Kwakin Dyos in WeTatsDyos okikochilti masewal chikawak, kwah koshtikatka, kikishtil se ni'omit^a tanakastekal wan okitsakwa oksep inaka. ²² Ka ni'omit kostiya masewal, okichi WeTatsDyos se siwat okiwikil masewal, ²³ kito masewal:

“Ashka, ina no'omit ka no'omit
wan inaka nonaka.

Itoka siwat
kampa takishtiliste katka pa takat.”

²⁴ Kampa se takat kikawas nitats wan ninantsi, motakitskilti inak nisiwa, wan yeske se han inakayo.



© 1996 David C. Cook

Adan kintokayolti inik yolkilme (Ipewaliste 2:20)

^a 2:21 Ni'omit in kinek kito: nikostiya

²⁵Kampa takat wan nisiwa amo kipiyaloya shashalme, ma yok amo pinawaloya.

In takat wan siwat amo kineltokak Dyos

3 ¹In kowat kimatiya tekwamanaya, amoyok moshte kimatiloya oksek yolikilme, tekwanim mochantil pa kwawim wan in tekwanim kintikipanol takam, yewal kinchiwaya Dyos in WeTatsDyos. In kowat kili siwat:

Kampa melak anmichili Dyos pa amo ankikwaske nitaki inik kwawim pa kwahmil?

²In siwat kinankili in kowat:

—Kwal tikwaske inintaki kwawim pa kwahmil. ³Ma yok otichil Dyos: “Amo tikwaske wan amo tihkitskiske nitaki kawwit, yewal onka ipanta kwahmil, ma yok timikiske.”

⁴Kwakin kowat kili siwat:

—Amo anmikiske! ⁵Kampa Dyos kimat, ta ankikwak nitaki, kwakin melak anmehwante ankimatiske kampa anmo'ilnamikiske anmo'ishtaposke anmoshtololme anyeske kina Dyos, ankimatiske ten kwal wan ten amokwal.

⁶Kwakin siwat okit kwawit nitaki kina kwal nestikatka pa kikwaskya, wan niyok kinekiya kimatiskya tamatiliste, kwakin okonan se nitaki wan okikwa. Niyok okimak nitaka, yewal katka inak wan niyok yewal okikwa. ⁷Kwakin haniman mo'ilnamikik ten okichiwak, wan katkaloya nakatilme. Kwakin kitsomak sek ni'iswam igo' pa motakemiltiloskya.



© 1996 David C. Cook

Hawa kitilanil niyol kowat (Ipewaliste 3:6)



© 1996 David C. Cook

*Hawa wan Adan motapacholoya ka iswam
kampa katkaloya nakatilme (Ipewaliste 3.7)*

⁸Kikakiloya Dyos in WeTatsDyos pek nehnemiya pa kwahmil kwah katka taistikit pa tyotakit, kwakin kitilik tsalakwawim pa kwahmil. ⁹Ma yok okinots Dyos in WeTatsDyos takat wan kili:

—Kaha ti'onka?

¹⁰Wan yewal kinankili:

—Onimishkak pa kwahmil, wan nimomapti kampa nikatka nakatil wan onimotat.

¹¹Kwakin Dyos kitahtanili:

—Ak yok michili kampa tikatka nakatil?

—Otikwa nitaki kwawit yewal nimichili amo tikwaskya?

¹²Wan yewal takat kinankili:

—In siwat yewal otishmak pa yes nonihni onishmak tahko taki, wan newal onikwa.

¹³Kwakin Dyos in WeTatsDyos kili siwat:

—Ten otikchi?

Wan kito siwat:

—In kowat onishkwaman kwakin onikwa taki.

¹⁴ Kwakin kili Dyos in WeTatsDyos in kowat:

“Kampa yok otikchi in,

 nimichilis kampa amokwal mishyaptiyas ika mochi
 tekwanim,

 yolil ka takam, wan mochi tekwanim yolil pa kwawim!

Pa kimani tiyoltyias timowilanas,

 wan tikwas mochi inik tonatim nipohtiTal.

¹⁵ Wan nikchiwas kampa tewal wan siwat,

 mokokolityiaske niyok mokolinchim wan nikolinchim in siwat,
 nikolinchim siwat kishakwalo motsontek,
 wan tewal tikwas nikshi.”

¹⁶ Kili siwat:

“Nihmiyapti motakokoliste kwah ti'ostitiya,

 nimishtakokoltis ka takokoliste tiktakatiltis mokon.

Ma yok tihnekis motaka yes ka tewal.

 Yewal kipyas chikawaliste ipa tewal.”

¹⁷ Wan takat^b kili:

“Kina otikchi kina michili mosiwa,

 wan otikwa nitaki yewal nimichili amo tikwaskya!

 Nimichilis kampa amokwal kiyaptiyas in tal!

Ka takokoliste titakwas

 pa hanse tonatim tiyoltyias.

¹⁸ Wistim wan tsetsekalot mochiwaske,

 wan tikwas shosholtik tashotanilme.

¹⁹ Ka motonalmikil titikipanos miyak pa yok titakwas mochi

 inik tonatim tiyoltyias,

 yok tiyes pa mochi inik tonatim kimani timikis wan

 timokwepas pa tal

 onimishchi ka nipohtiTal.

Kampa timochiwas nipohtiTal

 wan timochiwas pohtital kwah timikis.”

²⁰ Adán okitokayolti nisiwa Hawa, kampa yewal ininnantsi
moshte kishki yoltikat.

²¹ Kwakin Dyos in WeTatsDyos okinchiwil takat^c wan nisiwa sha-
shalme ka nikwero tekwanim wan yok okintakemilti. ²² Wan kito

^b 3:17 Takat in kinek kito: Adán.

^c 3:21 Takat in kinek kito: Masewal.



© 1996 David C. Cook

*Sek yolil itokal kerubine', wan se teposte tatatitikatka,
kikwitaptikatkaloya ot pa amo'ak kalakiskya
kaha katka kwawit tayolti (Ipewaliste 3:24)*

Dyos in WeTatsDyos: "Ashka takat omochi kina tehwante, kimat ten kwal wan ten amokwal. Ta kitekiskyा nitaki kwawit tayolti, wan pa kikwaloskyा wan yok yoliske hanse."²³ Kampa okikishti Dyos in WeTatsDyos pa kwahmil Edén, pa kitikipanoskyा tal kampa okichi ka nipohtiTal.²⁴ Kimani okikishti takat pa kiyawak, okital pa itemko kwahmil Edén kaha kis tonat sek yolil itokal kerubine', wan se teposte tatatitikatka wan kati momalintikatkaloya kina tapitaniliste, kikwitaptikatkaloya ot pa amo'ak kalakiskya pa kwahmil kaha katka kwawit tayolti.

Kayin wan Habel

4 ¹Adan nisiwa Hawa omotek inak, wan ostiyaya ta'apa oki-takatilti Kayin. Kwakin kito: "In WeTatsDyos onishpale

pa niktakatilti se takatonte!"² Panok tonatim wan okitakatilti Habel, ninohni Kayin. Habel katka se takwitawil borrego', chibo' wan Kayin tatokaya.³ Panok tonatim, wan Kayin okiwikil WeTatsDyos nitapishkaliste kina tatamakal.⁴ Habel niyok okiwikil borrego' tohtomawak, yehwante kintakatiltik ta'ishpa yewal kinpiyaya pa niyolikilme. Dyos in WeTatsDyos kwal okit tatamakal yewal okiwikil Habel,⁵ amoyok kwal okit ten okiwikil Kayin. Kwakin hyero kwalantikatka amokwal nestikatka nishayak.



© 1996 David C. Cook

Kayin wan Habel tikipanoloya (Ipewaliste 4:5)

⁶ Kwakin kili Dyos in WeTatsDyos Kayin: "Pates hyero tikwalantik? Pates yok titachishtik? ⁷Ta otikchi kwal, wan newal nikonanas kwal. Ma yok ta amokwal otikchi, katsawa liste yes kina se tekwan yolil pa kwawim, pa michkwas. Amo shimatotemak, tewal shikmansot."

⁸ Kayin kili ninohni Habel. Ma tiyak pa kwahmilShosholtik, wan katkaloya pa kwahmilShosholtik ompa Kayin okimikti ninohni Habel.

⁹ Kwakin Dyos in WeTatsDyos kili Kayin:

—Kaha onka monohni Habel?

Wan Kayin kinankili:

—Amo nihmat. Monek pa nihkwitaptiyas newal nonohni?

¹⁰ Kwakin kili Dyos in WeTatsDyos:



© 1996 David C. Cook

Kayin kimikti Habel (Ipewaliste 4:8)

—Ten otikchi! NiyEste monohni tahtantik takokoliste pa tal.

¹¹Ashka kampa amokwal mishyaptyias tewal pa in tal, kampa totokatik niyEste monohni tewal tihmiki. ¹²Kwah tiktikipanos tal, amo mishmakiyas tapishkaliste, tinehnemtiyas wan amo tikpiyas mosewiliste pa tal.

¹³Kayin kinankili Dyos in WeTatsDyos:

—We yes notakokoliste amo nikelhwaltis. ¹⁴Ashka tirishtitantik pa nimochantis kina se amo kipyas icha, nimotatitinemis pa amo tichitas tewal, wan aki nichitas yok nishmiktis.

¹⁵Kwakin Dyos in WeTatsDyos, kili:

—Aki kimikti Kayin, kwakin panos takokoliste ka chikome takwepaliste.

Kwakin in Dyos WeTatsDyos okital se taneshtililiste pa Kayin, pa yok amo'ak kimiktiska aki kitaskya. ¹⁶Wan yok omowik Kayin, okis i'ishpa Dyos in WeTatsDyos wan omo-chanti pa tal itok Nod, Nod moka kaha waltakis tonat pa Edén.

¹⁷Kayin kipi nisiwa wan omotek inak, o'osti ta'apa wan okitakatilti se takatonte okitokayolti Henok. Okichi Kayin se Wepweblo pa inik tonatim, wan okitokayolti Wepweblo kina itoka nikon Henok. ¹⁸Henok okipi se nikon okitokayolti Irad, wan Irad omochi nitats MehuyaEl, wan MehuyaEl ye nitats MetushaEl wan MetushaEl ye nitats Lamek. ¹⁹Wan Lamek omonamikti ka ome siwam. Se itoka Ada wan okse Tsilá. ²⁰Ada okitakatilti Yabal, wan Yabal yek niwichalme yehwante takwitawilme yolikilme wan mochantiloya pa kalme tachiwalme ka shashalme. ²¹Wan itoka ninohni Yubal, okinpewalti inik yehwante kimatil tatsotsonal gitarra wan flawta. ²²Niyok kipiyaya Tsilá se nikon yewal itoka Tubal-kayín, yewal kichiwaya mochi inik tachiwalme ka bronse wan yerro. Wan kipi se ninohniSiwat itoka Namá.

²³Se tonat Lamek kinmili ininsiwam Ada wan Tsilá:

“Shinishkakik ten annimichilis!
Shihkakik notahtolme!
Onihmikti se takat yewal nishkokolti,
wan se takatYankwik yewal onishmahmak.

²⁴Aki kimikti Kayin yewal yes se takwepaliske ka chikome,
wan Lamek kikwepiliske ka 77 aki kimikti.”

²⁵Adán omotek oksep inak nisiwa, okitakatilti se nikonTakat okitokayolti Shet, kampa kito: “Kampa WeTatsDyos onishmak okse nokon kampa amo onka Habel yewal Kayin okimikti.” ²⁶Shet niyok okipi se nikon wan okitokayolti Enósh. Kwah okipewaltik takam ni'itokaliste Dyos in WeTatsDyos.

Nikolinchim Adán

5 ¹Nika nitakwihkwiloli nitapowaliste Adán^d wan nikolinchim.

Dyos okichi masewal kina yewal. ²Okinchi takat wan siwat, wan okinmashti. Pa tonat kwah okinchi kintokayolti “masewalme.”

³Kwah yoliyaya Adán pa 130 shiwim, okipi se nikon yewal ones kina yewal, okitokayolti Shet. ⁴Kwah takati Shet, Adán yolti 800

^d 5:1 Adán in kinek kito: Moshte kishki masewalme kipewaltitiwalal towichalme wan astik pa tokolinchim.

shiwim, wan okinpi oksek ininpilwaTakam wan ininpilwaSiwam.

⁵Mochi inik shiwim yolti Adán 930 kwakin omik.

⁶Yolti Shet 105 shiwim okipi se nikon okitokayolti Enósh.

⁷Kwah otakat Enósh, Shet yolti 807 shiwim, wan okinpi oksek ininpilwaTakam wan ininpilwaSiwam. ⁸Mochi inik shiwim kipiyaya Shet 912 shiwim wan omik.

⁹Yolti Enósh 90 shiwim, okipi nikon okitokayolti Kaynán.

¹⁰Kimani otakat Kaynán, Enósh yolti 815 shiwim, wan okinpi oksek ininpilwaTakam wan ininpilwaSiwam. ¹¹Yolti 905 shiwim Enósh wan omik.

¹²Yolti Kaynán 70 shiwim wan okipi nikon MahalalEl.

¹³Kimani otakat MahalalEl, yolti Kaynán 840 shiwim, wan okinpi oksek ininpilwaTakam wan ininpilwaSiwam. ¹⁴Mochi in shiwim yewal yolti Kaynán 910 shiwim wan omik.

¹⁵Yolti MahalalEl 65 shiwim kimani okipi nikon Yéred.

¹⁶Kimani otakat Yéred, yolti MahalalEl 830 shiwim, wan okinpi oksek ininpilwaTakam wan ininpilwaSiwam. ¹⁷Mochi shiwim yoliyaya MahalalEl kipiyaya 895 shiwim wan omik.

¹⁸Yolti Yéred 162 shiwim kimani okipi nikon Henok.

¹⁹Kimani otakat Henok, yolti Yéred 800 shiwim, wan okinpi oksek ininpilwaTakam wan ininpilwaSiwam. ²⁰Mochi inik shiwim yolti Yéred 962 shiwim wan omik.

²¹Yolti Henok 65 shiwim kwakin okipi nikon Metushala.

²²Nehnemiyaya Henok niyol inak Dyos, kimani otakat Metushala, yolti 300 shiwim wan okinpi oksek ininpilwaTakam wan ininpilwaSiwam. ²³Mochi inik shiwim yolti Henok 365 shiwim, ²⁴wan nehnemiyaya inak Dyos, kwakin se tonat opoli kampa Dyos okiwik.

²⁵Yolti Metushala 187 shiwim otakat nikon Lamek. ²⁶Kimani otakat Lamek, yolti Metushala 782 shiwim, wan okinpi oksek ininpilwaTakam wan ininpilwaSiwam. ²⁷Mochi inik shiwim yewal yolti Metushala 969 shiwim wan omik.

²⁸Lamek yolti 182 shiwim wan okipi se nikon, ²⁹okitokayolti No'á, kampa kito: "Ina tishyolsewis ka totikipanoliste yewal titikipanotikat ka tomahwam, yewal Dyos in WeTatsDyos kili kampa amokwal kiyaptiyas in tal." ³⁰Kimani otakat No'á, yolti Lamek 595 shiwim, wan okinpi oksek ininpilwaTakam wan ininpilwaSiwam.

³¹Mochi inik shiwim yolti Lamek 777 shiwim wan omik.

³²No'á kipiyaya 500 shiwim kwah okinpi ininpilwam Shem, Kam wan Yapet.

Ininta'ihtakoliste takam

6 ¹Kwah momiyaptik masewalme pa tal wan kintakatiltlik ininpilwaSiwam, ²kwah nипilwaDyos kinmitak kina kwal nesiloya ininpilwaSiwam kintakatiltlik masewalme. Kwakin konanak kishki kinekik pa moshte yeloskya ininsiwam. ³Kwakin Dyos in WeTatsDyos kito: “Amo nikinyoli takam^e ka no’ihyo pa hanse, kampa han kat nakat; amo panoske 120 shiwim.”

⁴Katkaloya takamWehweyak pa in tal pa inik tonatim (wan takwitap), kimani nипilwaDyos omotekak ka ininpilwaSiwam masewalme wan kinpiyak ininpilwam inak yehwante. Yek monotsaliste ka momiktiliste chikawak pa inik tonatim ya wehkA.

⁵Dyos in WeTatsDyos kinmitaya kina momatiloya inik takam pa tal, kampa hanse tamatitiyaske ten kichiwaske pa ininyol ten amokwal, ⁶wan moyokolti Dyos in WeTatsDyos kampa okinchi takam pa tal, wan okikok niyol. ⁷Wan kito Dyos in WeTatsDyos: “Niyas nikshitinis mochital inik takam yewal onikinchi, inik tekwanim inik mowilanl pa tal wan inik totom pa takpakIlwikak. Nimoyolkokotik kampa onikinchi!” ⁸Ma yok, Dyos in WeTatsDyos kitaya kwal No’á kampa kwal kichiwaya.

No’á kichiwaya arka

⁹Ina nitapowaliste ka No’á.

Hanse kikaktiyas kwal i'ishpa Dyos. Yewal takat han kwal wan kimawishtiliyaya i'ishpa Dyos wan yewal han nehnemiyaya inak Dyos. ¹⁰Okinpi No’á yey ininpilwaTakam: Shem, Kam wan Yapet. ¹¹Dyos kitaya kina yoliloya pa tal mo'ihtakotikatkaloya wan miyak mokokoltitikatkaloya. ¹²Okit Dyos kina mo'ihtakotikatkaloya kampa moshte amo kimatiloya yoliloya kina okital Dyos pa yoltiyaloskya, ¹³kili Dyos No’á: “Niyas nikshitinis moshte masewalme, kampa mokokoltitikat sek ka oksek pa tal. Melak niyas nikshitinis inak tal. ¹⁴Shimochiwil se arka kampa yes se kal yewal mo'ahkoki pa at, shikchi ka kawwim chihchikawak. Shikinchiwil kahkalito pa anmochantsiske pa itik arka pa kalitik wan pa kiyawak shikshawil yewal kina tsakti chapopote, pa amo kahkalakis at wan yok mo'ahkokis. ¹⁵Wan


^e 6:3 Takam in kinek kito: Moshte kishki masewalme kipiyal tapowalme in shiwim pa yoliske.

yok tikchiwas: 135 metros iweyak, wan 22.5 metros ipatawak wan 13.5 metros itakpak.¹⁶ Shikchiwil se nita'ishtapol kal pa nitakalchiwal shikpanolti tepante pa itahko metro itakpak, shikchi se tatapoli sela pa kal wan shikchi okse kal pa nipanta wan okse ikpak pa yey.¹⁷ Newal nihwaltitanis se tapakyawaliste ipa in tal, wan niyok nikshitinis mochiten kipiyal yoliliste itsinta ilwikak. Wan mochiten onka pa tal mikiske.¹⁸ Ma yok ka tewal niktalis se tahtoliste, tewal tikalakis pa arka wan mopilwam, mosiwa wan mosiwamonwam ankalakiske.¹⁹ Wan mochiten yolil, moshte kishki kipiyal nakat, ka ohome kina sesen nesil, tikinkalaktis pa yok yoliske siwat wan takat yeske.²⁰ In totom kina kat sesen, wan tekwanim yolil ka takam kina sesen nesil, wan kishki mowilanlan pa tal kina sesen nesil, ka ohome kala-kiske ka tewal pa yok yoliske.²¹ Wan shikonan shiknichik mochiten kikwal shikahkok, pa yok ankipiyaske ten ankikwaske anmehwante wan inik yolkilme.”²² Kwakin okichi No'á mochiten kina kili Dyos.

7 ¹Kwakin kili Dyos in WeTatsDyos No'á: “Shikalakik pa arka tewal wan moshte kishki mochantil pa mokal, kampa nimi-chit amo tikchiptik takokoliste amoyok nikinmit moshte in oksek yolil ashka. ²Shikinwik ka tewal chikome tekwanim ka ohome kina sesen nesil; takat wan siwat, yehwante kinmit Dyos kina tekwanim amo chihchipawak, se siwat wan se takat. ³Niyok totom pa takpakIlwikak chikome ka ohome se siwat se takat, pa yoliske sesen kina nesil pa ipa tal. ⁴Kimani panoske chikome tonatim, nik-chiwas tapakyawaliste pa mochital 40 tonatim wan 40 tayowalme, wan nikshitinis mochital wan mochiten yolkilme onikinchi.”

⁵ Yok okichi No'á kina kili Dyos in WeTatsDyos. ⁶No'á kipiyaya 600 shiwim kwah wets tapakyawaliste ipa mochital. ⁷Kalakik pa arka No'á wan nisiwa, ininpilwam wan nisiwamonwam, pa yok motsakwililosky ka in tapakyawaliste. ⁸Wan katkaloya tekwanim chihchipawak wan tekwanim amo chihchipawak, wan ka inik patanilme wan mochiten mowilanlan ipa tal, ⁹ka ohome kalakik ka No'á pa arka, se takat se siwat, kina Dyos kili No'á. ¹⁰Kimani panok chikome tonatim, wets tapakyawaliste pa mochital.

¹¹ Kimani No'á kipiyaya 600 shiwim, katka tonat 17 pa ome meste, yek ta'ishtapolilme in atim ka tatsakwaliste takpakIlwikak. ¹²Wan ye tapakyawaliste ipa mochital 40 tonatim 40 tayowalme. ¹³Pa in tonat kalakik pa arka No'á,



© 1996 David C. Cook

*Kalaki pa arka No'á ka moshte tekwanim
kina sesen nesil (Ipewaliste 7:4)*

ka ininpilwam Shem, Kam wan Yapet, wan nisiwa wan niyok ininsiwamonwam.¹⁴ Yehwante wan moshte tekwanim mochan-til pa kwawim moshte tekwanim kintikipanolil takam, wan mochiten mowilanlal ipa tal, wan mochi inik totom yok kina sesen nesil.¹⁵ Walak ka No'á pa arka ka ohome mochi kishki kipiyaloya nakat ka ininihyo kipiyaloya yoliliste;¹⁶ kalakiloya se takat wan se siwat kina sesen nesil, kina Dyos kili No'á. Kwakin Dyos in WeTatsDyos kitsakwa tatapoli.

¹⁷Pa 40 tonatim tapakyapti ipa tal. Inik atim tehkoti, wan ki'ahkokti arka ipa tal.¹⁸ Tehkoti inik atim wan mo'apakti ipa mochital, wan mo'ahkok arka ipa wehwe atim.¹⁹ Inik atim tehko ipa mochital, wan mochi inik talTepet wehwe itsinta

ilwikak kintapach. ²⁰Kwah kintapacho atim inik talTepet tehkok chikome metros wEhkak. ²¹Wan mikik mochiten yoliloya ipa mochital: totom, tekwanim yolil ka takam wan tekwanim yolil pa kwawim, wan mochiten mowilanloya ipa tal, wan moshte takam. ²²Mochiten mihyotiloya kipiyaloya yoliliste ka ininyakatsol wan mochiten katkaloya pa mochital mikik. ²³Yok ye tashitiniliste mochiten yolikilme pa mochital, ka takam ka tekwanim, inik mowilanalme wan inik totom pa takpakIlwikak. Moshte oye tashitiniliste pa mochital. Han omoka No'á wan inik katkaloya inak yewal pa arka. ²⁴Yok tapachoti tal ka atim pa 150 tonatim.




© 1996 David C. Cook

In arka wan in tapakyawaliste (Ipewaliste 7:24)

8 ¹Wan ki'ilnamik Dyos No'á wan mochi tekwanim yolil pa kwawim wan tekwanim yolil ka takam katkaloya inak yewal pa arka. Okichi Dyos pa yehyekaskya ipa tal, wan yok atim waktiyak. ²Motsakwak atim wehwehkat niyok atim pa takpakIlwikak, yahmo kyaptikatkaya. ³Kwakin waktiyaya yolikit atim pa tal. Pa 150 tonatim temowaya at. ⁴Pa tonat 17 pa meste chikome omokets arka pa in talTepet itoka Ararat, ⁵inik atim waktiyak kwah o'as pa matahti meste onesik inik talTepet.

⁶Kwah opanok 40 tonatim ki'ishtap No'á tatapoli yewal okichi pa arka ⁷wan kimaka se kakalot yawiya walaya, pa



© 1996 David C. Cook

*Dyos ki'ilnamik No'á wan moshte yolikilme
kwakin okichi Dyos pa yehyekaskya ipa tal,
wan yok atim waktiyak (Ipewaliste 8:2)*

kimani inik atim wakik ipa tal.⁸ Niyok kimaka No'á se wilot, pa kitaskya atim ta waktiyaya ipa tal.⁹ Ma yok wilot walmo-kwep pa arka kampa amo okit kaha motaliskya, kampa atim kitapachotikatka tal. No'á kikishti nimahwa, okonan wilot wan okikalakti pa arka.¹⁰ Omochi chikome tonatim wan oksep okimaka wilot pa kiyawak.¹¹ Walmokwep wilot tamalinti tonat, kiwalikaya se iswatonte pa nipiko ka kwawit itoka olibo, kwa-kin kimat No'á kampa atim waktiyaya ipa tal.¹² Omochi oksep chikome tonatim wan okimaka oksep wilot, yahmo walmo-kwep ka yewal.

¹³ Pa inik shiwim 601 kipiyaya No'á pa meste se in ta'ishpa tonat ka meste inik atim wakik ipa tal. Wan kikishtili No'á tatsawkili ka kal wan okit kampa tal wak katka.¹⁴ Wan pa tonat 27 pa ome meste, wak katka mochital.¹⁵ Kwakin Dyos kili No'á:¹⁶ "Shikis pa arka tewal wan mosiwa, mopilwam wan mosiwamonwam.¹⁷ Shikinkishti moshte inik tekwanim kat ka tewal mochi kishki kipiyal yoliliste: totom, tekwanim yolil ka takam wan tekwanim mowilanlal ipa tal. Tikinkishtis ka tewal wan yaske pa mochital yok shimomiyaptik ipa tal! Shikinpiyak myak anmopilwam!"¹⁸

¹⁸ Kwakin okis No'á ka ininpilwam, wan nisiwa wan nisiwamonwam.¹⁹ Moshte inik tekwanim wan mochi inik



© 1996 David C. Cook

No'á wan mochi yolkilme kisal pa arka (Ipewaliste 8:19)

mowilanlan ipa tal wan mochi totom, wan mochi yewal molinil ipa tal, yok kina nesil sesen kisak pa arka.

²⁰Kwakin No'á okikets se tanichikol ka tetelme pa Dyos in WeTatsDyos, wan kinonan sek tekwanim wan totom yewal Dyos okinmit chihchipawak kinchichinok kina tatamakal.
²¹Kwah kinehnekwi Dyos in WeTatsDyos ahwiyaliste kina kwal ahwiyaya, kwakin mo'ili: "Amo'ik nihkwepas ten amo-kwal kiyaptiyas tal ka inintachiwaliste takam kampa ininyol amo kwahkwalme pa kimani takatil pa kimani mikil, amo'ik nihwalkwepas pa kinshitinis mochi kishki kipiyal yoliliste kina ashka onikchi.

²² "Pa kishki tonatim yes tal,
hanse tonatim yes tatokaliste wan tapishtkaliste,
in tonatim wan mestim ka sewaliste wan tonaliste,
tonalko wan sewalko,
wan niyok yeske tahka wan tayoway."

Dyos okichi tahtoliste ka No'á

9 ¹Dyos kimashti No'á wan ininpilwam wan kinmili:
"Shikinmiyapti anmopilwam, wan shiktemiltik pa mochital. ²Wan mochi tekwanim wan totom pa ilwikak wan mochi inik mowilanlan ipa tal wan mochi michim pa we'at momaptiske

ininishpa takam. Annimishmak pa ankichiwaske ten ka yehwante.³ Mochiten yewal yolil wan molinil, annimishmak pa ankikwaske. Niyok annimishmak tatokaliste. Annimishmak mochiten.⁴ Ma yok, amo ankikwaske nakat kipiwas yEste, amo shikwak kampa yEste kipi yoliliste.⁵ Newal niktahitanis tah-tolme aki tamiktis, ta se tekwan okimiki se takat, in tekwan kipi pa mikis wan ta se takat tamikti niyok kipi pa mikis.

⁶ "Ta ak tamikti,
niyok kimiktiske,
kampa in masewal ye tachiwal
kina Dyos tachiwal.

⁷ "Wan anmehwante annimichilis, shimomiyaptik
shikinpiyak anmopilwam pa anyeske myak pa tal."

⁸ Dyos kili No'á wan ininpilwam, wan kinmili; ⁹ "Newal nik-tali notahtoliste ka anmehwante, ka anmokolinchim yehwante antakatiske,¹⁰ wan ka mochi tekwanim yehwante kat ka anmehwante, mochi kishki kisak pa kal: totom, wan tekwanim yolil ka takam wan tekwanim yolil pa kwawim ka mochi yewal yolil pa mochital.¹¹ Niktalis notahtoliste ka anmehwante: amo'ik nikinshitinis inik kinpiyal mochi yoliliste ka se tapakyawaliste; amo'ik oksep yes tapakyawaliste pa yok amo kishitinis tal."

¹² Wan Dyos kito: "Ina nitaneshtiliste ka tahtoliste yewal newal niktali ka newal wan ka anmehwante wan mochiten yolil ka tehwante:¹³ Ashka oniktal nokosamalot arko pa ayawim, ina yes taneshtiliste ka tahtoliste ka newal wan ka tal.¹⁴ Kwah nihwalika ayawim pa takpakIlwikak ipa mochital, wan moneshti nokosamalot arko pa ayawim,¹⁵ wan nikilnamikis notahtoliste yewal onikchi ka anmehwante wan mochi yolkilme mochi kishki kipiyal nakatilme. Wan amo yes tapakyawaliste ka atim pa shitiniske mochi nakatilme.¹⁶ Kwah nokosamalot arko yes pa ayawim, newal nikitas wan nikilnamikis notahtoliste inak Dyos wan mochi yolkilme ipa mochital."

¹⁷ Kili Dyos No'á: "Ina nitaneshtiliste ka tahtoliste oniktal pa mochi inik yolinilme onka ipa mochital."

Ininpilwam No'á

¹⁸ Ininpilwam No'á okisak pa arka yek Shem, Kam wan Yapet. Kam, oye nitats Kanán.¹⁹ Inik yek ininpilwam No'á ka yehwante takatik in nikolinchim yehwante mosesemanak pa in tal.



© 1996 David C. Cook

Nokosamalot arko yes pa ayawim kina taneshtiliste ka se tahtoliste melawak pa in ilwikak (Ipewaliste 9:17)

²⁰No'á kitikipanoli tal, wan okitok se kwahmilUba.

²¹Wan okon nihugoUbaBino otawan, wan nakatil katka pa nikal tachiwal ka shashal tilawak. ²²Kam, nitats Kanán, okit nitats kina katka nakatil wan oy okinmil in omente ninohniwan, katkaloya pa kiyawak. ²³Kwakin Shem wan Yapet okonanak se shashal, kitalilik pa niyahkwal, wan nehnemiloya ka inkwitap, kitakemiltik nitats kaha nakatil. Yok tachiyaloya oksela, pa amo kitaloskya nitats pelado nakatil.

²⁴Kwah o'is No'á ka nitawanaliste wan kimat ten okichiwil nikon tipichi, ²⁵kito:

“Ma ye amokwal Kanán!

Yes tikipanol ka tikipanoliste
ka ninohniwan.”

²⁶Niyok kito:

“Ma kimashti in WeTatsDyos, niDyos Shem!

Wan Kanán yes nitikipanol!”

²⁷Ma kichiwil we Dyos nital Yapet!

Ma mochanti Yapet pa nikalme Shem yewal kat tachiwal
ka shashal tilawak,
wan ma ye Kanán nitikipanol!"

²⁸Kwah wets tapakyawalisté No'á yolti 350 shiwim, ²⁹wan
mochi in shiwim yolti No'á 950 shiwim, kwakin omik.

Nikolinchim ka ininpilwam No'á.

(Ip.^f 10:2-31) (1Ta-m.^g 1:5-27)

(Ip. 10:21-31) (Ip. 11:10-27)

10 ¹Inik nikolinchim Shem, Kam wan Yapet, ininpilwam
No'á, yehwante niyok okinpiyak ininpilwam kwah
otam in tapakyawalisté.

²Ininpilwam Yapet yek Gómer, Magog, Maday, Yawán,
Tubal, Meshek wan Tirás.

³Ininpilwam Gómer yek Ashkenas, Ripat wan Togarmá.

⁴Ininpilwam Yawán yek Elishá, Tarshish, Kitem wan
Rodanín.

⁵Ka inik takam mochantik pa itehtenko wehwe'atim, kina
sesen tanichikolme ka tahtolme pa sesen talme ka intiahwan.

⁶Ininpilwam Kam yek Kush, Misrayim, Put wan Kanán.

⁷Ininpilwam Kush yek Shebá, Hawilá, Sabtá, Rahma wan
Sabteká.

Inik yek ininpilwam Rahmá: Shebá wan Dedán.

⁸Wan Kush okitakatilti Nimrod, aki omochi takat ka chikawalisté ka momiktiliste pa tal, ⁹Dyos in WeTatsDyos okichi se takat ka chikawalisté pa ta'asiska yewal kintemowaya yoli-kilme, kwakin kililoya takam: "Kina Nimrod in takat chikawak yewal kintemowaya yolikilme kinmikiyya, yok kinek i'ishpa Dyos in WeTatsDyos." ¹⁰Yewal kipewalti ka nireynaroliste pa Babel, Érek, Akad wan Kalné, pa tal itoka Shinar. ¹¹Pa in tal okis pa Asirya wan okichi Wepweblo' Níniwe, Rehobot, Kala.

¹²Wan Resen, katka pa Níniwe wan Kala katka nipwebloWe.

¹³Misrayim okitakatilti in ludeteko' wan in anameyo' wan in lehabiteko' wan in napetuteko', ¹⁴wan in patrusteko' wan in kasluhítá' wan in kaptorteko' kaha kisak peleshteko'.

¹⁵Wan Kanán okitakatilti Tsidón, oye nikon ta'ishpa wan Het,
¹⁶wan in yebuseyo' wan in amoreteko' wan in girkasheteko'

^f 10:0 Ip. in kinek kito: Ipewaliste/Genesis.

^g 10:0 1Ta-m. in kinek kito: 1 Tapowaliste melawak/1 Cronicas.

¹⁷wan in heweteko' wan in arakiteko' wan in sinteko' ¹⁸wan in arwadeyo' wan in semareyo' wan in hamateko'.

Panok tonatim mosesemanak ka intahwan inik kananeyo'.

¹⁹Wan in kananeyo' inintal mosesemanak wan asik pa Tsidón han, pa Gerar wan Gasa, wan niyok pa Sodoma, Gomora, Admá, Tseboyím wan niyok pa Lesa.

²⁰Inik oyek ininpilwam Kam, ka intahwan ka nitahtolme, pa inintalme ka ininpweblo.

²¹Niwichalme Shem, Shem katkaloya nitats pa moshte ininpilwam Heber, wan ninohni ta'ishpa Yapet.

²²Ininpilwam Shem yek Elam, Ashur, Arpashad, Lud wan Aram.

²³Wan ininpilwam Aram yek Uts, Hul, Géter wan Mash.

²⁴Arpashad okitakatilti Shelá.

Wan Shelá okitakatilti Heber.

²⁵Wan Heber okinpi ome ininpilwam: ta'ishpa se itoka Péleg, kampa pa inik tonatim inik takam motemakak tathako tal; ninohni tipichi itoka Yuktán.

²⁶Wan Yuktán okitakatilti Almodad, Shélep, Hasaramawet wan Yéra, ²⁷Hadoram, Usal, Diklá, ²⁸Obal, AbiMa'el, Shebá, ²⁹Ofir, Hawilá wan Yobab. Moshte yek ininpilwam Yuktán, ³⁰wan pa tal kaha mochantiloya katka pa Masha pa ni'ot Separ, katka pa talTepet kaha kis tonat.


³¹Inik yek ininpilwam Shem, ka intahwan wan ka intaholme, pa inintalme wan ininpweblo'.

³²Inik oyek intahwan ka ininpilwam No'á, kina takatiloya nikolinchinim wan ininpweblo'. Ka inik mosesemanak pa ininpweblo' pa yaloskya mochantiloskya pa mochital kwah otam tapakyawaliste.

Kichiwak kal weyak pa Babel

11 ¹Moshte takam pa mochital tahtiloya ka se tahtol.

²Kwakin opanotiyak kaha kis tonat, wan okitak se tal ishtawak pa Shinar, ompa omokawak mochantitiyak. ³Pa se tonat mo'ilik sek ka oksek: "Toyak tikchiwak ladriyo, wan tikinyokshitiske pa teshoste." Yok kwakin kiteshmonekik tal tachichinol ladriyo amo kiteshmonekik tetelme, wan niyok kiteshmonekik chapopote-tsakte amo kiteshmonekik tal



Kal weyak pa Babel (Ipewaliste 11:4)

tashakwalil. ⁴Kwakin mo'ilik sek ka oksek: “Ma tikchiwak se Wepweblo ka se kal takpak asis pa ilwikak. Yok timochiwaské ka monotsaliste yok amo timosesemanaske pa mochital.”

⁵Wan temo Dyos in WeTatsDyos pa kitaskya Wepweblo wan ka se kal takpak kampa takam kalchiptikatkaloya, ⁶kito WeTatsDyos: “Nika pweblo se han wan moshte kipiyal se han tahtol, wan kipewaltik kalchiwaliste wan amoten kintsakwili kina tamatitikat. ⁷Ma tiyak ma titemok pa tикинролитiske inintahtolme, yok amo kimatiske ten kinekiske kitoske.”

⁸Yok kinsesemanalti WeTatsDyos pa mochital, wan mokawak amo kichiwak Wepweblo. ⁹Kampa yok kitokayoltik Babel, kaha kintapololti Dyos inintahtol pa amo kimatiroskya mokakiloskya masewalme pa mochital. Ompa kinsesemanalti Dyos moshte pa mochital.

Nikolinchim Shem

(Ip. 11:10-27) (Ip. 10:21-31) (1Ta-m. 1:17-27)

¹⁰Inik nitapowaliste Shem:

Shem kipiyaya 100 shiwim, okitakatilti Arpashad, kwah panowaya ome shiwim kwah ye tapakyawalisti. ¹¹Kwah otakat Arpashad, Shem yolti 500 shiwim, wan okinpi oksek ininpilwaTakam wan ininpilwaSiwam.

¹²Arpashad yolti 35 shiwim, kwah okitakatilti Shelá.

¹³Kwah otakat Shelá, Arpashad yolti 403 shiwim, wan okinpi oksek ininpilwaTakam wan ininpilwaSiwam.

¹⁴ Shelá yolti 30 shiwim, kwah okitakatilti Heber. ¹⁵ Kwah otakat Heber, yolti Shelá 403 shiwim, wan okinpi oksek ininpilwaTakam wan ininpilwaSiwam.

¹⁶ Kwah Heber kipiyaya 34 shiwim, kwah okitakatilti Péleg.

¹⁷ Kwah okitakatilti Péleg, kwakin Heber yolti oksek 430 shiwim, wan okinpi oksek ininpilwaTakam wan ininpilwaSiwam.

¹⁸ Péleg yolti 30 shiwim, kwah okitakatilti Rehu. ¹⁹ Wan Péleg yolti 209 shiwim, kwah okitakatilti Rehu, wan okinpi oksek ininpilwaTakam wan ininpilwaSiwam.

²⁰ Rehu yolti 32 shiwim, kwah okitakatilti Serug. ²¹ Kwah otakat Serug, Rehu kipiyaya 207 shiwim kwah okinpi oksek ininpilwaTakam wan ininpilwaSiwam.

²² Serug yolti 30 shiwim, kwah okitakatilti Nahor. ²³ Kwah otakat Nahor, Serug kipiyaya 200 shiwim, wan okinpi oksek ininpilwaTakam wan ininpilwaSiwam.

²⁴ Nahor yolti 29 shiwim, kwah okitakatilti Téra. ²⁵ Kwah otakat Téra, kipiyaya Nahor 119 shiwim kwah okinpi oksek ininpilwaTakam wan ininpilwaSiwam.

²⁶ Téra yolti 70 shiwim, kwah okitakatilti AbRam, Nahor wan Harán.

Nikolinchim Téra

²⁷ Inik nitapowaliste Téra. Téra okintakatilti AbRam, Nahor wan Harán.

Haran okitakatilti Lot, ²⁸ wan omik Haran kimani ayamo mikiyaya nitats Téra pa tal kaha takatiyaya pa Ur inintal kaldeyo'. ²⁹ Wan konanak AbRam wan Nahor ininsiwam AbRam nisiwa itoka Saray, wan Nahor nisiwa itoka Milka, nikonSiwat Harán, nitats Milka wan Yiská. ³⁰ Ma yok Saray amo kintakatiliyaya piltontim.

³¹ Wan Téra okis pa Ur in pueblo ka Kaldeyo' pa yaloskya pa tal Kanán. Wan okiwik nikon AbRam, wan nikolinche Lot (nisobrin AbRam) wan Saray nisiwamon, nisiwa AbRam nikon Téra. Ma yok, kwah asik pa in tal itoka Harán, ompa mokawak mochantitiyak, ³² Téra yolti 205 shiwim kwakin omik pa Harán.

Dyos okinots AbRam

12 ¹Kili WeTatsDyos AbRam: "Shihka motal, wan mopyaryente wan nikal motahwan, wan shi pa in tal kaha nimishneshtilis.

² “Wan nikchiwas pa
momyaptiske wan
yeske tanichikol we,
Wan nimishmashti;
Wan nikchiwas pa mo'itok
kina itok se we,
wan tiyes se
tamashtiliste.
³ nikanmashti ak kwal
annimishmashtil
wan amokwal
kinyaptiyas yehwante
amokwal mishnotsilih;
Wan pa tewal yeske
tamashtiliste
moshte inintahwan
ka ininpilwam pa
mochital!”

⁴ Yok okika AbRam tal,
kina kili WeTatsDyos, wan
inak Lot okis pa Harán.

Kipiyaya AbRam 75 shiwim kwah okis pa tal Haran. ⁵ Okiwik AbRam nisiwa Saray, wan Lot nikon ninohni, wan mochit-ten yewal tapiyaloya kwah katkaloya pa Harán, wan moshte kitikipanoliloya. Kwakin konanak ot pa tal Kanán wan asik pa Kanán, ⁶ AbRam pano mochital Kanán wan asi pa Sikem, kaha katka tepotskwawit itok MoriYah. Pa inik tonatim, mochanti-loya kananeyo' pa in tal. ⁷ Ompa ones WeTatsDyos ka AbRam kili: “Mokolinchim nikanmakas in tal.” Wan ompa AbRam kinichiko tetelme kaha kitaliliskya tatamakal WeTatsDyos, kampa omoneshti. ⁸ Kwakin AbRam panoti pa talTepet kaha kis tonat, amo wEhka katka Wepweblo' BetEl. Ompa okital nikal tachiwal ka shashal tilawak. Katka in Wepweblo' BetEl kaha kalaki tonat wan Ay in Wepweblo' oy kaha kis in tonat. Kinichiko tetelme kaha kitaliliskya tatamakaliste WeTatsDyos wan okinots. ⁹ Kwakin AbRam panoti wan yawiya pa ot Négeb.



© 1996 David C. Cook

*AbRam okis pa Harán pa yaskya
Kanán (Ipewaliste 12.5)*

AbRam pa Egipto

¹⁰ Oye mayanaliste pa tal kaha katka AbRam kwakin temok pa Egipto, ompa oy omochanti kampa katka miyak

mayanaliste. ¹¹ Kwah astiyaloya pa Egipto, AbRam kili Saray nisiwa: "Nihmat kina tewal kwal titachi wan kwal tines. ¹² Kwah michitaske egyptiyo', kitoske: 'Yewal nisiwa'; kwakin nishmiktiske wan tewal mishkawaske pa tiyolis. ¹³ Kwakin shikinmil kampa tewal tinonohniSiwat, pa yok nishchiwiliske kwal, wan yok ika tewal wan newal amo nimikis, yok niyolis."

¹⁴ O'as AbRam pa Egipto, kitatikatkaloya inik egyptiyo' kina kwal tachiyaya Saray. ¹⁵ Kwah kitak nitatakewalme para'ó werey, kililoya para'ó yewal kina kwal tachiyaya Saray, wan yok kikalaktik Saray pa nikal para'ó. ¹⁶ Wan para'ó okichiwil kwal AbRam ka yewal, okimakak ka nitanichikolme borrego', baka', burro', burra' wan kameyo' niyok tikipanolmeSiwam wan tikipanolmeTakam. ¹⁷ Ma yok WeTatsDyos kinpanolti takokoliste ka para'ó in we, wan yehwante ompa mochantiloya kampa Saray nisiwa AbRam mochantitikatka pa nikal para'ó. ¹⁸ Kwakin otatake para'ó pa kinotsaloskya AbRam wan kili: "Ten otinishchiwil?"



© 1996 David C. Cook

*AbRam kinichiko
tetelme kaha kitalili
tatamatkal WeTatsDyos,
kampa omoneshti
(Ipewaliste 12:7)*



© 1996 David C. Cook

Saray i'ishpa para'ó pa Egipto (Ipewaliste 12.19)

Pates amo otinichil kampa yewal mosiwa? ¹⁹Pates tikito yewal monohniSiwat? Kampa yok onikonan pa yeskyá nosiwa! Shikonan wan shihwik!” ²⁰Kwakin para’ó okintake nimasewalme pa konanaloskya ni’ot AbRam wan Saray, wan mochi yewal ten kipiyaya.

Mosesemanak AbRam wan Lot

13 ¹AbRam okis pa Egipto o'as pa Négeb, inak nisiwa ka mochiten tapiyaya, niyok yawiya Lot. ²AbRam tapiyaya miyak, plata, oro wan yolikilme. ³Okis pa Négeb, mochantitiyaya yok o'as pa BetEl, kaha ya wehkA kiketsaya nikal tachiwal ka shashal tilawak, yewal katka ipanta pa in BetEl wan Ay. ⁴Ompa kaha AbRam kinichikowaya tetelme kaha tatamakaya ya wehkA, ompa okinots ni'itokaliste WeTatsDyos.

⁵Niyok Lot yawiya inak AbRam niyok tapiyaya myak borrego', baka', wan kalme tachiwalme ka shashal tilawak. ⁶Ma yok, in tal amo we katka pa mochantiloskya, kampa tapiyaloya miyak yolikilme in omente. ⁷Oye momiktiliste ika nitakwitawilme borrego' AbRam wan nitakwitawilme borrego' Lot. Niyok ompa mochantiloya kananeyo' wan in peresheyo' pa in tal.

⁸Kwakin AbRam kili Lot: “Amo timokwalaniliske ika tehwante omente, niyok amo mokwalantiske totakwitawilme, kampa tewal wan newal timonohniwan. ⁹Kan onka mochi in tal pa mo'ishpa. Nimishtantani kampa shi oksela ka newal. Newal nimichili ta tewal timowikas ka momahwamapoch, kwakin newal nimowikas ka momahwakwal, wan ta tewal timowikas ka momahwakwal, kwakin newal nimowikas ka momahwamapoch.”

¹⁰Lot otachi moyawalo wan okit mochi ni'ishtawak pa in atenko Yordán, wEhka tanesiya, nesiyaya in pweblo Tso'ar kipiyaya miyak at, katka kina nikwahmil WeTatsDyos wan kina nital Egipto. Katka yok kina kwah ayamo'ok kinshitiniliyaya WeTatsDyos in Wepweblo' Sodoma wan Gomora. ¹¹Kwakin Lot okonan mochi ishtawak Yordán, wan panoti kaha waltakis tonat. Wan mosesemanak se ka okse. ¹²AbRam moka mochantiti pa in tal Kanán, wan Lot moka mochantiti ipanta ni'ishtawak, wan in Wepweblo' kinkets nikalme tachiwal ka shashal tilawak amo wEhka pa Sodoma. ¹³Kampa in masewalme mochantiloya Sodoma amokwal tamatiloya wan kichiwalya miyak katsawiliste ika WeTatsDyos.



© 1996 David C. Cook

*Motalik ka se tahtoliste wan mosemanak
AbRaham wan Lot (Ipewaliste 13:11)*

¹⁴ Wan WeTatsDyos kili AbRam kwah panoti Lot: “Shitachi kaha ti'onka, shikit nepa takpak wan nepa tatsinta wan kaha kis tonat wan kaha kalaki tonat. ¹⁵ Kampa mochi in tal, yewal tikitatik, nimishmakas tewal wan mokolinchim pa hanse.

¹⁶ Nikchiwas pa yeske mokolinchim kina nipohteTal. Wan ta se kwal kipowaskya nipohtiTal, kwakin yok kwal kinpowaloskya mokolinchim. ¹⁷ Shimokets wan shinehnem pa mochital pa kishki weyak wan pa kishki patawak, kampa newal nimishmakas!”

¹⁸ Yok AbRam ki'ahkoki ikal tachiwal ka shashal tilawak wan oy omochanti kaha nitepotskwawim in takat itok Mamré, amo wEhka katka in Wepweblo itok Hebrón. Wan ompa kinichiko tetelme pa tatamakaliste WeTatsDyos.

AbRam kikishti Lot

14 ¹Pa inik tonatim katka Amrapel Rey pa tal Shinar, Aryok Rey pa Elasar, Kedorlagamer Rey pa Elam, wan Tidál Rey pa Goyim ²inik momiktik Bera Rey pa Sodoma, Birshá Rey pa Gomora, Shináb Rey pa Admá, ShemÉber Rey pa Tseboyim, wan yewal Rey pa Bela, yewal ka in pweblo Tso'ar.

³Inik takwitap makwil Reye' monichikok pa ishtawak Sidim, kaha onka we'atTemtik Tapoyawaltil. ⁴Pa 12 shiwim kitekipanolik noliloya Kedorlagamer, pa in shiwit 13 yahmo kitekipanolik wan momiktik ika yewal.

⁵Pa in shiwit 14 Kedorlagamer wan in reye' katkaloya inak yewal oyak wan kintanilik in replateko' pa tal Ashtarot Karnayim; wan in susiteko' pa Ham, wan in emiteko' pa ShaweKiryatayim, ⁶wan in horeteko' mochantiloya tepetLom pa Se'ir, kintohtokak kaha ni'ishtawak Parán, yewal onka inak pa se tal kaha tawak. ⁷Kwakin mokwepak, wan oyak pa EnMishpat, yewal niyok itoka Kadésh, wan kintashitinilik mochiten in amalekteko', wan niyok in amoreteko' yehwante mochantiloya pa HasesónTamar.

⁸Kwakin kisak in Rey pa Sodoma, Rey pa Gomora, Rey pa Admá, Rey pa Tseboyím wan in Rey pa Bela, yewal in Tso'ar, wan oyak momiktik ika yehwante pa ishtawak Sidim ⁹inak in, Kedorlagamer Rey pa Elam, Tidál Rey pa Goyim, Amrapel Rey pa Shinar, wan Aryok Rey pa Elasar. Katkaloya nawi reye' wan momiktik ika makwil reye'. ¹⁰Wan in ishtawak Sidim katkaloya myak kohkoyonke ka chapopote, kwah chololoya inik reye' Sodoma wan Gomora, sek wetsik pa in kokoyonke wan oksek motatik tepetLom. ¹¹Kwakin inik nawi reye' tawikak mochi takwaliste, wan mochiten tapiyaloya pa Sodoma wan Gomora, wan panotiyak. ¹²Niyok kiwikak Lot, yewal nikon ninohni AbRam, yewal mochantiyaya pa Sodoma, wan mochiten tapiyaya wan panotiyak.

¹³Wan se ka inik takat ochol wan oy okinawat AbRam in hebreteko, yewal mochantiyaya ka nitepotskwawim Mamré in amoreteko. Ninohni Eshkol wan Aner, yehwante kichiwak se tahtoliste ka AbRam pa momiktilosky. ¹⁴Kwah kimat AbRam kina kikitskik nikon Lot ninohni, okinnots 318 inintikipanolme yehwante takatik icha, wan kintohtokak pa in pweblo Dan. ¹⁵Kwah tayoway AbRam wan inintikipanolme kinasik in nawi reye' wan momiktik, kwakin yehwante kintohtokak pa Hobá, panoti nepa takpak pa Damasko. ¹⁶Okonan mochiten yewal ta'ishtikiloya inik nawi reye' wan niyok Lot, yewal nikon ninohni, ka mochiten tapiyaya, niyok kinwalikak siwam wan oksek masewalme.

¹⁷Kwah walmokwepaya AbRam kwah kitaniliyaya Kedorlagamer ka inik reye' yehwante kipalewiloya, okis in rey

pa Sodoma okinamik pa in ishtawak Shawé, yewal ni'ishtawak in rey.

¹⁸ Kwakin Melkisedek, katka Rey pa Shalem wan niTotats ka in Dyos HyeroTakpak, okiwalik pan wan nihugoUbaBino.

¹⁹ Wan kimashti AbRam, kiliyaya:

“Ma ye in Dyos HyeroTakpak,
in yewal okichi ilwikak wan in mochital,
ma kimashti kwal AbRam!

²⁰ Wan ma ye ka tamawishtiliste in Dyos HyeroTakpak,
yewal mishpale pa tikintanilis motakokolilme!”

Kwakin AbRam okimak Melkisedek in matahti pa sesen mochiten nitapehpenaliste.

²¹ Kwakin in Rey pa Sodoma kili AbRam:

—Shinishkwepil in masewalme wan tewal shimatotakawil mochiten.

²² Kinankili AbRam in Rey pa Sodoma:

—Onitemak notahtoliste pa WeTatsDyos, in Dyos HyeroTakpak, yewal okichi ilwikak wan mochital, ²³ pa amo nikonanas amoten ka tewal, se ikpal, se mekatonte pa se warach. Pa yok amo tikitos: “Onikchi AbRam se takat ka miyak tomi.” ²⁴ Nikonanas yewal han ten kikwak notakam. Wan niyok yehwante konanaske nipanta Aner, Eshkol wan Mamré kampa yaloya yehwante nonak.

Dyos kitiniwili se nikon AbRam

15 ¹Kimani pano in, WeTatsDyos okinots AbRam tachiyaya kina tatimikiyaskya kili:

“Amo shimomapti, AbRam.

Newal nika ka tewal kina se tatsakwilil pa mishtsakwilis,
wan hyero we yes motashtawaliste.”

² AbRam kinankili:

—WeTatsDyos wan Dyos, pates tinishmakas ta amo nikinpi nopolwam, wan yewal ak motakawilis pa no'icha kwah nimikis yewal EliEser otakat pa Damasko? ³ Wan niyok AbRam kito: Kampa amo otinismak se nokon, notikipanol pa nokal motakawilis yewal ten nikpi.

⁴ Kwakin oval ka yewal nitahtolme WeTatsDyos kili:

—Motakawiliste amo yes in, se mokon tewal, yewal motakawilis.

⁵ Kwakin yewal okiwak pa kiyawak wan kili:

—Shitachi pa in ilwikak wan shikinpo in sitalme, ta kwal tikinpowas. Yok yeske mokolinchim!

⁶ AbRam okineltok WeTatsDyos, wan in WetatsDyos okit kwal ka nitaneltokaliste. ⁷ Wan WeTatsDyos niyok kili:
—Newal ninewal WeTatsDyos, newal onimishkishti pa in Ur pa nital in kaldeyo' pa nimishmakas in tal kina takawaliste.

⁸ AbRam kinankili:

—WeTatsDyos wan Dyos, kina nihmatis kampa newal yes notakawaliste?

⁹ Wan in WeTatsDyos, kili:

—Shinishwalikil se beserra, se chiba wan se borrego, kinpiyaske sesen yey shiwim, wan se poporishit wan se wilotonte.

¹⁰ AbRam kinkitske mochi inik yolikilme, wan okintek ipanta, wan okintal nitahko pa se nimapochmahwa wan okse pa nimahwakwal, in totom amo okintek ipanta. ¹¹ Kwa-kin tsopilom temoloya ipa yolikilme mihmiki, wan AbRam kinmahmaptiyaya.

¹² Tamalinti tonat, okoch chikawak AbRam, wan tamakasiyaya miyak kampa panowaya se tayowaliste ipa yewal. ¹³ Kwakin WeTatsDyos kili AbRam:

—Shihmat kampa mokolinchim yaske mochantiske pa se tal yewal amo inittal, pa in tal kintikipanoltiske amo kintashtawiliske wan hyero kinkokoliste inik masewalme pa in tal yehwante kintikipanoltik, wan kimani panos in, mokolinchim kisaske ompa ka miyak mochiten tapiyaske. ¹⁵ Wan tewal, tiyas ka mosewiliste ka mowichalme yewal mikik, timikis wan mishtapachoske kwah tiyes hyero kolinche. ¹⁶ Wan mokwepaske kwah yahmo yoltiyaske ininwichalme, ininkolinchim, inintahwan wan ininpilwam walmokwepaske nika pa in tal ininwichalme, kampa intakokoliste in amoreteko' ayamo'ok kinasis in tonat yewal newal nikinkishtilis in tal pa nikinmakas mokolinchim.

¹⁷ Wan panowaya in, kwah tamalin tonat wan waltayoway, nesiyaya se komit ka tikol popokatiyaya wan teshoste ka okot panowaya itsalaYolikilme tahtahko. ¹⁸ Pa in tonat okichi in WeTatsDyos se tahtoliste ka AbRam kili:

—Nikinmakas mokolinchim in tal, pa in atenko Egipo wan pa in we atenko, in Éprates. ¹⁹ Ka inittal in keniteko', in kenisita',

in kadmoneyo', ²⁰In heteteko', in peresheyo', in repateko', ²¹in amoreteko, in kananeyo', in girkasheteko' wan in yebuseyo'.

Hagar wan Yishma'El

16 ¹Saray, nisiwa AbRam amokwal kinpiyaskya ininpilwam. Wan kipiyaya se nitikipanolSiwat egiptiya itoka Hagar, ²kwakin Saray kili AbRam:

—In WeTatsDyos amo onishmakawalti pa ninkinpiyas nopilwam. Shimotek inak notikipanolSiwat. Yok ipa yewal ninkinpiyas nopilwam.

AbRam kichi in yewal ten kili Saray. ³Kimani kipiyaya matahti shiwim AbRam kampa mochantitikatkaya pa tal Kanán; Saray nisiwa AbRam, okonan Hagar nitikipanolSiwat wan okimak pa yeskyia nisiwa AbRam nitaka.

⁴ AbRam omotek inak Hagar, wan in siwat ta'apa ostitikatka. Kimani kimat Hagar kampa kipiyaskya se nikon, amo kimawistiliyaya Saray niWetatakewan. ⁵Kwakin Saray kili AbRam:

—Pa tewal napanotik in! Kampa Hagar amo nishmawishtilitik, nimishmak pa yeskyia mosiwa wan ashka okimat kampa kipiyas se nikon ashka wetamat. Ma yok Dyos ma kit akyewal kipi takokoliste ika tewal wan newal!

⁶ AbRam kinankili Saray:

—Shikit Hagar yewal motikipanolSiwat onka ka tewal. Shikchi pa yewal kina tihnekis.

Wan kina Saray hyero kichiwiliyaya pa hanse tonatim, kwakin ochol Hagar. ⁷In Nitanawatilanhel WeTatsDyos kinamik Hagar kaha nalkistikatka at pa se tal kaha tawak, yewal in nalkistik at onka pa in ot Shur, ⁸wan kili:

—Hagar nitikipanol Saray, kampa tiwal wan kampa ti?

Wan Hagar kinankili:

—Nicholoti kaha amo yes nowetatakewan Saray.

⁹NitanawatilanhelDyos kili:

—Shimokwep ka mowetatakewan wan shineltok pa mochiten. ¹⁰Niyok kili nitanawatilanhel: Nikinmiyaptis mokolininchim, kampa amokwal kina kinpowaske.

¹¹ In nitanawatilanhel in WeTatsDyos kili: “Ashka ti'ostitik titapapti, wan tikpiyas se mokonTakat, tiktakayoltis Yishma'El, kampa in WeTatsDyos kimat kina timoyolkokotik.

¹² In mokon tewal yes kina se burro yewal amo kipi niwetatakewan.

Momiktis ka moshte, wan moshte momiktiske ika yewal; wan yok, ta amo kinekil yok yewal mochanti i'ishpa ninohniwam."

¹³ Kina WeTatsDyos kiliyaya, yewal yok okitokayolti "Tewal tiDyos yewal titachi", kampa kito: "Ashka onikit Dyos yewal nichit newal." ¹⁴ Wan in nalkistik at moka ika Kadésh wan Béred, yewal kitokayolti Beer-Lahay-Roy in kinek kili: "Takoyonaliste Dyos yewal yoltik wan nichit." ¹⁵ Hagar okitakatilte se nikonTakat, ka AbRam wan yewal okitokayolti Yishma'El. ¹⁶ Wan AbRam kipiyaya 86 shiwim kwah Hagar okitakatilte Yishma'El.

**Nitatekiliste ikwerit itenko kaha mashishal,
kina taneshtiliste ka se taketsaliste**

17 ¹ AbRam kipiya 99 shiwim, kimani omoneshti in WeTatsDyos wan kili:

—Newal ninewal in Dyos chikawalist. Shiyolti hanse pa no'ishpa newal wan kwal shikchipti. ² Newal nikchiwas se taketsaliste pa tewal, wan nikchiwas pa momiyaptiske mokolinchim.

³ Kwakin motankwakets AbRam wan Dyos otahto inak yewal wan kili:

⁴ —Ina yewal notaketsaliste nikchi ka tewal: Tewal tiyes inintats pa myak masewalme. ⁵ Yahmo ti'itokas AbRam, ashka timo'itokas AbRaham, kampa onimishchi pa tiyes inintats myak masewalme. ⁶ Newal nikchiwas pa timomiyaptis pa tewal yeske myak tanichikolme ka masewalme wan yeske WeReye! ⁷ Ka in taketsaliste yewal nikchi ka tewal wan ka mokolinchim, ina yes se taketsaliste pa amo'ik tamis. Wan newal niyes nimoDyos wan iniDyos mokolinchim. ⁸ Wan nimishmakas tewal wan mokolinchim, mochital kampa ashka timochanti in tal Kanán, kina se takawaliste pa hanse, wan newal niyes ininDyos ka yehwante.

⁹ Dyos kili AbRaham:

—Tewal, tikchiwas kina in taketsaliste, wan moshte mokolinchim yehwante takatitiwalaske. ¹⁰ Ina yewal notaketsaliste nikchi ka anmehwante, moshte takam pa anmehwante ankipiyaske pa anyeske takotonilme nikwerit

kaha mashishal.^h ¹¹Anmehwante takam anki piyaske pa yeske takotonilme nikwerit kaha mashishal, kina nitaneshtiliste in taketsaliste ika tehwante. ¹²Kwah monamikiske chikweyi tonatim, yeske takotonilme nikwerit kaha mashishal moshte takam yehwante mochantilme ka anmehwante, wan niyok yehwante anmokowilik ka anmotomi wan amo monotsalme. ¹³Yeske takotonilme nikwerit kaha mashishal yehwante takatik pa anmokal, wan yewal ankinkowak ka anmotomi, notaketsaliste yes pa in nakat pa anmehwante yewal amo'ik tamis. ¹⁴Kishki takam yewal amo yeske takotonilme nikwerit kaha mashishal, ika anmehwante yok yehwante yahmo yeske pa anmopweblo', kampa amo kimawishtilitikat notahtoliste.

¹⁵Duos niyok kili AbRaham:

—Mosiwa Saray, amo tihnotsa Saray, ashka mo'itokas Sara.

¹⁶Newal nihmashtis, wan niyok nimishmakas se nikon pa yewal. Newal nihmashtis wan yewal yes ininnantsi pa myak tanichikoliste pa Wepweblo', inik WeReye' wan inik pweblo' pa yewal takatiske.

¹⁷Kwakin omotankwakets AbRaham pa tal, wan okipakti wan omo'il pa niyol: "Ten aso se takat yewal kipi 100 shiwim, okitakatilti se nikon? Wan aso kipyas Sara se nikon yewal kipi 90 shiwim?" ¹⁸AbRaham kili Dyos:

—Ta Yishma'El yoliskya pa mo'ishpa tewal!

¹⁹Kinankili Dyos:

—Yewal ten nikito kampa in Sara mosiwa, mishmakas se nikon, wan tewal tiktakayoltis Itsak! Wan melak nikitalis notaketsaliste inak yewal kina se taketsaliste yewal amo'ik tamis pa nikolinchim, yehwante takatitiwalaske. ²⁰Pa kishki Yishma'El, niyok onimishkak. Wan newal nihmashti, wan nikchiwas pa momiyaptiske myak nikolinchim. Yewal yes inintats pa 12 wehwetatakewalme. Wan newal nikchiwilis pa mochiwas se Wepweblo. ²¹Ma notaketsaliste nikitalis pa Itsak, in piltonete yewal Sara mishmakas kwah monamikiske pa inik tonatim, pa okse shiwit.

²²Wan kimani Dyos otam otahto ka AbRaham, opanoti.

²³Pa in se tonat okonan AbRaham nikon Yishma'El, wan kikotonili nikwerit kaha mashishal, wan moshte yehwante inintikipanolme takatilme pa nikal wan moshte yehwante

^h 17:10 Takotonilme nikwerit kaha mashishal in kinek kito: prepusio.

omokowil ka nitomi; in kinek kito, ankipiyaske nakat takotonilme nikwerit kaha mashishal pa moshte takam yehwante mochantilme pa mokal, yok kina Dyos kiliyaya.
²⁴ AbRaham kipiyaya 99 shiwim kwah kikotonilik nikwerit kaha mashishal, ²⁵ Yishma'El, in ikon kipiyaya 13 shiwim kwah kikotonilik nikwerit kaha mashishal. ²⁶ Ikon in Yishma'El yek takotonilil nikwerit kaha mashishal pa in se tonat ²⁷inak yewal yek takotonilme ininkwerit kaha mashishal moshte takam kishki katkaloya pa nikal, yok kina inintikipanolme takatilme pa nikal yewal niyok takowalme katkaloya pa okse tal.

Dyos kitiniwili se nikon AbRaham

18 ¹Moneshti in WeTatsDyos ka AbRaham amo wEhka katkaloya nitepotskwawim Mamré, kwah moseptikatka pa tatapoli pa nikal tachiwal ka shashal tilawak, kwah hyero tona pa tahka. ²Otachi AbRaham, wan yewal okinmit yey takam moketstikatkaloya ka tamawishtiliste. Kwah okinmit, hani mokets pa in tatapoli pa nikal pa kinnamikisky. Motankwakets pa tal, ³wan kito:

—Tats, ta tihnek tikchiwas kwal pa newal, amo shipan hanse pa motikipanol newal. ⁴Ma nitatake pa kiwalikaske tipit at pa ankipakaske ammoshiwalme, wan anmosewiske pa itsinta in kwawit. ⁵Ma nihwalik pan pa ankikwaske, pa konanaske chikawaliste kwakin anmowikaske pa anmo'ot. Kampa anasik anmehwante pa no'icha newal anmotikipanol.

Yehwante kinnankilik:

—Kwal onka, shikchi kina tikito!

⁶Yok AbRaham mo'isiwilte okalak pa nikal tachiwal ka shashal tilawak kaha katka Sara, wan kili:

—Shikonan yey tamachiwiliste arina kwahkwal han, wan shikshakwal shikchi pan.

⁷Kwakin motalo AbRaham kaha katkaloya yolkilme, okonan se beserro tipichi, wan okimak se nitikipanol, yewal mo'isiwiltiyaya pa kiyokshitisky. ⁸Wan okonan AbRaham keso wan lech wan nakat yewal okiyokshit. Wan okintalil pa ininishpa yehwante, wan yewal moka moketstik inak yehwante, itsinta kwawit. ⁹Yehwante kitahtanilik:

—Kaha onka mosiwa Sara?

AbRaham kinankili:



© 1996 David C. Cook

*In yey takam kitiniwilil se nikon
AbRaham (Ipewaliste 18:10)*

—Nepa kalitik.

¹⁰Kwakin se ka yehwante kili AbRaham:

—Melak niwalmokwepas ka tewal, kwah monamikiske inik tonatim pa okse shiwit wan Sara kipiyas se nikon.

Takaktikatka Sara pa kalitik in kal, yewal katka ikwitap AbRaham. ¹¹AbRaham wan Sara wehwe katkaloya wan myak shiwim kipiyaloya, wan Sara yahmo ki'asiyaya nimeste. ¹²Kampa okipakti Sara pa'itik yewal mo'ili: “Kwah nika nisiwat we, wan notaka we, niyok nikpiyas newal in pakiliste?” ¹³Kwakin in WeTatsDyos kili AbRaham:

—Pates wetska Sara wan tamat? Melak nikpiyas se nokon ashka kampa niwe, ka myak shiwim? ¹⁴Ten aso in WeTatsDyos amo kimat kichi? Newal niwalmokwepas ka tewal pa in tonat pa okse shiwit, wan kipiyas Sara se nikon.

¹⁵Sara, momapti wan yewal otikwaman kampa yok okit:

—Newal amo niwetskatikatka.

Kampa yewal kili:

—Newal nihmat kampa melak otiwetska.

AbRaham kitahtani Dyos pa amo kishitinis Sodoma

¹⁶Inik pashalolme mowikak pa ni'ot wan otachiyak pa tatsinta pa Sodoma. AbRaham yawiya inak yehwante. ¹⁷Kwakin in WeTatsDyos kito: “Aso niktilatis AbRaham in yewal ten nik-chiwas? ¹⁸AbRaham kinpiyas myak nikolinchim wan yehwante kinpiyaske miyak chikawaliste, wan ipa yewal yeske tamashtiliste moshte in tanichikolme pa mochital. ¹⁹Kampa newal nihmat yok kintakewas ininpilwam wan ininkolinchim, ma konanak ni'ot in WeTatsDyos ma kichiwak kwal wan ka melawak. Pa yok newal nikashiltis pa AbRaham in ten niktiniwil.”

²⁰Kwakin in WeTatsDyos kili:

—In teshpawiliste kina kichiwal hanse tonatim yehwante pa Sodoma wan Gomora, wan ininta'ihtakoliste hyero we. ²¹Ashka niyas wan nitemos ompa, pa nihmatis ta kichiptikat kina in tateshpawiliste yewal o'as kaha newal; ta amoyok, nihmatis.

²²Ome pashalolme konanak ot pa Sodoma, hanwel AbRaham moka moketstik ni'ishpa in WeTatsDyos. ²³Wan o'as AbRaham wan kili:

—Aso tewal tikinmiktis in takam kwahkwalme ka yehwante in amokwahkwalme? ²⁴Ta kat 50 takam kwahkwalme pa in Wepweblo'. Hanwel yok tikshitinis in pweblo amo tikinihnulis ka inik 50 takam kwahkwalme yewal yoltikat ompa? ²⁵Tewal amoyok tikchiwaskya! Amo tihmiktiskya se kwal inak se ta'ihtakol, wan tikchiwaskya kampa nesiskya se kwal kina inak se ta'ihtakol? Amoyok tikchiwaskya! In tatakewan hwes pa mochital, amo kichiwaskya ten kwal?

²⁶Kwakin in WeTatsDyos kinankili:

—Ta nikinmit pa Sodoma 50 kwahkwalme, pa yehwante nikinihnili moshte kishki yeske ompa.

²⁷Kwakin AbRaham oksep kito:

—Nika ni'onka ashka, amo nimonots pa nitahtos ka WeTatsDyos, han nipohti wan nineshte. ²⁸Ta amo yeloskya 50, ta moteshmonekiloskya makwil. Kwakin tikshitinskya in Wepweblo kampa moteshmonekiloya in makwil?

WeTatsDyos kito:

—Amo nikshitinis, ta nikinmit 45 kwahkwalme.

²⁹Oksep AbRaham otahto wan kito:

—Ta hanwel kat 40?

WeTatsDyos kinankili:

—Ta kat 40 takam kwahkwalmé, amo nikinshitinis!

³⁰Oksep AbRaham kito:

—NoTats amo shikwalan, ta oksep onitahto. Ta han tikinmit 30.

WeTatsDyos kinankili:

—Amo nikshitinis, ta nikinmit 30.

³¹AbRaham kito:

—Nika ni'onka ashka, amo nimonots pa nitahtos ka noTats, ta hanwel tikinmit 20.

Wan WeTatsDyos kinankili:

—Amo nikshitinis, ta nikinmit 20.

³²Kwakin oksep AbRaham kito:

—NoWeTatsDyos amo shikwalan, ta oksep onitahto. Ta hanwel tikinmit matahti, tikshitinis.

WeTatsDyos kinankili:

—Amo nikshitinis, ta kat matahti takam kwahkwalmé.

³³Kwah otam otahto in WeTatsDyos ka AbRaham, panoti ompa, wan AbRaham omokwep pa nikal.

Tashitiniliste pa Sodoma wan Gomora

19

¹Pa tyotak asik omente nitanawatilanhelme pa Sodoma. Lot yowatikatka pa in tatapoli Sodoma. Yok kwah okinmit, omokets oy okintenamik omotankwakwets pa talpa.

²Wan kito:

—Takam, animichilis, shiwalak no'icha newal anmotikipanol. Kampa anmopakaske annoshiwam, wan anpanoske in yowal kwakin yok mosta kwalka ankonanaske anmo'ot.

Yehwante kinankilik:

—Mishtasta. Tipanoske in yowal kiyawak.

³Lot kintahtani ka miyak chikawalisté pa mokawalo-skyá, yehwante oyak inak yewal. Kwah kalakik pa nikal. Kinyokshitil se takwaliste kwal ika pan kati amo kipiyaya ka motapotsawalti, wan yehwante otakwak.

⁴Kwah ayamo'ok motekaloya pa kochiloskyá, inik takam pa in Wepweblo kiyawalok kal. Ompa monichikok moshte takam pa Sodoma, in yahyankwik wan moshte wehwe. ⁵Kinotsak Lot kilik:

—Kampa kat in takam yewal asik mo'icha pa tyotak? Shikinkishti pa kiyawak! Pa yok timotekaske inak yehwante!



© 1996 David C. Cook

*Lot pa nitatapoli kal ika in masewalme
pa Sodoma (Ipewaliste 19:7)*

⁶Okis Lot pa kiyawak pa tahtoskya inak yehwante, haniman kitsakwa in tatapoli, ⁷wan kinmili:

—Nonihnihwan nahnewal, newal annimishtahtani amo shikchiwak in ten hyero amokwal. ⁸Newal nikinpi ome nopilwaSiwam yehwante ayamo motekal ka takam; annimishwalikili anmehwante wan shikinchiwilik kina ankinekil, amo shikinkwesok in takam, kampa kat no'icha kampa yehwante nikinkwitaptik pa amoten kinpanos.

⁹Yehwante kinankilik:

—Shime!

Wan niyok mo'ilik:

—In se oval pa topweblo se yewal amo otakat nika, wan ashka kinek niyok tishahwa. Ashka timishchiwiliske hyero amoyok kina yehwante!

Wan kitopewaloya Lot wan monichikok pa kitopewaloskya in tatapoli. ¹⁰Kwakin in pashalolme kikishtik ininmahwam, wan kitilanak pa kalitik Lot ka yehwante kitsakwak in nitatapoli. ¹¹Wan inik takam yewal katkaloya pa tatapoli pa in kal moshte takam yahyankwik wan moshte wehwe amokwal kina tachiyaloskya, wan yehwante kitemotinemil tatapoli wan osiyawik. ¹²Kwakin in omente takam kilik Lot:

—Tikinpi oksek pa in Wepweblo' ammonohniwan?
AnmopilwaSiwam ka inintakam, anmopilwaTakam, mochiten



© 1996 David C. Cook

*Nitanawatilanhelme kitahtanilil Lot ak
kinkishtiskya (Ipewaliste 19.13)*

tikpi pa in Wepweblo' shikinkishti wEhka, ¹³kampa tehwante tikshitiniske in tal nahyehwante. Kampa in WeTatsDyos, kikaki kampa onka miyak ta'ihtakoliste. Otistake pa tikshitiniske.

¹⁴Yok okis Lot wan okinnots ininimon, inik yehwante monamiktiloskya ka ininpilwaSiwam wan kinmili:

—Shimoketsak! Shikisak pa in Wepweblo, kampa in WeTatsDyos kishitinis!

Wan ininimon tamatiloya kampa hanya han kitotikatka, ¹⁵tahtanesti nitanawatilanhelme kilik Lot:

—Shimokets, wan shikinwik mosiwa wan in omente mopilwasiwam, yehwante nika kat, pa amo anpoliwiiske kwah Dyos kitamiltis in Wepweblo.

¹⁶Yolikit mochiptikatka Lot pa kisaskya, kwakin inik takam kinkitskik Lot pa nimahwam, nisiwa wan in omente ininpilwaSiwam, wan kinwikak pa wEhka in Wepweblo, kinkishtitikatkaloya pa in polewiliste, kampa in WeTatsDyos ki'ihniliyaya yewal. ¹⁷Kwah kinkishtik, kilik:

—Shimotal, shimokishtil yoliliste, pa amo anmishasi! Amo shitachi pa takwitap wan amo shimokets pa in ishtawak. Shicholok pa in tepetLom, pa amo anpoliwiiske!

¹⁸Lot kinmili:

—Takam nahnewal, nimishtamachi, amo shinishchiwilik yok. ¹⁹Newal anmotikipanol onikit kina annishchiwilik kwal, kina annishkishtik pa in polewiliste ka noyoliliste. Ma yok amokwal nicholos pa in talTepet, in tashitiniliste nishasis wan nipolewis. ²⁰Shikit in Wepweblo, amo wEhka onka wan tipichi! Niyas ompa yok niyolis! Kampa melak ta tipichi?

²¹Wan yewal kinankili:

—Nimishchiwilis in yewal tinishtahtan. Amo nikshitinis in Wepweblo tipichi yewal otinichil. ²²Shimo'isiwilti wan shimaltomp, kampa newal amokwal ten nikchiwas ta ayamo ti'asis ompa.

Kwakin okitokayolti in Wepweblo Tso'ar.

²³Kwah waltakis tonat ipa tal Lot o'as pa Tso'ar. ²⁴Kwakin in WeTatsDyos kiwaltitan pa in takpakIlwikak teshoshte wan asufre ipa Sodoma wan Gomora. ²⁵Wan kinshitin inik Wehwepweblo' wan mochi in ishtawak inak moshte yehwante ompa yoliloya pa in Wehwepweblo', wan mochi kwawim taki-loya pa in tal. ²⁶Wan nisiwa Lot otachi pa takwitap, wan omoka kina se takopinal ka tet poshak ka istat.

²⁷Mostatik AbRaham omokets omokwep kaha takets pa i'ishpa WeTatsDyos. ²⁸Kwah otachi pa Sodoma wan Gomora, pa mochital ishtawak, okit kampa in tal popokatikatka, katka kina ipohi se teshoshte hyero we.

²⁹Kwah Dyos kinshitin in Wehwepweblo' pa in ishtawak, kaha Lot mochantiyaya ki'ilnamik AbRaham, wan kikishti Lot pa kiyawak pa in tashitinililiste.

Lot wan ininpilwaSiwam

³⁰Tamakas Lot pa mokawaskya pa Tso'ar, yok okis wan panoti pa talTepet. Wan ompa omoka mochantiti pa se kweba inak in omente ininpilwaSiwam. ³¹Se tonat, nikonSiwat we kili ninohni tipichi:

—Totats ya we, wan amo kat takam pa motekaske ka tehwante, kina kichiwal moshte pa mochi kishki tal. ³²Ma tiktawantik totats ka nihugoUbaBino, timotekaske inak yewal; yok tikinpiyaske topilwam ka totats.

³³Pa in tayoway kimakak nihugoUbaBino nitats, kitawan-tik wan nikonSiwat we okalak wan omotek ka nitats, wan amo kimat Lot kwah omotek nikon wesiwat, amo kimat kwah omokets. ³⁴Mostatik kili ninohniSiwat tipichi:



© 1996 David C. Cook

*WeTatsDyos kiwaltitan pa in takpakIlwikak teshoshte
wan asufre yok okis Lot pa Sodoma (Ipewaliste 19.24)*

—Yalwa tayo onimotek inak notats. Ma tihmakak nihugoUbaBino niyok pa in yowal, pa ashka tewal tiyas timotekas inak yewal; yok tikinpiyaske topilwam pa totats.

³⁵Pa in yowal niyok kimakak nihugoUbaBino intats, wan nikonSiwat tipichi oy wan omotek inak yewal wan yewal amo

kimat kimani omotek yewal, pa kimani omokets. ³⁶Wan yok in omente ininpilwaSiwam ka Lot ta'ostiloya ta'apawak ka nitats. ³⁷In we nikonSiwat okipi se nikonTakat, okitokayolti Mo'Ab, yewal oye inintats mo'abteko'. ³⁸Niyok ninohniSiwat okitakatilti se nikonTakat, wan okitokayolti Ben-amí, yewal oye inintats Amoniteko'.

AbRaham wan AbiMélek

20 ¹Kwakin AbRaham omowik wan asik pa in tal Négeb, ompa moka mochantiti ipanta pa in Kadésh wan Shur. Mokawak pa in tal Gerar, ²ompa kinmiliyaya AbRaham moshte kampa Sara, katka ninohniSiwat. Kwakin in werey Gerar yewal itok AbiMélek okintake pa kiwikililoskya Sara pa yeskyा nisiwa. ³Kwakin Dyos oval pa se tatemikiliste pa AbiMélek pa se yowal kili:

—Tewal timikis kampa otikonan in siwat yewal tasiyawatil.

⁴AbiMélek ayamo kochiyaya inak Sara, kito:

—Tats, tihmiki se takat yewal amo kichi takokoliste? ⁵Amo nichili yewal, yewal nonohniSiwat, wan niyok yewal nichili, yewal nonohniTakat yok newal nikchi kwal pa noyol wan amo nikchi ten amokwal.

⁶Wan Dyos kili pa in tatemikiliste:

—Newal nihmat kampa tewal otikchi in wan amo timotishpawilitikatka moyol nitamatiliste; kampa in nimishtsakwil pa amo tikchiwas takokoliste ka yewal, wan niyok amo tinishchiwiliskya katsawiliste, kwakin amo nimishmakawalti pa tikochiskya inak yewal. ⁷Ashka shihkwipil in takat nisiwa, kampa yewal niTaketsal nitahtolDyos wan yewal tahtanis pa tewal wan yok tiyolis. Ta amo tihkwpil, nihnek pa tihmatis kampa timikis tewal wan moshte ka tewal.

⁸Mostatik kwalka omokets AbiMélek, wan otatake pa walaloskya moshte inintikipanolme wan melak kinmili mochi yewal ten tatemik, wan miyak momaptik.

⁹Kwakin AbiMélek okinots AbRaham wan kili:

—Ten yewal otishchiwil! Pates otinishchiwil se ta'ihtakoliste we, yewal otishwalikil ipa newal wan ipa noreynaroliste? In yewal otikchi ka newal in ten amoyok mochi!

¹⁰Niyok kili AbiMélek AbRaham:

—Kina titamatiya kwah yok otikchi in?

¹¹Wan AbRaham kinankili:

—Kampa nimo'il kampa in takam nika amo kimatil momaptil pa i'ishpa Dyos, wan nishmiktiloskya ika nosiwa.¹² Melak yewal nonohniSiwat, nikon notats wan amo nikon nonantsi; wan ashka nosiwa.¹³ Kimani Dyos onishchiwil pa nimowikatinem, kwah onikis pa nikal notats, newal nikili nosiwa: “Pa moshte kaha tiyaske wan ti'astiyaske shikinmil kampa newal nimonohni.”

¹⁴ Kwakin AbiMélek okinwikil borrego' baka', wan tikipanolmeTakam wan tikipanolmeSiwam, wan kintemak AbRaham. Wan okikwepil AbRaham nisiwa Sara,¹⁵ wan AbiMélek kili:

—Shikit nokwahmilme kat pa mota'ishpa; shimochanti kaha tihnekis.

¹⁶ Wan Sara kili:

—Nihmakatik monohni AbRaham mil tomiplata, yok timokishtiliske tehwante pa in amokwal yewal tewal timishchiwililoskya; yok moshte yehwante kat ka tewal kimatiskie kampa tewal amo tikchi ten amokwal.

¹⁷ Kwakin AbRaham kitahtan Dyos, wan Dyos okinpahti AbiMélek nisiwa wan inintikipanolmeSiwam wan yok kinpiyak ininpilwam,¹⁸ ika Sara nisiwa AbRaham, in WeTatsDyos kintsa-kwil kaha ta'apawal moshte in siwam pa nikal AbiMélek.

Takati Itsak

21 ¹In WeTatsDyos kipashalo Sara, wan okichi pa yewal yok kina kili. ²Wan Sara osti ta'apa wan okitakatilti se nikonTakat pa AbRaham katkaya kolinche, panok in tonatim omotachi yok kina Dyos kito. ³Okitokayolti AbRaham nikonTakat Itsak, in piltonte yewal okitakatilti Sara. ⁴AbRaham kikotonil nikwerit kaha mashishal nikon Itsak kwah kipiyaya chikweyi tonatim, yok kina Dyos kiliyaya. ⁵Kimani otakat nikon Itsak AbRaham kipiyaya 100 shiwim. ⁶Kwakin Sara kito: “Dyos onishpkaliti, wan moshte yehwante kimatiske wetskaske ka newal. ⁷Wan niyok kito: Ak yok tamatiskya pa AbRaham kampa Sara kichichiltiskya se nikon? Ma yok onihmak se nikon ya kolinche.”

Hagar wan Yishma'El kinkishtik pa nikal AbRaham

⁸Omo'apa Itsak wan yahmo kichichiltioya. Pa in tonat, kwah Itsak yahmo chichiyaya okichi AbRaham se mitotiliste we. ⁹Wan Sara okit kina nikon Hagar in egyptiya okitakatilti pa AbRaham kiwetskiliyaya Itsak. ¹⁰Yok Kili AbRaham:

—Shihkishti in tikipanolSiwat wan nikonTakat! Kampa nikonTakat in tikipanolSiwat amo kipiyas amoten ika nitakawaliste nokon Itsak.

¹¹ Hyero tamat AbRaham kampa Yishma'El niyok katka nikon. ¹² Ma yok Dyos kili AbRaham: “Amo hyero shitamat ka in takatYankwik ka motikipanolSiwat. Shihneltok Sara, pa mochiten kina michilis kampa ika Itsak tикиpiyas myak mokolinchim. ¹³ Niyok nikchiwas pa nikon motikipanolSiwat se pweblo, kampa mokon tewal.”

¹⁴ Mostatik, tahtanesti AbRaham, okimak ten pa kikwatosky wan se kwero temi ka at, okitalil pa niyahkwal. Wan okimak piltonte okintake pa mowikalosky. Yok panoti Hagar nehnemtinem pa in tal BérSheba pa se tal kaha tawak. ¹⁵ Otam in at pa in kwero, okital in piltonte itsinta se wiste. ¹⁶ Kwakin oy omotal wehkit, kishki wEhka asiskya se mit: “Amo nihnek nikitas in takatYankwik kimani mikis.” Wan yowatikatka Hagar i'ishpa yewal, Hagar wehwe walchok.

¹⁷ Dyos okikak kwah chokaya piltonte, kwakin nitanawatilanhel Dyos okinots Hagar pa ilwikak wan kili: “Ten mishpano, Hagar? Amo shimomapti, kampa Dyos okikak nichokaliste piltonte. ¹⁸ Shimokets shikonan nimahwa mokon, kampa newal nikchiwas pa yewal se Wepweblo.”



© 1996 David C. Cook

Hagar wan Yishma'El pa se tal kaha tawak (Ipewaliste 21:16)

¹⁹ Wan Dyos ki'ishtapol nishtololwam Hagar, wan okit se takoyonaliste ka at. Kwakin oy wan okitemilti in kwero wan okikonilti piltonte. ²⁰Dyos katka inak piltonte, wan in mo'apa; wan omochanti pa se tal kaha tawak wan oye tamotaliste ka mit; ²¹mochantiti pa se tal kaha tawak Paran kaha ninantsi okisiyawat ka se siwat pa in tal Egipto.

Taketsaliste ika AbRaham wan AbiMélek

²² Pa inik tonatim AbiMélek, oy inak Pikol, yewal niwetatakewan igwacho', oy otahto ka AbRaham wan kili:

—Dyos onka ka tewal pa mochi yewal ten tikchi. ²³Ashka shinichil, pa i'ishpa Dyos, pa amo tinishkwamana newal, wan nopolwam wan nokolinchim. Tewal amo otitakat nika kwakin shinishchiwil kwal pa in tal kina newal onimishchiwil.

²⁴ AbRaham kinankili:

—Yok nikito pa i'ishpa Dyos.

²⁵ Kwakin AbRaham ki'ahwa AbiMélek nahyewal nitakoyonaliste at yewal inintikipanolme AbiMélek kikishtilik.

²⁶ AbiMélek kinankili:

—Amo nihmat ak yok okichi in. Amoten otichil wan ashka nihmatitik.

²⁷Okinonan AbRaham baka' wan borrego', okinmak AbiMélek wan in omente kichiwak se taketsaliste. ²⁸Wan AbRaham okinonan chikome borregito', ²⁹wan AbiMélek kitah-tanili AbRaham:

—Pates tikinonan in chikome borregito'? Ten kinek kitos?

³⁰Kinankili AbRaham:

—In kinek kito kampa nimishmakas in chikome borregito'. Kampa yes kina se taneshtiliste kampa newal nitahtak nika pa nikitaskya at.

³¹Kampa yok kitokayoltik ompa in tal BérSheba, kampa ompa in omente mochiwilik se tahtoliste.

³²Ompa BérSheba kichiwak se tahtoliste. AbiMélek wan Pikol, niwetatakewan igwacho', omokwepak pa inittal in peleshteko'. ³³AbRaham okitok se kwawit itok tamarisko' pa BérSheba wan ompa yewal okinots ni'itokaliste WeTatsDyos, in Dyos amo'ik tami. ³⁴Wan AbRaham mochantiti myak shiwim ompa pa inittal in peleshteko'.

Dyos kili AbRaham pa kichiwaskya ten yewal
kineshtiliskya ta melak kineltokaya

22 ¹Kwah panok myak tonatim, Dyos kitali ta melak
taneltokaya AbRaham, wan okinots:

—AbRaham!

Wan yewal kinankili:

—Nika ni'onka!

² Wan Dyos kili:

—Shikonal mokon Itsak, yewal han tikpi yewal tiktasot,
wan shihwik pa tal MoriYah. Ompa shitateniwil, kina
tamakaliste wan shikchichin pa in se tepetLom yewal
nimishneshtilis.

³ Mostatik AbRaham kwalka omokets, okisiyat niburro
wan okinkwik ome inintikipanolme wan nikon Itsak, okwah-
kwa kwakin okonan in ot kampa Dyos kili. ⁴Panok yey ton-
tim otachi AbRaham, wan pa wEhka okit in lom. ⁵Kwakin
AbRaham kinmili inintikipanolme:

—Shimokawak nika ka in burro. Newal wan nokon tiyaske
ompa tiktankwaketsaliske Dyos, kwakin tiwalmokwepaske ka
anmehwante.

⁶ Okonan AbRaham kwawit ka kichichinoskya tamakaliste
wan kimamaltil Itsak, nikon; okonan teshoshte wan wildok
wan panotiyak.

⁷Kwakin Itsak kitakichili AbRaham:

—NoTats!

—Ten kwakin, nokon?

—Tikpiyal teshoshte wan in kwawit.

Kili Itsak:

—Kaha onka in borregit pa tamakaliste yewal tikchichinoske?

⁸ AbRaham kinankili:

—Yewal Dyos kita in borregit pa tamakaliste yewal
tikchichinoske, nokon.

Wan in omente hanse yaloya.

⁹Kwah asik kaha Dyos kitatiniwili, AbRaham kinichiko
tetelme kaha kitali in tamakaliste wan okital in kwawit. Wan
ki'ilpi nikon Itsak okital ikpak kwawit. ¹⁰Kwakin kimela
nimahwa AbRaham pa kikitskiskyia in wildok ka kimiktiskyia
nikon, ¹¹kwakin nitanawatilanhel in WeTatsDyos okinots pa in
takpakIlwikak:



© 1996 David C. Cook

AbRaham ki'ilpi nikon Itsak okital ikpak kwawit kitali kina tamakaliste pa Dyos (Ipewaliste 22:9)

—AbRaham! AbRaham!

Wan yewal tanankili:

—Nika ni'onka.

¹² In nitanawatilanhel kito:

—Amo shihmela momahwa ipa in piltonte, amoten shik-chiwil. Newal nihmat kampa timomapti pa i'ishpa Dyos, kampa timochika pa tinishmakas mokonTakat in se yewal tikpi.

¹³ Kwakin otachi AbRaham, wan okit in kwawitwiste, okit se borregit' tilintikatka pa nikahilon pa in kwawitwiste, oy okiwalik okimikti wan otemak pa tamakaliste yewal okichichin wan yok amoten okichiwil nikon.

¹⁴ Kwakin AbRaham okitokayolti in tal: “In WeTatsDyos kimakas ten moteshmonek.” Wan pa ashka yok tatakayolti: “Pa nitalTepet in WeTatsDyos kimakas ten moteshmonek.”

¹⁵ Oksep Nitanawatilanhel in WeTatsDyos okinots AbRaham pa in ilwikak, ¹⁶wan kito:



© 1996 David C. Cook

AbRaham okit se borrego tilintikatka pa nikahilon pa kwawitwiste, oy okiwalik okimikti wan otemak pa tamakaliste yewal okichichin (Ipewaliste 22:13)

—Newal in WeTatsDyos, onimo'ili wan nitemak notahtolisté, pa in ten tikchi kampa amo tishtasotil mokon in se tikpi,¹⁷ newal melak nimishmashti kwal, wan nikinmiyaptis mokolinchim yeske kina sitalme pa in ilwikak wan kina in shal pa itenko in we'at. Mokolinchim mokawiliske mochi ininWepweblo' ammotakokolinilme.¹⁸ Wan mokolinchim kiwalikaske tamashtiliste, Wehwepweblo pa mochi kishki tal, kampa otishneltok.

¹⁹ Walmokwep AbRaham kaha katkaloya inintikipanolme, wan moshte okonanak ni'ot pa BérSheba, ompa pa BérSheba omoka mochantiti AbRaham.

Ininpilwam Nahor

²⁰ Kwah panok inik tonatim, kimashtik AbRaham kilik, shikit niyok Milka okimak ininpilwam monohni Nahor.²¹ Wan kati okipewalti in takatiliste ye Uts, takwitap otakat ninohni Bus wan hani KemuEl. Yewal omochi nitats Aram,²² Késed, Hasó, Pildásh, Idelap, wan BetuEl,²³ in yewal BetuEl ye itats Rebeka. In chikweyi ininpilwam Milka okitakatilti ka Nahor, ninohni AbRaham.²⁴ Niyok kipiyaya okse siwat Nahor, itoka Rehumá, okitakatilti Teba, Gáham, Tahash wan Maká.

Miki wan kitapachol Sara

23 ¹Yolti Sara 127 shiwim, ²omik Sara pa in Wepweblo Kiryat-arbá, yewal itok Hebrón, pa in tal Kanán. AbRaham oy okichokil Sara. ³Kwah AbRaham otam okichokil nimihki Sara oy otahto ka heteteto' kinmili:

⁴—Newal amo nika ika anmehwante; shinishnamakiltik tipit anmolatal kaha niktapacho nomihki.

⁵ Inik heteteko' kinankilik AbRaham:

⁶—Tats, shitishkak; ka tehwante tewal se niwe Dyos, shikta-pach momihki pa in se tokweba yewal kwal, nimichilis kampa tihnikil pa tiktapachos momihki Teshkalkoyonke.

⁷AbRaham omokets, omotankwakets pa i'ishpa heteteko' in pweblo pa in tal, ⁸kinmili:

—Ta ankat ka se tahtoliste ka anmehwante kampa newal niktapachos nomihki, shinishkakik wan shiktahtanik Eprón nikon Tsohar pa newal ⁹pa nishnamakiltis in kweba Makpela, yewal onka itenko nital. Shiktahtanik pa nishnamakiltis newal nitashtawas pa kishki kineki, pa yok nikpiyas kaha tikintapa-choske tomihmiki.

¹⁰In Eprón katka ompa, tsala in heteteko', ompa yowati-katka pa i'ishpa in heteteko wan moshte inik kalakilo kaha tatapoli pa in Wepweblo kinankili AbRaham wan kili:

¹¹—Amo, Tats newal, shinishkak. Nimishmak in kwahmil wan in kweba niyok yewal onka kalitik. Pa moshte ninishpa, inik masewalme nimishmak. Shiktapach momihki.

¹²Kwakin AbRaham motsinkwep ka tamawishtiliste i'ishpa in masewalme pa in tal, ¹³pa ininishpa in masewalme pa in tal kinankili Eprón, kili:

—Shinishkak, newal nitashtawas kishki ka tihnamak in kwahmil. Kwakin niktapachos ompa nomihki.

¹⁴Eprón kinankili AbRaham wan kili:

¹⁵—Tats newal, shinishkak. In tal nihnamak ka 400 tomiplata. Kwal onka in ka tewal wan newal? Shiktapach momihki.

¹⁶Kwakin mokawak ka se tahtoliste AbRaham ka in tomi kili Eprón, wan kitamachiwilik kishki tomiplata kina okital Eprón, wan kikakik ininpilwam het: Katkaloya 400 tomiplata, kati takowaloya wan tanamakaloya pa in tal.

¹⁷Yok kikowil kwahmil Eprón ompa Makpela, amo wEhka katka nital Mamré, in kinek kito, in kwahmil ka in kweba yewal katka pa yewal wan mochi kwawim yewal katka-loya pa in tal. ¹⁸Ashka katka nikwahmil AbRaham, kimati-loya ininpilwam heteteko' wan moshte yewal asiloya pa in Wepweblo kitak kampa melak AbRaham omokowil. ¹⁹Kwah otam in, kwakin okitapach AbRaham nisiwa, Sara, pa in kweba nikwahmil pa Makpela amo wEhka katka nital Mamré, yewal pa in pweblo Hebrón, pa in tal Kanán. ²⁰Wan in kwahmil wan in kweba yewal ten takatka motakawil AbRaham, inik okinamakiltik heteteko'.

AbRaham kitemoli siwat Itsak

24 ¹AbRaham katka kolinche kipiyaya myak shiwim, wan in WeTatsDyos kimashti kwal pa mochiten. ²Wan AbRaham kili se nitikipanol yewal kolinche katka pa nikal, wan yewal niwetatakewan katka pa mochi nitomi wan pa kishki tapirooya icha wan moshte tikipanolme:

—Shiktal momahwa itsinta nopyerna, ³melak shinichil pa i'ishpa in WeTatsDyos, in Dyos pa in ilwikak wan in tal amo tikonanilis se siwat kananeyo', ka nokonTakat nika kaha

timochantil tehwante ⁴Kampa tiyas pa notal, ka nonohniwan wan ompa tikonanilis se siwat pa nokon Itsak.

⁵NitikipanolTakat kinankili:

—Ten nikchiwas ta in siwat amo kinek walas nonawak pa in tal? Tihnek pa nihwikas mokon pa in tal kaha otikis?

⁶Wan AbRaham kili:

—Amo'ik shihwik nokon ompa. ⁷In WeTatsDyos, in Dyos pa in ilwikak, onishkishti pa nikal notats wan pa nital ka nonohniwan, yewal isel onishtakichil wan ka tahtol melak nichili in tal nikanmakas mokolinchim, yok yewal kiwaltitanis nitanawatilanhel pa ta'ishpa tewal wan ompa tikonanilis se siwat nokon. ⁸Ta amo kinek walas in siwat monak, timokawas tamakawal ka in tahtol yewal otinichil; amo shihwik ompa nokon!

⁹Kwakin nitikipanol okital nimahwa itsinta nipyerna AbRaham, niwetatakewan wan kichiwil tahtol melawak.

¹⁰Kwakin okinonan matahti ikameyo' niwetatakewan, wan panoti pa ni'ot kiwikaya ka yewal myak tatemakaliste in miyak kostaro yewal kipiyyaya niwetatakewan, wan asi-

loya pa Wepweblo Nahor pa MesoPotamya. ¹¹Okichi kampa motankwaketsaloskya kameyo' pa kiyawak in Wepweblo.

Kaha temtitkatka at katka tyotak, kwah kisaloya in siwam pa ta'onanaloya at. ¹²Kwakin kito: "WeTatsDyos, niDyos nowetatakewan AbRaham, shinishmakawalti pa kisas kwal, in yewal nikchiptik ashka wan shikihnil nowetatakewan

AbRaham. ¹³Shichit nika, inak in nalkistik at, ashka

ininpilwam in takam pa in Wepweblo kisal pa ta'onanaske.

¹⁴Shihmakawalti yewal in siwatYankwik yewal newal nikili: "Shinishihnil, shiktemo mokom pa nikonis at", wan yewal nishnankilis: "Shikon, wan nikinahmakas mokameyo'", ma ye in siwatYankwik yewal tewal tikonanilis pa motikipanol Itsak. Yok nihmatis kampa tewal tikihnilitik nowetatakewan."

¹⁵Kwah ayamo'ok tamiyaya kitahtaniyaya Dyos omoneshti Rebeka, kiwalikaya nikomi pa niyahkwal. Rebeka katka nikonSiwat BetuEl, yewal katka nikonTakat Milka nisiwa Nahor, yewal ninohni AbRaham. ¹⁶In siwatYankwik kwal tachiyaya, ayamo motekaya ka ni se takat, yewal temo kaha ta'onanal at, kitemilti nikom, wan walmokwep, ¹⁷in tikipanol omotal kaha yewal wan kili:

—Shinishmak tipit at pa nikonis pa mokomi?

¹⁸Kili:

—Shikon tats.

In siwatYankwik hani kitemowi ikomi wan oki'ahmak.

¹⁹Kwah otam okinahmak, kili:

—Niyok nikinahmakas mokameyo' pa takoniske.

²⁰Motaloti okinok in at kaha takoniloya yolikilme, yawiya wan walmokwepaya wan ta'onanaya pa takonilosky in kameyo'. ²¹In takat omoka kitatik in siwatYankwik, amo nawatiyaya, pa kimatsikya ta in WeTatsDyos okichi pa kisaskya kwal pa ni'ot ka ten oval.

²²Kwah tamik takonik in kameyo', in takat okimak se anijo tachiwal ka oro yetik katka ka chikwase gramo', niyok kimak ome yahyawaltik, tachiwal ka oro yehyetik kina 100 gramos.

²³Kwakin kili:

—Akyewal motats wan kipi motats kaha tikochiske in tayo?

²⁴Wan yewal kinankili:

—Newal nikon BetuEl, yewal nikon Milka yewal kipi ka Nahor.

²⁵Wan niyok kili:

—Tikpiyal miyak tasol wan sakat, niyok tikpiyal kaha anpanoske in yowal.

²⁶Kwakin in takat motankwakets wan kimashti in WeTatsDyos, ²⁷wan kito: "Ma ye ka tamawishtiliste WeTatsDyos, yewal niDyos nowetatakewan AbRaham, amo'ik ki'ilka nowetatakewan ki'ihnili, wan melak onishwalik pa ot pa inikal niparyente nowetatakewan."

²⁸Rebeka motalo pa nikal ninantsi, wan kitakichili ten kipan. ²⁹Yewal kipyia se ninohniTakat itoka Labán, wan yewal oy okinamik in takat, yewal omoka ompa kaha nalkistikatka at. ³⁰Kwah kinmitatikatka in anijo wan in yahyawaltik pa nimahwa ninohniSiwat, wan takaktikatka kina taketstikatka ninohniSiwat kina kitowaya in takat. Labán oy okit in takat, wan moketstikatka ika kaha ta'onanal, ka nikameyo'!

³¹Kwakin kili:

Tamashti in WeTatsDyos! Pates timoketstik nika kiyawak? Nikpi in kal kaha anmosewiske wan niyok in kameyo'!

³²In takat oy pa in kal, wan Labán kintatemowili in kameyo', wan kinmak tasol wan sakat, in takat wan inik yaloya inak kinmak at pa kinpakalosky nikshiwam. ³³Kwah kikishtilik takwal pa takwalosky, yewal kinmili:

—Ayamo'ok nitakwas ta ayamo annimichilis in yewal ten nikitos.

Wan Labán kili:

—Shitahto.

³⁴In takat kito:

—Ninewal nitikipanol AbRaham. ³⁵In WeTatsDyos kimashti miyak nowetatakewan wan yewal kimak myak borrego', baka', plata wan oro, tikipanolmeSiwam, tikipanolmeTakam, kameyo' wan burro'. ³⁶Sara, nisiwa nowetatakewan, kipi se nikonTakat yok kolinche, wan nowetatakewan nikon okinmak mochiten yewal tapiro. ³⁷Wan nowetatakewan onishchiwalti melak pa ni'ishpa Dyos, wan nichili: "Amo shiksiyawat nokon ka ininpilwam Kananeyo', nika kaha timochantil. ³⁸Tiyas pa nital notats wan nonohniwan, wan ompa tikonanilis siwat nokon." ³⁹Kwakin nowetatakewan nikili: "Wan ta in siwat amo kinek walas nonawak?"

⁴⁰Kwakin yewal nishnankili: "Newal hanse ninehnemtinem ka in WeTatsDyos, yok yewal kiwaltitanis nitanawatilanel ka tewal, pa kisa kwal pa mo'ot wan tikonanili nokon se nisiwa ka nonohniwan wan pa nikal notats. ⁴¹Yok titamakawal tiyes ka tahtol melawak, ta oti ka notiyahwan, wan yehwante amo mishmakal in siwatYankwik, kwakin titamakawal timokawas ka notahtol melawak."

⁴²"Ashka kwah ni'as ka ta'onanal, nikito:

'WeTatsDyos, niDyos nowetatakewan AbRaham, ta tewal tihnek, shikchi pa kisas kwal notikipanoliste yewal newal nikchiwas.'

⁴³Nika ni'onka ashka, ika in at kaha ta'onanal. Ta wal se siwatYankwik pa in pweblo pa ta'onanas wan nikilis:

'Shinishmak tipit at pa mokomi,' ⁴⁴ta yewal nishnankili: 'Shikon wan niyok nikinwikilis at pa ankoniske kameyo', ma yes in siwatYankwik yewal in WeTatsDyos ki'onanil pa nikon nowetatakewan."

⁴⁵Ayamo'ok nitamiyaya niktahtaniyaya Dyos pa'itik noyol, onikit Rebeka walaya ka nikomi pa niyahkwal. Wan temo kaha ta'onanal, ta'onanaya. Kwakin nikili: "Nimishtahtani, shinismak tipit at." ⁴⁶Haniman yewal kitemo nikomi wan nichili: "Shikon, wan niyok nikinahmakas mokameyo!" ⁴⁷Kwakin niktahtanili: "Akyewal motats?" Yewal nishnankili: "Newal

nikon BetuEl, yewal nikon Nahor yewal kipi inak Milka.” Kwakin onktalil in anijo pa niyakatsol wan in yahyawaltik pa nimahwam,⁴⁸ hani nimotankwakets wan niktahtolti in WeTatsDyos nowetatakewan AbRaham, kampa yewal melahka nishwalik pa in ot, pa nikonanas nikonSiwat ninohni nikal pa yes nisiwa.⁴⁹ Wan ashka, ta amehwante ankinekil ki'ihniliske nowetatakewan, shinichilik. Wan ta amoyok shinichilik niyok, pa nihmatis kina nikchiwas.

⁵⁰Labán wan BetuEl kinankilik:

—Mochi okichi in WeTatsDyos, wan amokwal ten tikitoske ta kwal wan amokwal.⁵¹ Nika onka Rebeka; shikonan wan shihwik ma yes nisiwa nikon mowetatakewan, yok kina kito in WeTatsDyos.

⁵²Kwah nitikipanol AbRaham, kikak ten kilik, mopa-cho pa in tal pa i'ishpa in WeTatsDyos.⁵³ Kwakin in tikipanol okinkishti tachiwalme ka oro wan plata wan shashalme kwahkwalme, okinmak Rebeka. Niyok okinmak ninohni Labán wan ninantsi Rebeka.⁵⁴ Hani yewal wan in takam yehwante yaloya inak otawkak wan otakonik, wan ompa omokawak in yowal.

Mostatik, watsinkit moketsak, wan in tikipanol kinmili:

—Shinishkwepak newal ka nowetatakewan.

⁵⁵Wan ninohni wan ninantsi kinankilik:

—Ma moka in siwatYankwik ka tehwante pa matahti tonatim, kwakin panotiyas.

⁵⁶Wan yewal kinmili:

—Shinishkawak pa niyas. Kampa in WeTatsDyos okichi pa kisaskya kwal in ka ten niwal. Shinishtakewak pa no'ot pa niyas ka nowetatakewan.

⁵⁷Kwakin yehwante kinankilik:

—Ma tihnotsak in siwatYankwik ma tiktahntanilik yewal.

⁵⁸Wan kinotsak Rebeka wan kitahtanilik:

—Tiyas inak in takat?

Wan yewal tanankili:

—Nihnek niyas inak yewal.

⁵⁹Wan yok panoti Rebeka inak in tikipanolSiwat yewal ki'apa wan niyok nitikipanol AbRaham wan inik tikipanolme.

⁶⁰Wan Rebeka kimashtik yok:

“TonohniSiwat ka tehwante:

ma yes ninantsitsi ka myak wan myak masewalme!



© 1996 David C. Cook

*Nitikipanol AbRaham walmokwepaya
inak Rebeka (Ipewaliste 24:61)*

wan mokolinchim, ma kintanilik
inik Wehwepweblo' ka anmotakokolilme!"

⁶¹Kwakin omokets Rebeka, inak nitikipanolmeSiwam wan
omotalik pa kameyo' wan okitokak in takat tikipanol, yewal
kati okonan Rebeka wan panoti.

⁶²Itsak, yewal mochantiyaya pa Négeb, walmokwepaya
pa in ta'onanaliste itoka Beer-Lahay-Roy in kinek kili:
"Takoyonaliste Dyos yewal yoltik wan nichit." ⁶³Katka tyotak
wan Itsak oyaya nehnemiya ka tashosholtik, kwah otachi wan
okinmit kameyo' astiwalaloya. ⁶⁴Rebeka niyok otachi wan okit
Itsak, otem pa in kameyo, ⁶⁵wan kitahtanili in tikipanol:

—Akyewal in takat yewal nehnem pa in tashosholtik. Wan
tishnamiktiwal?

In tikipanol kinankili:

—Yewal nowetatakewan.

Okonan Rebeka se tukuru belo wan motsawkili nishayak.

⁶⁶Wan in tikipanol kitakichili Itsak mochiten okichi.

⁶⁷Kwakin Itsak okonan Rebeka wan okiwalik ka nikal ninan-
tsi Sara, in kal tachiwal ka shashal tilawak wan yok omo-
namikti ka Rebeka wan Itsak kitasot miyak. Wan yok Itsak
moyolse kampa moyolkokotikatka kampa mikiya ninantsi.

Nikolinchim AbRaham wan Keturá
 (Ip.ⁱ 25:1-4) (1Ta-m.^j 1:32-33)

25 ¹AbRaham okipi okse siwat, yewal itoka Keturá.

²Yewal okintakatilti Simrán, Yokshán, Medán,
 Midyán, Yishbak wan Súa.

³Wan Yokshán oye nitats Shebá wan Dedán.

Nikolinchim Dedán yek in ashurteko', in letusheyó' wan in
 lehumeyo'.

⁴In ninpilwam Midyán yek Epá, Éper, Henok, Abida wan
 Eldá, moshte inik yek ininpilwam Keturá.

⁵Wan AbRaham kimak Itsak mochiten nitakawaliste.

⁶Ininpilwam ka oksek ininsiwam, AbRaham okinmak
 nitemakaliste kwah ayamo'ok mikiyaya wan okintitan wEhka
 kaha takis in tonat, pa amo yeloskya kaha Itsak.

⁷Mochi in shiwim yoliyaya AbRaham kipiyaya 175 shiwim,

⁸wan AbRaham omik we, kwal katka, ka myak shiwim, wan panoti
 ka niwichalme yehwante mikik. ⁹In omente ininpilwam Itsak wan
 Yishma'El kitapachok pa in koyonkekweba Makpela, katka nikwahl-
 mil Eprón nikon Tsohar, in heteteko, wan onka kaha waltakis tonat
 pa Mamré. ¹⁰In kwahmil omokowil AbRaham ka inik heteteko'.

Wan ompa kitapachok AbRaham kaha yewal kitapachowaya Sara
 nisiwa. ¹¹Kwah omik AbRaham, Dyos kimashti nikon Itsak, wan in
 moka mochantiti ka takoyonak yewal kitokayolti Beer-Lahay-Roy in
 kinek kili: "Takoyonaliste Dyos yewal yoltik wan nichit."

Nikolinchim Yishma'El
 (Ip. 25:12-16) (1Ta-m. 1:29-31)

¹²Ina yewal nikolinchim Yishma'El, nikon AbRaham yewal
 kipi inak Hagar, in egiptiya yewal nitikipanolSiwat Sara.

¹³Ni'itokalme ininpilwam Yishma'El, okintokayoltik kina
 takatik: Nebayot, yewal oye nikon ta'ishpa Yishma'El, takwi-
 tap otakat Kedar, AdBel wan Mibesam, ¹⁴Mishemá, Dumá,
 Masá, ¹⁵Hadad, Temá, Yetur, Napísh wan Kedemá. ¹⁶Inik
 ininpilwam Yishma'El, wan ni'itokalme nipweblo wan nikalme
 tachiwalme ka shashal tilawak: 12 tatakewalme, pa sesen kat
 ininpweblo'.

ⁱ 25:0 Ip. in kinek kito: Ipewaliste/Genesis.

^j 25:0 1Ta-m. in kinek kito: 1 Tapowaliste melawak/1 Cronicas.

¹⁷Yishma'El yolti 137 shiwim. Kwakin okonan i'ihyo wan omik, wan oy monamik ka niwichalme yehwante mikik. ¹⁸Wan miki pa iminishpa ka moshte ninohniwan. Wan yishma'elteko' mochantitikatkaloya pa in tal Hawilá wan asik pa Shur, kwah se wal pa Asirya. Moka i'ishpa in tal Egipto.

Nitakatiliste Yakob wan Esa'ú

¹⁹Inik nikolinchim Itsak, nikon AbRaham: AbRaham okitakatilti Itsak. ²⁰Itsak kipiyaya 40 shiwim kwah omonamikti inak Rebeka, nikon BetuEl wan ninohniSiwat Labán inik aramteko' mochantiloya pa Padán-aram. ²¹Itsak kitahtani in WeTatsDyos pa Rebeka, nisiwa, kampa amokwal kinpiyaskya ininpilwam. Wan in WeTatsDyos okikak Itsak in ten kitah-tan, wan yewal o'osti ta'apa. ²²Wan ininpilwam mo'onanaloya pa itik yewal, yok yewal kito ta in yok, "Pates kwakin niyoltik?" Kwakin oy otahto inak WeTatsDyos ²³Wan kinankili in WeTatsDyos:

"Ome mopilwam tикинапти;
ome pweblo' yeske tashelolme pa tewal.

Se pweblo yes ka miyak chikawaliste wan in okse amoyok
miyak kipiyas chikawaliste,
wan in yewal takati ta'ishpa kitikipanolis ninohni
tipichi."

²⁴O'as in tonat pa takatiskya, wan katkaloya omente pa'i-tik yewal. ²⁵Yewal ta'ishpa okis katka chichiltik, mochi ikwerpit kipiyaya nitohmi okitokayoltik Esa'ú. ²⁶Takwita-pit otakat ninohni, kikitskitiwalaya nikshi ninohni Esa'ú. Wan okitokayoltik Yakob. Itsak kipiyaya 60 shiwim kimani okintakatilti Rebeka.

²⁷Mo'apawak piltontim. Wan Esa'ú oye takat pa in tasho-sholtik wan ta'asiyaya ka mit, wan Yakob oye takat ka sewiliste momatiya ni'icha. ²⁸Itsak kitasotaya Esa'ú, kampa kikwaya nita'asil; wan Rebeka kitasotaya Yakob.

²⁹Se tonat, Yakob kiyokshititikatka takwal, wan Esa'ú astiwalaya pa in kwawim siyaptiwalaya.

³⁰Kili Yakob:

—Nimishtahtani shinishmak tipit motaposonal chichiltik, kampa nimayantiwal wan hyero nisyaptiwal. Kampa yok kitokayolti Edom.

³¹Yakob kinankili:



© 1996 David C. Cook

Esa'ú kinamak nitamawishtiliste nitakatiliste ta'ishpa (Ipewaliste 25:34)

—Nimishmakas ta tinishnamakiltis motamawistiliste ka motakatiliste in ta'ishpa.

³²Esa'ú kito:

—Inik nimikti ka mayanaliste. Ten monots takatiliste ta'ishpa?

³³Wan Yakob kito:

—Shinichil ka tahtol melawak ashka.

Wan Esa'ú kili ka tahtol melawak Yakob wan kinamakilti nitakatiliste ta'ishpa. ³⁴Kwakin Yakob, okimak Esa'ú pan wan nitaposonal ka lenteha'. Wan otakwa, otakon wan opanoti.

Yok amo oki'ihit Esa'ú kina nitakatiliste ta'ishpa.

Itsak pa Gerar

26 ¹Pa inik tonatim katka mayanaliste pa in tal, oye okse mayanaliste pa inik tonatim kwah AbRaham yoltikatka. Yok oy omochanti Itsak pa Gerar, inak AbiMélek ininwe in peleshteko'. ²In WeTatsDyos omoneshti wan kili: "Amo shitem pa Egipto. Shimochanti pa in tal kaha nimichilis. ³Shimochanti pa in tal kina se pashaloliste, wan newal niyes ka tewal wan nimishmashti. Tewal wan mokolinchim nikinmakas mochi in tal, wan yok nikchiwas in ka tah-tolme melawak yewal ten nikili pa ni'ishpa motats AbRaham. ⁴Nikinmiyaptis mokolinchim kina sitalme pa in ilwikak, wan

mokolinchim nikinmakas mochi in talme. Moshte pweblo' pa in mochital yeske tamashtinilme ika mokolinchim,⁵ kampa AbRaham onishneltok wan okichi ten oniktake, yoliyaya ka notamashtiliste pa notahtolme wan nishneltok mochi notamashtiliste."

⁶ Wan yok Itsak moka mochantiti pa in tal Gerar. ⁷Inik takam yehwante ompa mochantiloya kitahtanililoya ka nisiwa wan yewal kinankili, in siwat nonohnisiwat. Wan momaptitkatka pa kinmiliskya yewal nosiwa, kampa tamatiya nishmiktiske kampa kinekiske konanaske Rebeka kampa yewal kwal tachiyaya.

⁸ Kipiyaya myak tonatim ompa, kimani AbiMélek, ininweRey in peleshteko', tachishtikatka pa se tatapoli, okit kampa Itsak kinapalotikatka nisiwa Rebeka. ⁹Kwakin AbiMélek otatake pa kinotsaloskya Itsak wan kili:

—Yok kampa yewal melawak mosiwa! Pates kwakin, tikito kampa yewal monohnisiwat?

Itsak kinankili:

—Newal nitamat ika yewal nishmiktiloskya.

¹⁰ AbiMélek kili:

—Pates yok otishchiwil in? Pa tipit hanya motekaskya se takat ka mosiwa, wan titishchiwiliskya se ta'ihtakoliste!

¹¹ Kwakin AbiMélek otatake pa kimatiloskya pa mochi in pweblo:

—Ta ak amokwal kichiwili in takat wan nisiwa, in takat mikis.

¹² Itsak otatok pa in tal wan WeTatsDyos kimashti, pa in shiwit kipishka 100 pa mochi sesen. ¹³Wan mochi ka miyak tomi, wan ka miyak chikawalist. ¹⁴Okinpi myak borrego', baka' wan myak inintikipanolme, inik peleshteko' amokwal kitak kampa kinekiloya tapiyaloskya kina yewal tapiyaya.

¹⁵ Moshte takoyonalme pa inik tonatim ka AbRaham, nitats, kinkoyonaloya inintikipanolme, inik peleshteko' kintapacholoya wan kintemiltililoya ka tal. ¹⁶Kwakin AbiMélek kili Itsak:

—Ya shi oksela kampa tewal titapi miyak mochikawalist ka tehwante.

¹⁷Kwakin Itsak panoti, wan okital nikal tachiwali ka shashal tilawak pa in tal ishtawak pa Gerar, wan ompa omoka mochantiti. ¹⁸Oksep kinishtapok in takoyonalme ka at pa inik tonatim ka AbRaham, nitats kinishtapoloya wan kwah

omik AbRaham inik peleshteko' kintapacholoya, wan oksep okintokayolti kina nitats kintokayoltiya.

¹⁹Se tonat, inintikipanolme Itsak takoyanak, wan okitak nalkistikatka at. ²⁰Kwakin inik takwitawilme borrego' in Gerar mokwalantik ka inintakwitawilme borrego' Itsak, kampa kitoloya. In at ka tehwante kampa Itsak okitokayolti in takoyonaliste "Esek" in kinek kito momiktik, kampa momiktik ika yewal. ²¹Takoyonak oksela, wan niyok kwalanik peleshteko'. Itsak okitokayolti "Sitna".^k ²²Panoti wEhka pa okse tal wan amo'ak okwalan yok kwakin okitokayolti Rehobot, kito: "Ashka in WeTatsDyos tishmakawalti pa titapiyaske mochiten pa in tal."

²³Wan ompa Itsak panoti pa BérSheba. ²⁴Pa in yowal omonesti WeTatsDyos wan kili:

"Newal niDyos motats AbRaham.

Amo shimomapti, kampa newal ni'onka ka tewal.

Pa ika notikipanol AbRaham,
newal nimishmashti wan nikinmiyaptis mokolinchim."

²⁵Itsak kinichiko tetelme pa kitaliskyta tamakaliste wan okinots ka ni'itokaliste WeTatsDyos, ompa okital nikal tachiwali ka shashal tilawak wan inintikipanolme takoyonak pa kitaloskyta at. ²⁶Pa inik tonatim AbiMélek walaya pa Gerar, pa tahtoskyta inak Itsak. Wan kitokatiwalaya ninihni ka wetamatiliste Ahusat wan niyok Pikol, niwetatakewan nigwacho. ²⁷Wan kinmili Itsak:

—Pates anwalak ka newal? Kampa anmehwante annishkwalanilil, wan annishkishtik ika anmehwante.

²⁸Yehwante kinankilik:

—Ashka tikitak kampa WeTatsDyos onka ka tewal, kwa-kin timo'ilik: Ma ye se tahtoliste melawak ika tehwante, ika tewal wan tehwante. Tihnekil tikchiwaske se taketsaliste ka tewal, ²⁹kampa tewal amoten titishchiwili, tehwante amoten timishchiwilik, yok kina tehwante amoten timishchiwilil. Tehwante han timishchiwilik kwal, wan timishtakewak pa tiyas ka mosewiliste, wan ashka tewal mishmashtitik in WeTatsDyos!

³⁰Kwakin Itsak kichi se mitotiliste, wan yehwante takwak wan takonik. ³¹Mostatik tahtanesti kwalka moketsak wan se

^k 26:21Sitna in kinek kito: momiktiliste.

ka okse mo'ilik ka tahtol melawak. Kwakin Itsak okintake pa ni'ot wan yehwante mowikak ka sewiliste.

³² Pa in tonat walak inintikipanolme Itsak oyak kinawatik ka in takoyonaliste yewal kikoyontikatkaloya, wan kilik:

—Otikitak at!

³³ Itsak okitokayolti in takoyonaliste Shebá, kampa yok itok in Wepweblo' BérSheba wan pa ashka yok kitokayolti.

Itsak kimashti Yakob

³⁴ Kwah Esa'ú kipiyaya 40 shiwim, kimani monamikti ka se siwat itok Yehudit nikon Berí in heteteko', wan niyok monamikti ka Bashemat nikon Elón in heteteko'. ³⁵ Wan yehwante omente ininsiwam kinkokolti miyak Itsak wan Rebeka.

Yakob okonan nitamashtiliste Itsak

27 ¹Se tonat kwah kolinche katka Itsak yahmo tachiyaya. Okinots pa walaskya Esa'ú nikon we kili:

—Nokon.

Kinankili Esa'ú:

—Nika ni'onka.

² Itsak kili:

—Shichit ya nikolinche wan amo nihmat pa ten tonat nimikis. ³ Ashka, shikonan momit, wan motawitol shi kaha tashosholtik shi shita'as pa newal. ⁴ Shinishyokshitil takwal kwal welik yok kina newal nihmat nikwa, wan shinishwalikil pa nikwas. Yok newal nimishmashtis kampa ayamo'ok nimiki.

⁵ Kwah Itsak tahtotikatka inak nikon Esa'ú Rebeka takaktikatka. Wan Esa'ú oy pa tashosholtik pa ta'asiskya wan kiwalikaskya, ⁶ kwakin Rebeka oy otahto ka nikon Yakob wan kili:

—Onihkak motats tahtotikatka inak monohni Esa'ú ⁷shita'as wan shinishwalikil shinishyokshitil pa newal nikwas. Wan nimishmashti i'ishpa in WeTatsDyos kampa ayamo'ok nimiki.

⁸ Yok ashka, nokon shinishkak kwal, wan shikchi kina nimichilis.

⁹ Shi kampa kat in chibo' wan shinishwalikil ome chibito', pa yok nikyokshitilis motats kina yewal kinek. ¹⁰ Kwakin tihwkilis motats pa kikwas pa yok yewal mishmashtis ashka kampa ayamo miki.

¹¹ Yakob kili ninantsi Rebeka:

—Nonohni kipi miyak nitohmi wan newal amo nikpi notohmi. ¹² Ta nishkitski notats, kwakin tamatis kampa

nihwetskilitik yewal, kwakin nikchiwas pa amokwal nishyaptiyas wan yok amo nishmashtis.

¹³ Wan ninantsi kinankili:

—Nokon newal, ma ye pa newal ten amokwal mishyas. Shikchi kina nimichili. Shinishwalikil in chibito'.

¹⁴ Yakob oy okinwalik chibito' wan okinwikil ninantsi, wan yewal kinyokshit, kina kimat kikwa Itsak. ¹⁵ Kwakin Rebe-ka okonan nishashalme Esa'ú nikon we, nishashalme kwah-kwalme yewal kipiyaya pa in kal, wan ka yewal okitakemilti Yakob nikon tipichi. ¹⁶ Kipepechol nikwero chibito' pa nima-hwam wan pa nikich Yakob kaha amo kipiyaya nitohmi. ¹⁷ Wan okimak pa nimahwam Yakob, nikon, in takwal wan in pan yewal okiyokshitil.

¹⁸ Kwakin Yakob oy okit nitats wan kili:

—Tats!

Itsak kinankili:

—Nika ni'onka. Ak tewal, nokon?

¹⁹ Yakob kili nitats:

—Newal ni'Esa'ú, mokon we. Onikchi kina tinichili. Shimo-kets, shimalt, shitakwa yewal ten nita'as pa yok tishmashtis.

²⁰ Itsak kili nikon:

—Kina haniman otikit, nokon?

Yakob kinankili:

—Kampa in WeTatsDyos nishpale pa nikitaskya.

²¹ Itsak kili Yakob:

—Pa nkek shimochi nokon, pa nimishkitski pa nihmati ta melak tewal nokon Esa'ú wan amo tewal.

²² Yakob motali ka Itsak, nitats, wan yewal kikitski wan kito:

—Nitahtoliste in Yakob. Ma nimahwam kat kina Esa'ú.

²³ Wan amo ki'ishmat kampa nimahwam kipiyaya nitohmi kina ninohni Esa'ú. Yok okimashti ²⁴kitahtanili:

—Melak tewal nokon Esa'ú?

Yakob kinankili:

—Haha, ninewal.

²⁵ Kito niyok Itsak:

—Shinishwalikil mota'asil, nokon pa nikwas, pa nimishmashtis.

Wan Yakob okiwalikil wan otakwa nitats wan okiwalikil nihugoUbaBino, wan okon. ²⁶ Kwakin Itsak kili:

—Ashka, nokon, pa nkek shimochi, wan shinishtenamik.

²⁷Yakob mo'asilti wan kitenamik. Kimani Itsak kinehnekwi nishashalme, kwakin kimashti:

“Shikit, kina ahwiyak nokon

kina ahwiyak tashosholtik yewal in WeTatsDyos kimashti.

²⁸ Yewal Dyos ma mishmak in ahwishti pa in ilwikak takpak; wan miyak tapishkaliste pa in tal wan miyak trigo wan miyak nihugoUbaBino.

²⁹ Ma mishtikipanolik masewalme pa in pweblo; wan ma motankwaketsak moshte pa in mochital pa mo'ishpa.

Shiye wetatakewan pa monohniwan; wan pa mo'ishpa ma motankwaketsak ininpilwam monantsi.

Ma yek amokwal yehwante amokwal mishnotsilil.

Wan ma kinmashti yehwante kwal mishmashtil.”

³⁰ Kimani otam Itsak okimashti Yakob, wan anok kisaya Yakob pa i'ishpa nitats, ninohni Esa'ú walmokwepaya pa in ta'astiliste. ³¹ Niyok yewal kiyokshitil kiwikil nitats wan kili:

—Shimotal, tats, wan shikwa in ten mokon ta'as, pa tishmashtis.

³² Itsak, nitats, kili:

—Ak tewal?



© 1996 David C. Cook

Itsak kimashti Yakob (Ipewaliste 27:29)

Wan yewal kinankili:

—Ninewal Esa'ú, mokon we.

³³ Wan Itsak amo kimat ten kitoskya wan ka moyoyokaliste, kito:

—Wan akyewal oval nika, wan okiwalik nita'asil? Wan onishmak takwaliste mochi in kwah ayamo'ok ti'asiyaya, wan newal nihmashti, wan kipi tamashtiliste.

³⁴ Kwah Esa'ú okikak nitahtoliste nitats, wehwe tsatsi wan miyak moyokolti kito:

—Shinishmashti niyok newal, notats!

³⁵ Kili Itsak:

—Owal monohni wan omishkwaman okonan motamashtiliste.

³⁶ Esa'ú kinankili:

—Melak yewal kinek kili kina itok Yakob! Yewal takwaman! Onishkwahkwaman sehpá wan oksep! Onishkishtil in yewal notakatiliste ta'ishpa wan ashka onishkishtil nota-mashtiliste! Kwakin kitahtanili, kili:

—Amo otinishkawil newal se tamashtiliste?

³⁷ Itsak kinankili Esa'ú:

—Onikchi pa yewal yes mowetatakewan tewal wan oniktal pa moshte ninohniwan pa yeske inintikipanolme, wan melak kipyas miyak trigo wan nihugoUbaBino. Ashka ten kwal nik-chiwas pa tewal nokon?

³⁸ Esa'ú kinankili nitats:

—Notats, hanwel tikpi se han tamashtiliste? Shinishmashti niyok newal, notats!

Kwakin walchok wehwe Esa'ú. ³⁹ Kwakin nitats yok kinankili:

“Yes mokal kaha takwak amo'ik tiyes pa in tal temak miyak tapishkaliste,

wan wEhka ka in ahwishti pa in ilwikak.

⁴⁰ Ka momachet timopalewis,
wan tiktikipanolí monohni.

Kwah tichikawiyas kina se we,
kwakin yok timokishtilis ka yewal.”

Yakob cholowaya pa nikal Labán

⁴¹ Esa'ú hyero kikwalanil Yakob kampa nitats kimashti wan mo'ili pa niyol: “Astiwalal in tonatim kwah tikchokiliske notats. Kwakin nihmiktis nonohni Yakob.”

⁴² Wan Rebeka otakak kina Esa'ú kitowaya pa kichiwaskya, kwakin otatitan pa kinotsaloskya Yakob nikon tipichi kili:

—Shikit monohni Esa'ú moyolseptik kampa tamatitik mishmiki. ⁴³ Yok ashka shinishkak, nokon, shichol pa nikal nonohni Labán yewal mochanti pa Harán. ⁴⁴ Shimochanti ompa sek tonatim, pa kimani as moyolsewis monohni. ⁴⁵ Kwah yahmo kwalantiyas monohni ka tewal, kwah ki'ilkawas ten tikchiwil, kwakin tiwalmokwepas. Kampa amo nihnek annimishpolos ammehwante omente nopolwam pa se tonat?

⁴⁶ Kwakin Rebeka kili Itsak:

—Amo niyoltik ka pakiliste, kampa in siwam heteteko' yehwante mochantil nika pa in tal. Ta Yakob omonamikti ka se siwat heteteko', amo nihnek pa niyoltyias!

28 ¹Kwakin Itsak okinots Yakob, kimashti wan niyok in okitake:

—Amo shimonamikti ka inik siwam pa in tal Kanán. ² Shi pa Padán-aram pa nikal BetuEl nitats monantsi, wan shikinan mosiwa ompa ka nikonSiwat Labán ninohni monantsi. ³ Yewal Dyos ka nichikawalisti ma mishmashti, wan ma kichi pa takatiske wan pa momiyaptiske, pa yok mochiwaske myak Wehwepweblo'. ⁴ Yewal Dyos ma mishmak nitamashtiliste in AbRaham, tewal wan mokolinchim, pa timokawilis in tal kaha ashka timochantitik, wan yewal okimak AbRaham.

⁵ Yok okititan Itsak pa konanaskya ni'ot Yakob wan in panoti pa Padán-aram, kaha mochantiyaya Labán, yewal katka nikon BetuEl in aramteko' wan ninohni Rebeka, ninantsi Yakob wan Esa'ú.

⁶ Esa'ú okit kampa Itsak kimashtiyaya Yakob wan okititan pa Padán-aram kampa ompa monamiktiskya. Niyok okit kwah kimashtiyaya kili, amo shimonamikti ka inik siwam pa Kanán. ⁷ Wan Yakob okineltok nitats wan ninantsi wan oy pa Padán-aram. ⁸ Esa'ú kimiatiya kina kinihyaya nitats in siwam kananteko'. ⁹ Yok oy okit Yishma'El nikon AbRaham wan omonamikti inak Mahalat yewal ninohniSiwat Nebayot nikon Yishma'El, kampa kinpiyaya oksek ininsiwam.

Yakob tatemikiyaya pa BetuEl

¹⁰ Yakob okis pa BérSheba wan oy pa Harán. ¹¹ Wan pek o'as, ompa okoch in yowal kampa tamalinaya tonat. Okonan se tet omotetsonte wan ompa omotek okoch. ¹² Wan

okipi se tatemikiliste, kampa kitaya se eskaler moketstikatka pa in tal wan astikatka pa ilwikak wan kinmitaya kampa nitanawatilanhelmeDyos tehkoloya wan temoloya. ¹³ Pa tak-pak in eskaler, kitaya in WeTatsDyos yewal kiliyaya: “Newal ninewal, WeTatsDyos, niDyos mokolinche AbRaham wan moTats Itsak. Tewal wan mokolinchim animishmakas in tal kaha ashka tikoshtik. ¹⁴ Mokolinchim yeske kina nipohtiTal.



© 1996 David C. Cook

Yakob kipi se tatemikiliste kitaya se eskaler moketstikatka pa in tal wan astikatka pa ilwikak tehkoloya wan temoloya nitanawatilanhelme (Ipewaliste 28:12)

Wan mosesemanaske kampa kalaki in tonat wan kampa wal-kis in tonat wan nepa takpak wan nepa tatsinta, moshte mase-walme yeske tamashtinilme pa tewal wan pa mokolinchim.

¹⁵ Newal ni'onka ka tewal, wan nimishkwitawis kaha han tinehnemitiyas wan nimishwalikas oksep pa in tal. Amo nimishkawas nikchiwas melak kina nimichili.”

¹⁶ Kwah Yakob o'is ka nitatemikiliste kito: “Melak in WeTatsDyos nika onka, wan newal amo nihmatiya.” ¹⁷ Tamakas wan kito: “Tatatsot in tal! Nika onka nikal WeTatsDyos; wan nitatapoli ilwikak!”

¹⁸ Mostatik tahtanesti okonan Yakob in tet yewal motetsonte, wan okikitski wan okikets in tet, kina se ta'ilnamikiliste wan kishawil aseyte ikpak yewal. ¹⁹ Ompa pa in Wepweblo ta'itokaya Luts wan Yakob okitokayolti BetuEl.

²⁰ Kwakin Yakob okichi ka tahtol melawak: “Ta Dyos nishtokati newal wan nishkwitapti pa ot kaha niyapti, wan ta nishmak ten nikwas wan shashalme ka nimotakemilti, ²¹ wan nishwalkwepas ka sewiliste pa nikal notats, kwakin in WeTatsDyos yes noDyos. ²² Wan in tet yewal nikhets kina se ta'ilnamikiliste, yes nikal Dyos. Wan mochiten tishmakas, newal nimishmakas matahti pa sesen mochiten nikpiyas.”

Yakob o'as pa Padánaram

29 ¹Yakob okonan ni'ot, wan o'as pa tal kaha waltakis tonat. ²Otachi wan okit takoyonaliste, amo wEhka katkaloya yey tanichikolme borrego', kampa pa in takoyonaliste takoniloya yolikilme. Se tet we kitsakwaya in takoyonaliste. ³Kwah moshte monichikoloya inik tanichikolme borrego', kikishtiloya in tet we yewal ka tsaktikatkaya in takoyonaliste, wan kinahmakaloya inik borrego' wan oksep kitsakwaloya in takoyonaliste.

⁴Yakob kinmili:

—Nonihniwan, kaha anmochantil anmehwante?

Wan yehwante kinankilik:

—Tehwante timochantil pa Harán.

⁵Kwakin kinmili:

—Anki'ishmatil anmehwante Labán, in nikon Nahor?

Wan yehwante kitok:

—Haha, tikishmatil.

⁶Yakob kinmili:

—Kina onka?

Wan yehwante kinankilik:

—Yewal kwal onka. Shikit tewal nepa wal nikonSiwat Rakel ka borrego'.

⁷Kwakin yewal kito:

—Shikitak, ayamo tyotak, ayamo kwal tikintsakwaske in borrego'. Shikinahmakak wan shikinwikak ma takwak.

⁸Yehwante kinankilik:

—Amokwal yok tikchiwaske, monek pa monichikoske moshte tanichikolme borrego'. Kwakin mokishti in tet we pa takoyonaliste wan tikinahmakaske in borrego'.

⁹Taketstikatka inak yehwante, kwah o'as Rakel ka ininborrego' nitats yewal kinkwitawiyaya. ¹⁰Rakel katka nikon Labán, ninohni ninantsi Yakob, wan in borrego' katka ka Labán. Kimani Yakob okit Rakel, o'as wan kikishti in tet we ka ta'ahmakaliste wan kinahmakak in borrego'. ¹¹Kwakin Yakob kitahpalo ka tenamikiliste Rakel, wan kipewalti chokaliste. ¹²Kwakin Yakob kili Rakel yewal katka nikon



*Yakob okit Rakel wan kikishti in tet we
ka ta'ahmakaliste (Ipewaliste 29:10)*

ninohni nitats, wan katka nikon Rebeka. Kwakin yewal motalo pa kinawatiskya nitats.

¹³Kwah okikak Labán in taketsaliste ka Yakob, nikon ninohniSiwat, motaloti oy okinamik, wan kinapalo wan kite-namiki, wan okiwik icha, ompa Yakob kitakichili Labán mochi inik ten. ¹⁴Kwakin Labán kili: "Tewal tihnamiki noyEste." Wan Yakob moka pa mochi se meste.

Yakob monamikti inak Le'a wan Rakel

¹⁵Kwakin Labán kili Yakob:

—Amoyok han tirishtikipanoli, kampa tewal nikon nonohni, shinichil kishki tihnek pa nimishtashtawilis.

¹⁶Labán kinpiyaya ome ininpilwaSiwam. In we itoka Le'a wan in tipichi itoka Rakel. ¹⁷Le'a kwal nesiloya nishtololme, Rakel kwal nesiya. ¹⁸Yakob kinekiya Rakel, wan kili:

—Nimishtikipanolis chikome shiwim pa nimonamiktis ka mokon tipichi, Rakel.

¹⁹Wan Labán tanankili:

—Kwal onka, pa nimishmakas tewal, pa amo monamiktis inak okse takat. Shimoka ka newal.

²⁰Yok ye kina Yakob otikipan chikome shiwim ka Rakel, kitamashti kina sek tonatim, kampa hyero kinekiya. ²¹Se tonat, Yakob kili Labán:

—Ashka onitam onimishtikipanol mochi in shiwim. Shinishmak nosiwa pa nimonamiktis inak yewal.

²²Kwakin kinnichiko Labán moshte masewalme wan okichi se mitotiliste. ²³Kwah tayoway, Labán konan nikon Le'a, wan okiwkil Yakob, wan yewal omotek inak yewal. ²⁴Niyok Labán okimak nikon Le'a, se tikipanolSiwat itok Silpa.

²⁵Mostatik kwah tanes, Yakob okit kampa katka inak Le'a, kampa yok kili Labán:

—Ten yewal otinischchiwil? Nimishtikipanol pa nikonanas Rakel? Pates otishkwaman?

²⁶Labán kinankili:

—Inik, tehwante amo titemakal pa monamiktis se nikon tipichi ta ayamo'ok monamikti nikon we. ²⁷Shitakis in chikome tonatim, kwakin nimishmakas in nokse, ta tirishtikipanoli oksek chikome shiwim pa newal.

²⁸Yok okichi Yakob, mo'ashilti in chikweyi tonatim, kwakin Labán okimak nikonSiwat Rakel pa yeskyia nisiwa. ²⁹Wan

Labán okimak Rakel se nitikipanolSiwat itoka Bilha, pa yeskyá Rakel nitikipanol.³⁰ Wan Yakob omotek niyok ka Rakel, wan okinek miyak Rakel, amoyok okinek Le'a, wan kitikipanolí Labán oksek chikome shiwim.

Ininpilwam Yakob

³¹ In WeTatsDyos kitaya kina Yakob amo kinekiya Le'a. Okichi pa kinpiyaskya ininpilwam, wan Rakel amokwal kinpiyaskya ininpilwam. ³² Le'a o'osti ta'apa wan okitakatilti se nikonTakat wan okitokayolti Rubén^l, kampa kito: "In WeTatsDyos okit kina nimoyolkokotikatka. Yok ashka nishtasota notaka." ³³ Oksep osti ta'apa wan okitakatilti okse nikonTakat, kwakin kito: "In WeTatsDyos takak kampa amo nishnek notaka, kampa onishmak in okse nokon." Kampa yok kitokayolti Shime'ón.

³⁴ Oksep o'osti ta'apa wan okitakatilti se nikonTakat, wan kito: "Kampa ashka notaka mokawas nonak, kampa nikintakatilti yey ininpilwam takam." Wan okitokayolti Lewí.

³⁵ Osti ta'apa oksep, wan okitakatilti okse nikonTakat, wan kito: "Ashka nikilis tahtolme wehwe pa in WeTatsDyos." Kampa yok okitokayolti Yehudá. Kwakin yahmo okinpi ininpilwam.

30 ¹Rakel okit kina amo kintakatiliyaya ininpilwam ka Yakob kwakin kikwalaniliyaya ninohni Le'a. Kwakin kiliyaya Yakob:

—Shinishtakatilti nopilwam, ma yok nimikis!

²Yakob okwalan inak Rakel wan kili:

—Ten newal niDyos? Wan yewal mishtsakwilitik pa amo tикинpiyas mopilwam!

³Kwakin Rakel kito:

—Nika onka Bilha notikipanol. Shimotek inak yewal pa yok yewal nishtakatiltis nopilwam kampa pa yewal, newal yok nikinpiyas nopilwam.

⁴Wan Rakel okimak Yakob nitikipanolSiwat Bilha pa yeskyá nisiwa wan omotek inak yewal. ⁵Bilha o'osti ta'apa wan okitakatilti se nikon Yakob. ⁶Kwakin Rakel kito: "Dyos onishmak notamawishtiliste wan onishkak kwah niktahtan se nokon takat." Kwakin okitokayolti Dan.

⁷Rakel nitikipanolSiwat Bilha o'osti ta'apa oksep, wan okitakatilti okse nikonTakat ka Yakob. ⁸Kwakin Rakel kito: "Kina

^l 29:32 Ruben in kinek kito: yewal kitaya kina nimoyolkokotikatka.

miyak nimomikti ka nonohni Le'a wan ashka niktanil." Wan okitokayolti nikon Neptalí.

⁹Kwah Le'a okimat kwah ayahmo kintakatiltiyaya ininpilwam, kwakin okonan nitikipanolSiwat Silpa wan okimak Yakob pa yeskyá nisiwa. ¹⁰Wan Silpa nitikipanolSiwat Le'a okitakatilti se nikonTakat pa Yakob. ¹¹Wan Le'a kito: "Dyos onishchiwil okse tachiwaliste kwal!" Ashka nikpi okse!, kwakin okitokayolti Gad.

¹²Silpa nitikipanol Le'a okitakatilti Yakob okse nikonTakat.

¹³Wan Le'a kito: "Nikpi miyak pakiliste ka newal! In siwam nichiliske newal nimo'itok Pakiliste." Wan okitokayolti Asher.

¹⁴Se tonat kwah kipishkaloya trigo, oy Rubén pa in kwahmil. Okit mandragora' yewal kiwikil Le'a ninantsi. Wan Rakel kili Le'a:

—Shinismak sek mandragora' yewal kiwalik mokon.

¹⁵Wan Le'a kili Rakel:

—Tewal otinishkishtil notaka, wan ashka tihnek tinishkishtilis nimandragora' nokon?

Rakel kito:

—Ma tikchiwak se tahtoliste kampa ashka yewal pa in yowal kochi monak, ta tinismak sek mandragora'!

¹⁶Katka pa kwahmil Yakob wan pa tyotak kwah walmonkwep, okinamik Le'a, kili:

—Pa in yowal tikochi nonak, kampa onitashta ka nimandragora' nokon yewal okiwalik.

Wan Yakob okoch ka Le'a.

¹⁷Wan Dyos okikak yewal Le'a kitahtan, wan Le'a o'osti ta'apa, okitakatilti okse nikonTakat pa Yakob ka in nikon okintakatilti makwil ininpilwaTakam. ¹⁸Kwakin Le'a kito: "Dyos onishchiwil kwal ka in tashtawaliste kampa onihmak notikipanol pa yeskyá nisiwa." Kwakin okitokayolti Isakar.

¹⁹Le'a o'osti ta'apa oksep, okitakatilti okse nikonTakat ka in katkaloya chikwase ininpilwam Yakob. ²⁰Kwakin Le'a kito: "Dyos onishmak se temakaliste yewal kostaro. Ka in nopilwam, notaka nishmawishtilis kampa nikintakatilti chikwase ininpilwaTakam." Kwakin okitokayolti Sabulón.

²¹Kwakin okitakatilti okse nikonSiwat wan okitokayolti Dína.

²²Kwakin Dyos ki'ilnamik Rakel, okikak nitahtolme wan okimak pa kinpiyas ininpilwam. ²³Osti ta'apa wan okitakatilti se nikonTakat pa Yakob, kito: "Dyos onishkishtil nopinawiliste."

²⁴Okitokayolti Yosé, kitowaya: "Nishmakaskya in WeTatsDyos okse nokonTakat."

Niyashka Yakob momiyaptiloya

²⁵Panok tonatim kwah Rakel okitakatilti Yosé, wan Yakob kili Laban:

—Shinishtake pa no'ot pa nimokwepas pa natal.

²⁶Shinismak nosiwam wan nopolwam, pa yehwante onimishtikipanoli, wan yok nikonanas no'ot. Wan tihmat kishki myak nimishtikipanoli.

²⁷Ma yok Labán kili:

—Nimishtahtani ka tamawishtiliste shimoka ka newal, kampa nihmat ipa se taneshtiliste, kampa in WeTatsDyos nishmashtitik ipa tewal.

²⁸Wan kili:

—Shinichil kishki tihnek nimishtashtawilis wan yok nimishmakas.

²⁹Yakob kinankili:

—Wan tihmat kina nitikipanowaya ka moyolikilme kina newal nikinkwitawiyaya. ³⁰Amoyok miyak titapiyaya kwah newal ayamo ni'asiyaya, motachi miyak kwah ni'as, wan in WeTatsDyos mishmashti. Kimani ten nikchiwas pa nokal.

³¹Wan Laban kitahtanili:

—Ten tihnek pa nimishmakas?

Yakob kinankili:

—Amoten shinismak. Ta tihnek ten tikchiwas pa newal shikchi kina nimishtahtanis wan newal oksep nikinkwitawis moborrego'. ³²Ashka nipanos pa mochi moyolikilme, wan nikinonana moshte in borrego' tamahwilme wan ta'ahwicholme, wan mochi borrego' tihtiltik, wan in chiba' ta'ahwicholme, moshte yehwante yeske notashtawaliste.

³³Kwah tihnekis tihmatis in notashtawaliste, yok ta onka sek chibo' pa notanichikoliste yewal amo tamahwilme wan sek borrego' yewal amo tihtiltik, kwakin yok tihmatis. Kampa yok nimishta'ishtikilitik.

³⁴Kwakin Labán kito:

—Kwal onka yok kina tinichili.

³⁵Pa in tonat Labán kinonan mochi in chibo' tamahwilme wan tapahwilme wan in chiba' tamahwilme wan ta'ahwicholme', wan kishki kipiyaloya tipit ihistak wan moshte in borrego' tihtiltik, wan okinmak ininpilwam pa kinkwitawilosky. ³⁶Kwakin kinwikak wEhka, kaha amo

yeskyá Yakob. Kinwikak kina pa yeyskya tonatim pa ot, wan Yakob omoka kinkwitapti in oksek niborrego' Labán.

³⁷Okonan Yakob kwawit pihpitsawak ka kapul wan wachalala wan amakwawit wan kinkishtil ininkashkar pa nesiskya ni'istak in kwawim. ³⁸Kwakin okintal in kwawitito ni'ishpa kaha walaloya takoniloya in yolikilme. Wan yehwante motohtokaloya ni'ishpa kwawitito, ³⁹yok ta'apawaloya in borrego' i'ishpa in kwawim wan kinmishiwiltiloya borrego' tamahwilme wan tapahwilme wan ta'ahwicholme ka myak tapahwilme. ⁴⁰Kwakin Yakob okinonan wan kinkawaya i'ishpa yolikilme niktihtiltik wan tapahwilme pa nitanichikolme Laban. Yok Yakob mokawiliti pa kipiyaskya isel nitanichikol amo kinnelowaya inak niborrego' Labán. ⁴¹Kwah in yolikilme kwah-kwalme tatohtokaloya, Yakob kintaliyaya kwawim kaha takoniloya i'ishpa borrego' pa yok ta'apawaloskya kampa kitatiyaloskya kwawim. ⁴²Kwah walaloya in yolikilme amokwal nesiloya, amo kintaliyaya ma yok, in amo kwahkwalme mokawiliyaya Labán wan in kwahkwalme mokawiliyaya Yakob. ⁴³Yok oye in takat kina omochi ka myak mochiten. Wan okinpi myak borrego' wan tikipanolmeSiwam, tikipanolmeTakam, kameyo' wan burro'.

Cholowaya Yakob kampa yahmo yeskyá ka Labán

31

¹Kwah Yakob kimat kina Labán ininpilwam kililoya:

"Yakob ki'ishtikili totats mochi yewal ten tapiyaya, wan mochi in yewal ashka tapi mokawili yewal niyashka totats." ²Kitaya Yakob, kina amokwal kitaya Labán kina kwah o'as. ³Kwakin in WeTatsDyos kili Yakob: "Shimokwep pa nital mowichalme wan monohniwan, wan newal nimishpalewis wan niyes ka tewal."

⁴Kwakin tatake Yakob pa kinnotsaloskya Rakel wan Le'a pa in kwahmil kaha katkaloya in yolikilme, ⁵kinmili:

—Nikit kina anmotats amokwal nichit ashka, kina kwah nichitaya kwah oni'as. Ma yok niDyos notats onka ka newal.

⁶Anmehwante ankimatil kina niktikipanoli anmotats ka mochi nochikawaliste. ⁷Wan anmotats onishkwaman, onishkishtil notashtawaliste pa matahti, yok nishchiwil. Ma yok Dyos amo okimakawilti pa nishchiwilis ten amokwal. ⁸Ta yewal kitowaya: "In yolikilme tamahwilme yes motashtawaliste", kwakin mochi in yolikilme kintakatiltiloya tamahwilme; wan ta yok kitowaya: "Nimishtashtawilis ka in yolikilme tsehtseppestik yes

motashtawaliste”, kwakin mochi inik yolikilme kintakatiltloya tsehtsepestik. ⁹Yok Dyos kikishtil yolikilme anmotats wan onishmak newal.

¹⁰“Pa se tonat kwah tatohtokaloya in yolikilme, nikpi se tatemikiliste kampa nikanmitaya in toro' kintohtokatikatkaloya in chiba' katkaloya tapahwilme, tamahwilme wan ta'ahwicholme. ¹¹Kwakin nitanawatilanhelDyos nishtakichil pa tatemikiliste, nichili: “Yakob!” Newal nihnankili: “Nika ni'onka.” ¹²Wan kito: “Shitachi wan shikit kampa mochi toro kintohtokal ka in tanichikolme tamahwilme wan tsehtsepestek. Onikit kina mishchiwili Labán. ¹³Newal niDyos yewal omoneshte ompa BetuEl, kaha tikshawil moyEste in tet weyak yewal tihkets, ompa otichil newal, ashka shihka in tal shimokwep pa motal kaha otitakat.”

¹⁴Kwakin Rakel wan Le'a kinankilik:

—Ayamo tikpiyal ka yewal nitakawaliste pa mochiten ka totats. ¹⁵Yewal tichit kina amo otitakatik nika. Otishnamak tehwante, niyok okitam in yewal totashtawaliste. ¹⁶Melak kampa mochi in Dyos okikishtil totats ka toyashka wan niyashka topilwam. Ashka shikchi kina Dyos michili.

¹⁷Kwakin Yakob okintal ininpilwam wan ininsiwam ipa kameyo', ¹⁸wan okinpewalti mochi yolikilme tanichikolme. Niyok okinwik mochi inik yewal okinonan ompa pa



© 1996 David C. Cook

Yakob kinnawati ininsiwam kina choloske (Ipewaliste 31:13)

Padán-aram, yok omokwep pa tal Kanán, kaha katka nitats Itsak.

¹⁹Kwah oy Labán okinshim niborrego', Rakel kinishtek imono tachiwal ka tal ka nitats yewal katkaloya pa nikal.
²⁰Yakob kikwaman Labán in aramteko, amo kinawat kwah panoti. ²¹Kwakin panoti ka mochiten yewal tapiyaya wan panok in atenko Éprates. Kwakin okonan ot pa talTepet Gile'ad.

Labán kitohtok Yakob

²²Panok yey tonatim, oyak kilik Labán kaha yok cholowaya Yakob. ²³Kwakin Labán okinwik ka yewal ninihniwan pa oksek kalme wan kitohtokaya Yakob pa chikome tonatim wan oki'as pa tepetLom pa Gile'ad. ²⁴Kwakin moneshte Dyos ka Labán in aramteko pa tatemikiliste kili: “Amoten shikil Yakob, amo shihkwalanti!”

²⁵Yakob okital nikal tachiwali ka shashal tilawak pa tepetLom pa Gile'ad kwah ki'as Yakob, wan Labán inak ninihniwan ompa niyok mokawak. ²⁶Kwakin Labán kili Yakob:

—Pates yok otikchi? Tishkwahkwaman, wan otikinwik nopolwaSiwam kina tatsakwalme. ²⁷Pates tichol kampa amo'ak kimatiskya wan tishkwahkwaman? Pates amoten otichil? Yok nimishtaneskya pa mo'ot ka pakiliste wan ka tatsotsonaliste ka arpas? ²⁸Wan amo otinismakawalti pa nikintenamikiskyia nopolwam. Otikchi kina se yewal amo mo'ilnamik kwal. ²⁹Newal nikpi chikawaliste pa nimishchiwilis takokoliste kampa nichili niDyos motats: “Shimo'it pa amo'ik tikilis amoten Yakob!” ³⁰Ashka otimowik kampa hyero tih-nek timokwepas pa nikal motats. Ma yok, pates otinishishtikil nomono'?

³¹Yakob kinankili Labán:

—Nimomapti, ompa nimo'il kampa tinishkishtiliskyia mopilwam ka chikawaliste. ³²Ma yok, tatikit se ka tehwante yewal kinpi modyose', ma mik. Ininishpa tonohniwan, shitatem tewal ta tikit ten moyashka nika ka newal, wan shikonan.

Yakob amo kimatiya kampa Rakel kinishtek in mono tachiwal ka tal. ³³Yok okalak Labán pa nikal Yakob niyok pa nikal Le'a wan okalak pa ininkal in ome tikipanolmeSiwam. Amoten okit, kwakin kwah okis pa nikal Le'a, okalak pa nikal Rakel. ³⁴Kwah ayamo'ok asiyaya Labán pa nikal Rakel, kintat pa

nisiya ikameyo wan omotal ipa. Labán tatemowaya pa in kal tachiwal ka shashal tilawak, amoten okit.³⁵ Rakel kili nitats:

—Amo shikwalan tats, amokwal nimoketsa mo'ishpa.

Nishastik nomeste.

Tatemo Labán wan amo okinmit in mono tachiwal ka tal.

³⁶ Okwalan Yakob wan oki'ahwa Labán, kitahtanili:

—Ten yewal amokwal onikchi? Ten onimishchwil pa yok tirishtohtokatiwal kaha niwal?³⁷ Ashka otitam otitatem pa mochi yewal noyashka. Ten otikit yewal ka tewal pa mokal? Shiktal nika ininishpa nonohniwan wan ma motishpawilik ka tewal wan newal.³⁸ Pa inik 20 shiwim ka tewal. Amo ni se tamaya moborrego' wan mochiba' wan newal amo nikwa ni se moborrego' yewal katkaloya pa motanichikolme.³⁹ Amo'ik nimishwalikil moyolikilme yewal kati tekwanim pa kwawim kinmikiyaya, kampa nimishtashtawiliyaya yewal kati poliwiloya. Wan nimishtashtawiliyaya newal ta nishishtikililoya pa tahka wan pa tayo.⁴⁰ Wan newal yok niyoliyaya kimani nimishtikipanoliyaya. Pa tahka nitolnami-kiyaya hyero tona katka, wan pa inik yowalme hyero nise-kwalowaya amo nikochiyaya.⁴¹ Ma yok oniye pa in 20 shiwim kwah nikatka ka anmehwante pa mokal. Onimishtikipanol 14 shiwim pa tinishmakaskya in omente mopilwam pa yeloskya nosiwam onimishtikipanoli chikwase shiwim pa motanichikolme ka yolikilme. Wan tishkistil notashtawaliste ka matahti tashtawaliste.⁴² Tats niDyos notats, niDyos AbRaham, wan notats Itsak, ta yewal amo yeskyá ka newal, melak tewal tirishtakewaskya pa kiyawak mokal amo nikpiyaskya amoten. Ma yok, Dyos okit kina nimoyolkokotitikatka kina onitikipan miyak, pa yowal omishahwa.

⁴³Labán kinankili Yakob:

—In siwam yehwante nopolwam, inik ininpilwam kat nopolwam wan in yolikilme. Mochi yewal tikit ka noyashka. Ma yok, ten wel nikchiwas ashka yehwante inik nopolwaSiwam wan nahyehwante in ininpilwam yewal kintakatiltik?⁴⁴ Aska shiwal, ma timochiwilik se taketsaliste tewal wan newal, wan ma ye kina se tachiwaliste ka taneshtiliste ka tehwante omente.

⁴⁵ Kwakin okonan Yakob se tet wan kiketsak,⁴⁶ kinmili Yakob ninihniwan:

—Shikinnichikok tetelme!

Wan kinnichikok tetelme ompa takwak ipa in tetelme.

⁴⁷Labán okitokayolti Yegar Sahaduta wan Yakob okitokayolti Gile'ad.

⁴⁸Labán kito:

—Inik tanichikolme tetelme ka totahtol melawak ka tewal wan newal ashka.

Kwakin kitokayolti Gile'ad, ⁴⁹niyok kitokayolti Mispá, kwakin kito:

—Ma kit in WeTatsDyos pa tewal wan newal kwah temosesemanaske se ka okse. ⁵⁰Ta amokwal tikinchiwil nopolwaSiwam ta tikanonan oksek siwam pa niyok yeske mosiwam, kwakin amo'ak yes ka tehwante, ma yok shikilnamik kampa Dyos okit mochi yewal ka tewal wan newal.

⁵¹Niyok Labán kili Yakob:

—Shikit in tanichikolme nika ka in tetelme yewal nihkets, pa tewal wan newal. ⁵²In tanichikol ka in tetelme, wan in tanesh-tiliste pa yok tihmatiske in: Newal amo nipanos in tanichikolme ka tetelme pa niyas ka tewal, pa nimishchiwilis ten amokwal wan tewal amo tiyas kaha newal pa tinishchiwilis ten amokwal.

⁵³NiDyos AbRaham wan niDyos Nahor, ininDyos inintahwan ma motishpawilik ka tehwante ta amo tikchiwak kina tikitok.

Yok kili melak Yakob pa i'ishpa Dyos, kinotstikatka niDyos yewal nitats Itsak wan kimakasiyaya. ⁵⁴Yakob okital ompa se tatemakal pa in lom wan okinnots ninohniwan pa takwalo-skya. Kwakin kwah takwak, panok ompa in yowal.

⁵⁵Mostatik kwalka kintenamiki Labán nikolinchim wan ininpilwaSiwam, kinmashti. Kwakin omokwek pa nikal.

Monamikil Yakob wan Esa'ú

32 ¹Okonan ni'ot Yakob wan kinamikik nitanawatilanhelmeDyos. ²Kwah okinmit Yakob kito: “In kaha mosewil ininwacho' Dyos!” Yok yewal kaha okitokayolti Mahanayim.

³Yakob okintake sek tanawatilme, yehwante yaloskya ka ninohni Esa'ú pa tal Se'ir, pa in nik wahmil Edom. ⁴Wan kinmili: “Shikilik notats Esa'ú, yok kito motikipanol Yakob wan pa ashka nimochantitik inak Labán, ⁵nikinpi baka', borrego', tikipanolmeTakam wan tikipanolmeSiwan. Onikintitan in notanawatilme, pa kiliske notats pa niktahtanis pa nishnamikis ka ta'ihnliste.”

⁶Kwah walmokwepak in tanawatilme kilik Yakob: “Tiyak ka monohni Esa'ú wan ashka wal pa mishnamikis ka yewal walal 400 takam.”

⁷Yakob hyero momapti, moka moyokoltiti, kwakin kinshel pa ome tanichikolme ka masewalme yehwante katkaloya inak yewal, wan niyok inik tanichikolme borrego', baka' wan inik kameyo', ⁸wan kito: “Ta wal Esa'ú wan momikti ka in se tanichikol, kwakin in okse tanichikol kwal choloske.”

⁹Niyok kito Yakob: “Tats, niDyos nokolinche AbRaham wan niDyos notats Itsak, tewal yok tinichil shimokwep pa motal wan ka motahwan wan newal nimishchiwilis kwal: ¹⁰newal amo nimonots pa nikpiyas ta'ihniliste wan ka melak kina tihkwitawi in motikipanol tewal, newal nimopanolti ka no'ota in atenko Yordán. Wan ashka nikpi ome wehwe tanichikolme. ¹¹Nimishtahtani, shinispale ka nonohni Esa'ú, kampa nihmakasi pa walas nishmiktis, wan kinmiktis nosiwam ka ininpilwam! ¹²Tewal tinichili: Melak nimishchiwilis kwal pa tikonas miyak yewal nimishmakas, wan nikinchivas ka mokolinchim pa momiyaptiske kina in shal pa in itenko in We'at yewal amokwal kina mopowas.”

¹³Pano pa in yowal, wan ka inik yolikilme yewal kinpiyaya, kinkitske tahko pa kimakas ninohni Esa'ú. ¹⁴Kinkishtili 200 chiba' wan 20 chibo', 200 borrega' wan 20 borrego', ¹⁵30 kameyo' siwam ka ininpilwam, 40 baka' wan matahti toro' wan 20 burra' ka matahti burro'. ¹⁶Pa sesen inintikipanolme okintake pa kinmitatiyaloskya se tanichikol, wan kinmili: “Shinimik ta'ishpa wan ma yaptiyak wehwehkito pa mochi sesen ka in tanichikolme.”

¹⁷Okititan se ta'ishpa, kiliyaya:

—Ta nonohni Esa'ú mishnamiki wan mishtahtanili: “Akyewal mowetatakewan? Kampa ti?, akyewal niyolikilme yewal tикинwik? ¹⁸Kwakin tikilis: “Niyashka motikipanol Yakob yewal otishtake pa nimishmakas tewal, notats Esa'ú, Yakob wal takwitap ka tehwante.”

¹⁹Niyok okintake in oksek inintikipanolme wan moshte in oksek yewal kintitan takwitap ka inik tanichikolme, kinmili: “Anmehwante ankiliske yok in tahtolme Esa'ú, kwah ankinamikiske, ²⁰wan niyok ankiliske: 'Wal takwitap motikipanol Yakob.' Wan yewal tamat: 'Nikyolsewis ka inik yolikilme yewal

nikintitanilitik ta'ishpa, kimani timonamikiske yok yewal nishnamikis kwal.”²¹ Yok in yolkilme kintitaniiliyaya ta'ishpa Yakob, ma yok Yakob pano in yowal, kaha kikets nikal pa mosewisky.

Yakob mo'onan ka Dyos

²² Pa in yowal omokets Yakob, okinonan in ome siwam wan in ome nitikipanolme Siwam wan in 11 ininpilwam, okinpanolti pa in atenko, Yakob. ²³ Kwakin okinpanolti in atenko we, otake pa kinpanoltiloskya mochi yewal niyashka. ²⁴ Yok omoka Yakob isel wan omo'onan ka yewal se takat, pa mochi yowal kwah takistiwalaya tonat. ²⁵ Kwah okit in takat kina amokwal kitanihisky, okite pa niseltik kaha takitskitik nipyerna, kwah momiktitikatkaloya nipyerna Yakob okopin niweso. ²⁶ Kwakin in takat kili:

—Shinishmaka, kampa oksep waltakistiwal tonat!

Yakob kinankili:

—Amo nimishmakawas ta amo tinichil motahtoliste kwal pa newal!

²⁷In takat kitahtanili:



*Se nitanawatilanhel Dyos omomikti
inak Yakob (Ipewaliste 32:24)*

—Kina ti'itok?

Kinankili:

—Ni'itok Yakob.

²⁸ Wan in masewal kili:

—Yahmo ti'itokas Yakob. Ashka ti'itokas Isra'El, kampa otimo'onan ka Dyos wan ka masewalme tikintanil.

²⁹ Yakob kili:

—Tihnek tinichilis kina ti'itok tewal.

Wan in takat kinankili:

—Pates tnishtahtanilitik kina ni'itok?

Kwakin in takat kili Yakob nitahtoliste kwal pa yewal.

³⁰ Yakob okitokayolti PenuEl ompa kaha katkaloya: “Kampa inak Dyos timoitak, ma yok amo onishkishtil noyoliliste.”

³¹ Kwah waltakis in tonat, kwah Yakob panowaya PenuEl, wan kikokowaya nipyerna^m amokwal kina nehnemiskyta.

³² Kampa pa in tonat wan pa ashka, yehwante in israelita' amo kikwal niseltek-nitalwa yewal onka kaha takitskitik nipyerna kampa kitewik, kampa yewal nitalwa mo'olol.

Kimani Yakob kinamik Esa'ú

33

¹ Yakob otachi wan astiwalaya Esa'ú wan in 400 takam. Yakob kinmak ininpilwam se ka okse Le'a, Rakel wan in ome inintikipanolmeSiwam. ² Ta'ishpa okinkets inintikipanolmeSiwam wan ininpilwam, takwitapit okikets Le'a ka ininpilwam, kampa takwitap okikets Rakel wan Yosé. ³ Yakob, okinpana moshte wan omotankwaketsaya ka chikome han pa tal kwah astiyaya ninohni. ⁴ Ma yok Esa'ú omotal okinamik Yakob wan okinapal wan okitenamik. Wan chokaloya in omente. ⁵ Kwakin otachi Esa'ú wan okinmit in siwam wan ininpilwam, kitahtanili:

—Akyehwante inik yewal kat monak?

Yakob kinankili:

—Yehwante nopolwam, yewal Dyos onishmak newal, motikipanol tewal.

⁶ Kwakin walaloya inintikipanolmeSiwam ka ininpilwam wan omotankwaketsak pa i'ishpa yewal. ⁷ Kwakin Le'a wan ininpilwam asik wan omotankwaketsak. Wan takwitap Yosé wan Rakel niyok omotankwaketsak.

^m 32:31 Pyerna in kinek kito ka tsohmet kastiya “muslo”.

⁸Esa'ú kitahtanili:

—Ten tihnek tikitos ka mochi inik tanichikolme yewal onikinnamikiwal pa ot?

Yakob kili:

—Nihnekiya niktaniskyka tikipanoliste kwal pa notats.

⁹Kwakin Esa'ú kito:

—Miyak nitapi nonohni. Shimokawil in yewal tikpi pa tewal.

¹⁰Yakob kinankili:

—Nimishtahtani, ta melak kwal tishnamiktik shikonan in temakaliste, kwah onikit moshayak, onikit kina nishayak Dyos. Tewal otishnamik kwal. ¹¹Shikinonan in yewal nimishwalikilitiwal, kampa Dyos kwal nishchiwili newal, wan nikpi mochiten moteshmonek.

Kampa Yakob hyero kimakatikatkaya pa kinonanaskya, yok Esa'ú okinonan. ¹²Kwakin Esa'ú kili:

—Ma tiyaptiyak pa ot. Newal nimishtokas.

¹³Yakob kinankili:

—Notats kimat kina piltontim kat sehseltik wan monek pa ninkinmitatiyas in borrega' yewal tachichilti. Ta tikinwikal kon-gana pa se tonat mikiske mochi in yohyolkilme. ¹⁴Nimishtahtani, notats, shiyapti ta'ishpa ka motikipanol, wan newal yolikit niyaptiyas kina tatiliktsatiyal yolkilme wan kina tatiliktsatiyal piltontim newal ompa nikasis notats pa Se'ir.

¹⁵Kwakin Esa'ú kili:

—Nimishkawilis tahko nomasewalme yewal walal ka newal pa mishpalewiske.

Yakob kinankili:

—Amo nishteshmonikil? Kampa melak kwal tishnamik notats.

¹⁶Yok, pa in tonat Esa'ú omokwep pa ni'ot pa Se'ir. ¹⁷Wan Yakob, yawiya pa in ot pa Sukot, ompa okichi nikal wan okin-chi tasoway ka inik nimahmashaltik kwawim pa yolkilme ompa okitokayolti Sokot (kinek kito ramada').

¹⁸Kwah Yakob walmokwep pa Padán-aram o'as kwal, pa Kanán, pa in Wepweblo Sikem yewal pa in tal Kanán, wan ompa okikets nikal tachiwali ka shashal tilawak kaha kitaya wEhka in Wepweblo Sikem. ¹⁹Mokowili tal kaha kikets nikal, okinkowil ininpilwam Hamor, nitats Sikem, otashta 100 tomi tachiwali ka plata. ²⁰Ompa okinnichik tetelme kaha kitaliskyka tamakaliste wan okitokayolti, El Elohe Isra'El.ⁿ

ⁿ 33:20 El Elohe Isra'El in kinek kito: ka hebreteko Dyos in niDyos Isra'El.

Sikem kikatsawilti Dína

34 ¹Dína, nikonSiwat Le'a yewal kipi inak Yakob, Dína yawiya kinpashalowaya inik siwam pa in pweblo.

²Sikem nikon Hamor in heweteko yewal katka kapitan pa in pweblo okit Dína, wan okonan omotek inak yewal. ³Kwakin in takat okitasot miyak Dína, kili tahtolme sehseltek ka in siwat-Piltonte. ⁴Kwakin Sikem kili nitats Hamor: “Shitahtan in siwat-Piltonte kampa yewal yes nosiwa.”

⁵Kwah Yakob kimat kina in takat kikatsawilti nikon Dína, ininpilwaTakam katkaloya pa in tashosholtik ka in yohyolkilme. Yok amo nawat Yakob, omochi pa walmokwepaloskya ininpilwam. ⁶Kwakin Hamor nitats Sikem oy okit pa tahtoskya ka Yakob. ⁷Kwah walmokwepak ininpilwam Yakob, walaloya pa in kwahmilme kaha katkaloya, kwah okimatic in yewal ten okipan Dína, okinkok miyak ininyolme wan hyero kwalanik. Pates Sikem okichi yewal ten amokwal ka siwatPiltonte Isra'El kampa omotek ka nikonSiwat Yakob. Katka ten pa amo'ik panoskya ten, kina in. ⁸Ma yok, Hamor kinmili:

—Nokon Sikem kinek monamiktis ka mokonSiwat. Shihmakak pa monamiktis inak yewal. ⁹Ma timonamiktik tehwante ka anmehwante. Shitishmakak anmopilwaSiwam wan shikinonanak topilwaSiwam pa anmehwante. ¹⁰Shimokawak wan shimochantik nika ka tehwante, in tal onka pa mota'ishpa. Shiyolik nika, shitakowak wan shitanamakak pa in tal shimokowilik kwahmilme pa in tal.

¹¹Kwakin Sikem kili Dína nitats wan ninohniwan:

—Ma nikpi tekipanoliste kwal ka anmehwante, wan annimishmakas ten annishtahtaniske. ¹²Shiklik in tashtawaliste pa in siwat, shinichilik kishki monek pa annimishwalikili, ma ye we kina ankinekil, wan annimishtashtawilis ten annishtahtaniske. Shinismakak in siwatPiltonte pa yok yes nosiwa.

¹³Yakob ininpilwam kwah tahtok ka Sikem wan nitats Hamor kikwahkwamanak kampa ninohni Dína ye takatsawalti.

¹⁴Kilik:

—Amokwal yok tikchiwaske, pa antimishmakaske tonohniSiwat se takat yewal amo kipi takotonili nikwerit kaha

mashishal. In yewal tepinawaliste pa tehwante. ¹⁵ Antimishmaske pa timonamiktis ka yewal, anmehwante ta ankichiwak kina tehwante: shimokotonilik anmokwerit kaha ammashishal moshte takam ka anmehwante. ¹⁶ Kwakin antimishmakaske topilwaSiwam wan tikananaske anmopilwaSiwam pa tehwante, timochantiske ka anmehwante wan yok timochiwaskse se tanichikol ka anmehwante. ¹⁷ Wan ta amo ankinekil ankichiwaske se tahtoliste pa ankipiyaske takotonili nikwerit kaha mashishal, kwakin tikonanaske tonohniSiwat wan tihwikaske.

¹⁸ Yok kikakik kwal Hamor wan nikon Sikem in tahtol; ¹⁹ in takatYankwik Sikem kimawishtiloya yehwante in takam pa in pweblo, wan amo owehkA pa kichiwaskya in yewal kilik ininpilwam Yakob.

Kampa yok miyak kinekiya nikonSiwat Yakob. ²⁰ Yok Hamor wan nikon Sikem kampa kalakik pa in pweblo pa tahtoloskya ka in takam pa ininpweblo, ompa kaha kalakil moshte.

²¹ Kinmilik:

—Mochantil ka sewiliste ka tehwante in takam israelita'. Mochantiske nika pa takowaske wan tanamakaske. Kampa we tal pa yehwante, kampa timonamiktiske ka ininpilwaSiwam, wan yehwante monamiktiske ka topilwam. ²² Ma yok, in takam mokawaske mochantityaske yok ka tehwante tikpiyaske takotonili nikwerit kaha mashishal tehwante, kina yehwante kipiyal. ²³ Yeske toyashka intantanichikolme ka borrego', chibo' wan ininkwahmilme wan in oksek anmoyolikilme, kwakin ma tikanmilik yehwante kampa yeske ka se tahtoliste pa mochanitiske ka tehwante.

²⁴ Kwakin moshte in takam yewal kisaloya ompa kaha kalakil pa in Wepweblo mokawak ka se tahtoliste ka Hamor wan nikon Sikem, wan moshte pa in Wepweblo mochiwilik takotonili. ²⁵ Panok yey tonatim kwah kichiwak in. Kwah yehwante kintakokowaya wan in ome ininpilwam Yakob, Shime'ón wan Lewí, ninohniwan Dína, konanak ininteposte oksep oyak pa in pweblo kaha amo'ak kimatiya yewal ten yaloya kichiwaloya, ompa kinmiktik in takam, wan kinmiktik moshte. ²⁶ Tamiktik Hamor wan Sikem wan kikishtik Dína ompa kaha katka pa nikal Sikem wan kiwikak. ²⁷ Kwakin walak ininpilwam Yakob kaha katkaloya mochi in mihmihke, kalakik wan ta'ishtikik mochi pa in pweblo. ²⁸ Kinishtikik mochi borrego' wan chibo' wan mochi inik oksek yewal katkaloya ininyashka yehwante pa

in Wepweblo, wan yewal katka pa kiyawak pa ininkwahmilme.

²⁹Kinsasakak mochiten wan moshte siwam wan ininpilwam.

Konanak mochiten yewal katka pa kalitik pa in kalme.

³⁰Kwakin Yakob kinmili Shime'ón wan Lewí:

—Annishtalik pa polewiliste annishchiwilik pa annishkokoliske yehwante inik mochantilme pa in tal in kananeyo' wan in pereseyo'. Tehwante amo timiyak takam wan ta yehwante monichikok pa mo'onanaske ka newal, kwakin newal wan moshte pa nokal tiyeske tamiktilme.

³¹Ma yok, in omente ininpilwam kinankilik:

—Kitoloya kampa amokwal katka pa kichiwiliskya tonohni kina se siwat yewal motek ka moshte takam?

Yakob mokwep pa BetEl

35 ¹Kwakin Dyos kili Yakob: “Shimokets, shi shimochanti pa BetEl ompa shimoka. Ompa tikchiwas tanichikoliste tetelme pa Dyos yewal omoneshti kwah ticholotiyaya ka monohni Esa'ú.”

²Kwakin Yakob kinmili moshte yehwante katkaloya pa nikal: “Shikinkishtik moshte inik oksek dyose' pa antaneltokal yewal ankinpiyal anmehwante, shimatapohpowlik wan shimaltik shikintalik oksek moshashalme. ³Ma timoketsak ma tiyak pa BetEl. Ompa nihnichikos tetelme pa niktalis tamakaliste pa Dyos yewal nishpale pa in tonat kwah nikatka pa in polewiliste, yewal hanse tonatim katka ka newal kaha niyaptiyas.”

⁴Kwakin kimakak Yakob mochi in oksek dyose' yewal kinpiyaloya, wan temakak mochi inik sarsiya' yewal kiwikaloya pa ninnaka, wan Yakob kintapach itsinta tepotskwawit yewal amowEhka katka pa Sikem. ⁵Kwakin panotiyak, wan Dyos kintitanil tamaptiliste pa mochi inik Wehwepweblo' yewal katkaloya itehtenko, yok amo'ak kintohtok ininpilwam Yakob.

⁶Yakob wan moshte yehwante yaloya asik pa Luts,^o yewal niyok kitokayolti BetEl, pa in tal Kanán. ⁷Wan Yakob kinichikoo tetelme ka tatamakal pa Dyos in tal okitokayolti In-BetEl, yewal kinek kili in Dyos pa BetEl kampa ompa omoneshti Dyos kwah yewal cholowaya ka ninohni.

⁸Wan Débora omik, yewal ki'apa Rebeka, wan kitapachok itsinta tepotskwawit amo wEhka katka BetEl. Kwakin

^o 35:6 Luts in kinek kito: ka Hebreteko Wachalala.

kitokayoltik kaha kitapachok Alon-bakut yewal kinek kito in tepotskwawit kaha chokaloya.

⁹Kwah walmokwep Yakob pa Padán-aram, oksep omoneshti Dyos wan kimashti ¹⁰Dyos kili: “Ti'itok Yakob, ma yok yahmo ti'itokas Yakob. Ti'itokas Isra'El.” Kwakin Dyos okitokayolti Isra'El.

¹¹Wan Dyos kili: “Newal niDyos kipi chikawaliste. Shikinpi mopilwam wan shimomiyaptik. Pa tewal kisas se pweblo ka masewalme, wan takwitap yeske myak tanichikolme ka masewalme wan ika mokolinchim yeske reye'. ¹²In tal yewal onihmak AbRaham wan Itsak, nimishmak tewal niyok, wan ninkinmakas in tal mokolinchim yewal takatiske kwah timiki.” ¹³Kwakin Dyos panoti kaha Yakob kaha tahtowaya inak yewal.

¹⁴Kikets Yakob se tet kina se taneshtiliste. Ompa kaha Dyos tahtowaya inak yewal. Wan kitekili nihugoUbaBino wan kishawili aseyte ipa tet, ¹⁵ompa kaha Dyos okitakichil yewal, Yakob okitokayolti BetEl.

Miki Rakel

(Ip. 35:23-26) (1Ta-m. 2:1-2)

¹⁶Panotiyak pa BetEl. Kwah amo wehkA katkaloya pa asiloskya pa Eprata, kwah Rakel okitakatilti nikonTakat, wan hyero kitakokolti. ¹⁷Kwah kipanowaya takokoliste pa kitakatiltiskyta, in siwat tapahti kili: “Amo shimomapti; kampa tikpiya okse mokonTakat!” ¹⁸Kwah Rakel miktiyaya, wan tamtiyaya ni'ihyo okitokayolti Ben-oní, ma yok nitats Yakob, okitokayolti BenYamín.

¹⁹Yok miki Rakel, wan kitapachok pa ot yewal ya pa Eprata, wan niyok itok BetLéhem. ²⁰Pa in tal kaha kitapachok kikets Yakob se tet weyak, wan pa ashka nestik nitaneshtiliste kaha kitapachok Rakel.

²¹Isra'El okonan ni'ot wan kikets nikal tachiwal ka shashal tilawak ompa Migdal-Éder. ²²Kwah mochantiyaya Isra'El ompa pa tal, okalak Rubén nikon we kaha katka Bilha, wan Rubén omotek inak kwah panok myak tonatim kimat Isra'El.

Kinpiyaya Yakob 12 ininpilwaTakam:

²³Ininpilwam Le'a ye Rubén, yewal otakat ta'ishpa in oksek yek Shime'ón, Lewí, Yehudá, Isakar wan Sabulón.

²⁴Ininpilwam Rakel yek Yosé wan BenYamín.

²⁵Ininpilwam Bilha, nitikipanol siwat Rakel, yek Dan wan Neptalí.

²⁶Ininpilwam Silpa, nitikipanol siwat Le'a, yek Gad wan Asher.

Inik yek ininpilwam Yakob yewal kitakatiltik ompa Padán-aram.

²⁷Omakwep Yakob pa nikal nitats Itsak yewal katka pa Mamré, amo wEhka kaha katka Arba, yewal niyok itok, Hebrón, katka kaha mochantiyaya Itsak wan AbRaham.

²⁸Oyolti Itsak 180 shiwim ²⁹kwakin omihyot wan omik, kimaní omonichik ka niwichalme yewal mikik. Omochi awel Itsak ompa oyol myak tonatim, kitapachok ininpilwam Esa'ú wan Yakob.

Nikolinchim Esa'ú

(Ip.^P 36:10-14) (1Ta-m.^q 1:35-37)

(Ip. 36:20-28) (1Ta-m. 1:38-42)

36 ¹Inik yewal nikolinchim Esa'ú, yewal niyok itoka Edom.

²Okinonan Esa'ú ininsiwam takatilme ininpilwam kananeyo': ye Ada, nikon Elón in heteteko; wan Oholibamá, nikon Haná wan Sibeón in heweteko; ³niyok omonamikti ka Bashemat, nikon Yishma'El katka ninohniSiwat Nebayot.

⁴Esa'ú ina yek ininpilwam: inak Ada okintakatilti Elifas; Bashemat, okintakatilti RehuEl; ⁵wan Oholibamá, okintakatilti Yehúsh, Yálam wan Kora. Inik yek ininpilwam Esa'ú yewal okintakatilti pa Kanán.

⁶Okinwik Esa'ú ininsiwam, ininpilwaTakam, ininpilwaSiwam, wan moshte yehwante mochantiloya pa nikal, wan niyolikilme wan mochi tekwanim kintikipanol takam wan mochi pa kishki tapiyaya pa in tal Kanán, wan panoti pa okse tal yok moseseman ka ninohni Yakob. ⁷Yehwante in omente tapiyaloya miyak wan amokwal pa mochantiloskya se ka okse; kampa yok amo kipiyaloya ten kikwaloskya in yolikilme. ⁸Yok Esa'ú, oy omochanti talTepet pa Se'ir, yewal niyok itoka Edom.

^P 36:0 Ip. in kinek kito: Ipewaliste/Genesis.

^q 36:0 1Ta-m. in kinek kito: 1 Tapowaliste melawak/1 Cronicas.

- ⁹Ina yewal nikolinchim Esa'ú, in edomteko', yehwante mochantik talTepet pa Se'ir. ¹⁰Ni'itokalme ininpilwam Esa'ú: Elifaz nikon Ada, yewal ye nisiwa Esa'ú; RehuEl nikon Bashemat, wan nisiwa Esa'ú.
- ¹¹Ininpilwam Elifaz yek Temán, Omar, Tsepó, Gatam, wan Kenas.
- ¹²Elifaz nikon Esa'ú niyok kipiyaya okse nikon, nisiwa itoka Timená, yewal okitakatilti Amalek.
- Moshte inik yek nikolinchim Ada, nisiwa Esa'ú.
- ¹³Ininpilwam RehuEl yek Náhat, Séra, Shamá wan Misa. Inik yek nikolinchim Bashemat, nisiwa Esa'ú.
- ¹⁴Inik ininpilwam Oholibamá nisiwa Esa'ú, nikon Haná yewal katka nikon Sibeón, wan okintakatilti Esa'ú ininpilwam Yehúsh, Yálam wan Kora.
- ¹⁵Inik yek wehwe nikolinchim Esa'ú:
Elifas, ye nikon we Esa'ú, wan ininpilwam Elifas mochiwak tatakewalme Temán, Omar, Tsepó wan Kenas, ¹⁶wan Kora, Gatam wan Amalek. Inik yek tatakewalme ka Elifas pa in tal Edom, ina yek nikolinchim Ada.
- ¹⁷Okse nikon RehuEl, nikon in Esa'ú, wan ka ininpilwam RehuEl mochiwak tatakewalme Náhat, Séra, Shamá wan Misa.
Inik yek intintatakewalme ka ininpilwam RehuEl pa in tal Edom, wan inik nikolinchim Bashemat wan nisiwa Esa'ú.
- ¹⁸Esaú wan nisiwa Oholibama, ininpilwam mochiwak tatakewalme Yehúsh, Yálam wan Kora. Ina yek tatakewalme nisiwa Esa'ú, Oholibamá ye nikon Haná.
- ¹⁹Ina yewal nikolinchim Esa'ú, wan intintatakewalme yewal niyok itoka Edom.
- ²⁰Inik yek ininpilwam Se'ir in horetoko, yewal mochanti-loya pa in tal:
Lotán, Shobal, Sibeón wan Haná, ²¹Dishón, Éser wan Dishán. Ina yewal yek tatakewalme ka horetoko' ininpilwam Se'ir ompa pa tal Edom.
- ²²Ininpilwam Lotán yek: Horí wan Hemam. Timená ye ninohniSiwat Lotán.
- ²³Ininpilwam Sobal yek: Alwán, Manáhat, Ebá, Tsepó wan Onam.

²⁴Ininpilwam Sibeón yek: Ayá wan Haná. In Haná yewal okit in nishtolol at ompa kaha amo'ak mochantiyaya, kaha okinwik niburro' nitats pa kikwaloskya sakat.

²⁵Ininpilwam Haná: Dishón wan Oholibamá, nikonSiwat Haná.

²⁶Ininpilwam Dishón yek: Hemdán, Eshbán, Itrán wan Kerán.

²⁷Ininpilwam Éser yek: Bilhán, Sawán wan Akán.

²⁸Ininpilwam Dishán yek: Uts wan Arán.

²⁹In wetatakewalme takam horeteko' yek: in Lotán, Sobal, Sibeón, Haná, ³⁰wan Dishón, Éser wan Dishán. Inik yek tatakewalme in takam horeteko' kina tatakewal pa in tal Se'ir.

In nireye' Edom

(Ip. 36:31-43) (1Ta-m. 1:43-54)

³¹Inik yek reye' yewal reynarok pa mochital Edom kwah ayamo'ok katkaloya reye', ininpilwam Isra'El:

³²Bela nikon Be'or, reynar pa Edom. Nipweblo we kaha reynarowaya itoka Dinhaba.

³³Kimani omik Bela, moka reynaroti Yobab nikon Séra, yewal nital pa in pweblo Bosrá.

³⁴Kimani omik Yobab, moka reynaroti Husham, yewal nital in pweblo Temán.

³⁵Kimani omik Husham, moka reynaroti Hadad nikon Bedad. In Hadad kintanili Midyán pa in tal Mo'Ab. Kwah mo'onanaloya Hadad Wepweblo kaha reynarowaya itok Awit.

³⁶Kimani omik Hadad, moka reynaroti Samlá, yewal nital in Wepweblo Masreká.

³⁷Kimani omik Samlá, moka reynaroti Sha'úl yewal nital in pweblo Rehobot katka pa itenko atenko Eprates.

³⁸Kimani omik Sha'úl, moka reynaroti Bál-hanán nikon Akbor.

³⁹Kimani omik Bál-hanán nikon Akbor, moka reynaroti Hadad. Wan nipweblo itoka Pahú. Nisiwa itoka MehetabEl, nikonSiwat Matred yewal ye nikonSiwat MeSaháb.

⁴⁰Ina ni'itokalme ka wetatakewalme Esa'ú, ka nikolinchim, wan niyok itokanilme kaha mochantiloya: Timená, Alwá, Yeter, ⁴¹Oholibamá, Elá, Pinón, ⁴²Kenas, Temán, Mibetsár, ⁴³MagdiEl wan Iram. Esa'ú niyok itokaya Edom,

wan inik yek niwetatakewalme Edom, kaha mochantiloya
wan inintalme katkaloya.

In ye Esa'ú, nitats ka in edomita'!

Yakob wan ininpilwam

37 ¹Yakob omochanti pa tal kaha mochantiyaya nitats,
pa tal Kanán.

²In tapowaliste ika Yakob wan ininpilwam.

Yosé kipiyaya 17 shiwim, kinkwitawiyaya borrego' wan chibo' ka ninohniwan, ininpilwam Bilha wan Silpa, in oksek ininsiwam nitats. Wan Yosé kinawatiyaya nitats Yakob ten amokwal yehwante kichiwaloya.

³Isra'El kitasotaya miyak Yosé amoyok miyak kintasotaya in oksek ininpilwam, kampa okitakatilti kwah Isra'El katka kolinché. Wan Isra'El kichiwil Yosé se tilma kwal nesiya. ⁴Kwah kitaloya ninohniwan itats kishki miyak kitasotaya Yosé wan yehwante amoyok kintasotaya, kwakin kikokoliloya amo kita-kichililoya Yosé.

⁵Se yowal Yosé tatemiki, kwah kinmili ninohniwan in tatemkiliste, kikwalanilik miyak, ⁶kampa kinmiliyaya:



© 1996 David C. Cook

*Yakob kitasotaya miyak Yosé amoyok kintasotaya
in oksek ininpilwam (Ipewaliste 37:3)*

—Shinishkakik, annimishtakichilis in tatemikiliste yewal nikpi. ⁷Tikatkaloya pa se tashosholtik tikiniihilpitikatkaloya trigo ka manoho. Haniman nomanoho walmokets wan moka moketstik melahka, kampa anmomanoho' anmehwante kiyawaloloya ka ninewal wan mokwalpacholoya pa ni'ishpa yewal.

⁸Kwakin ninohniwan kinankilik:

—Tihnek tikito tewal timochiwas tote, wan titichili mochi yewal tikpiyaske pa tikchiwaske?

Wan kikokoliloya miyak kina taketsaya ka nitatemikiliste ten kitemikiyaya.

⁹Kwakin oksep tatemik, wan kinmili ninohniwan in yewal ten kitemiki:

—Shitakakik oksep nitatemik, yewal pa in tatemikiliste nikitaya in tonat, in meste wan 11 sitalme mokwalpacholoya no'ishpa newal.

¹⁰Wan kitakichil nitats in tatemikiliste wan ninohniwan, nitats ki'ahwa kili:

—Ten tatemikiliste yewal ten tiktemik? Melak timotankwaketsaske mo'ishpa tewal monantsi wan newal wan niyok monohniwan?

¹¹Wan ninohniwan ki'ihyaloya, kampa kinekiloya yeloskya kina Yosé, ma yok nitats ki'ilnamikiyaya miyak in tatemikiliste.

Ninohniwan kinamakal Yosé

¹²Se tonat, ninohniwan oyak takwitawik niborrego' nitats kaha tashosholtik pa Sikem. ¹³Wan Isra'El kili Yosé:

—Kina tihamat, monohniwan ompa takwitaptikat inik borrego' pa Sikem. Shiwal, wan nimishtakeptik pa tiyas ka yehwante.

Kinankili Yosé:

—Kwal onka.

¹⁴—Shi shikinmit ta kwal kat monohniwan wan in borrego' wan hani shiwal mokwep pa tinishnawatis.

Wan okitetan Isra'El pa in ishtawak Hebron, wan Yosé asi pa Sikem. O'as Yosé pa Sikem, ¹⁵wan se takat okit nehnemiti-katka pa in ishtawak ompa wan kitahtinili:

—Ten tiktemotik?

¹⁶Yosé kinankili:

—Nikintemotik nonohniwan. Shinichil kaha takwitaptikat borrego'?

¹⁷Kinankili in takat:

—Panotiyak. Ompa onikinkak mo'ililoya ma tiyak pa Dotán.

Yosé kintemotiyaya ninohniwan, wan kinmit pa in pweblo Dotán. ¹⁸Kwah yehwante kitak walaya wEhka Yosé, kwah aya-mo'ok asiyaya yehwante motakichililoya kina kwal kimiktiloskya. ¹⁹Mo'ilik sek ka oksek:

—Pa wal in tatemikiliste. ²⁰Ma tihmiktik wan ma tiktasak pa se takoyonke, wan tikinmiliske moshte kikwa se tekwan yolil pa kwawim. Kwakin tikitaske kina tamis nitatemikiliste!

²¹Kwah kikak Ruben in, kinek kipale ka ninohniwam, kinmili:

—Amo tihmiktiske. ²²Anmehwante amo ankimiktiske.

Shiktasak pa in takoyonke pa se tal kaha tawak, wan amoten shikchiwilik.

Kinmili Rubén kampa yewal kinek kipalewiskya Yosé pa yok kiwikaskya ka nitats.

²³Kwah o'as Yosé ka ninohniwan, kikishtilik nitilma kwal nesiya yewal nitats kichiwiliya yewal kikimtiyaya, ²⁴kikitskik wan kitasak pa in koyonke katka wak wan amo kipyayaya at. ²⁵Wan motalik tawak ninohniwan. Kwah takwatikatkaloya kinmitaloya astiwalaloya kameyo' tamantiwalaloya in takam katkaloya yishma'elteko' walaloya pa Gile'ad. Tamantiwalaloya in kameyo' ahwiyaliste, kopal wan in chichik itok mira ka



© 1996 David C. Cook

*Ninohniwan Yosé kitasak pa takoyonke
katka wak (Ipewaliste 37:24)*

shochim wan kwawin ahwiyalme yewal ka tapahtilme, yaloya pa Egipto.²⁶ Wan Yehudá kinmili ninohniwan:

—Ten tihtaniske ta tihmiktik tonohni wan kina tiktatiske, ta tihmiktik?²⁷ Ma tikinnamakiltik in takam yishma'elteko'; amoten tikchiwiliske. Shikilnamikik yewal tonohni.

Mokawak ka se tahtoliste ninohniwan,²⁸ kwakin kwah panotiyaloya in takam midyanteko', kikishtik Yosé ninohniwan pa in koyonke wan kinnamakiltik pa 20 tomiplata. In yishma'elteko' wan yehwante kiwikak pa Egipto.

²⁹ Mokwep Rubén pa in koyonke wan tachi ompa amoten katka Yosé, kwakin kitsayani nishashalme.^r ³⁰ Mokwep kaha katkaloya ninohniwan, kinmili:

—In takatYankwik yahmo ten onka! Ashka ten nikchiwas?

³¹ Kwakin konanak itakemtel Yosé, kimiktik se chibo, wan kishashawilik yEste tilma. ³² Mokwepak ka itats kineshtilik tilma: “Tikitak in. Shikit ta nitilma mokon.”

³³ Yakobo haniman ki'ishmat, kito: “Haha, ina yewal nitilma kwal nokon! Se tekwan kikwa nokon Yosé wan kichiwil tahtahko!” ³⁴ Wan kitsayani nishashalme^s Yakob wan motakemilti ka shashalme til-tik, yok ki'ahkok pa myak tonatim kikokowaya niyol.

³⁵ Moshte ininpilwaTakam wan ininpilwaSiwam walaloya kiyolsewiloya, ma yok yewal amo kinekiya moyolsewiskya yok kitowaya: “Nikchokilis nokon hanse tonatim, kimani nimikis nitemos pa She'ol^t kaha kat mimihke kaha onka nokon.” Wan nitats kichokiliyaya.

³⁶ Asik pa Egipto, in takam madyanteko' wan kinamakiltik Potipar, Potipar in wetatakewan katka nitikipanol para'ó katka niwetatakewan gwacho'.



© 1996 David C. Cook

*Yakob ki'ishmat nitilma
Yosé (Ipewaliste 37:32)*

^r 37:29 Kitsayani nishashalme in kinek kitos, se tanestiliste ka tayolkokoliste.

^s 37:34 Kitsayani nishashalme in kinek kitos, se tanestiliste ka tayolkokoliste.

Yehudá wan Tamár

38

¹Pa inik tonatim, Yehudá kinka ninohniwan wan oy omochanti inak se adulamteko, itoka Hirá. ²Ompa Yehudá ki'ishmat se siwat, nikonSiwat se takat kananeyo itoka Sú'a, omonamikti Yehudá inak yewal, ³o'osti ta'apa nisiwa wan okitakatilti se nikonTakat, yewal kitokayolti Er. ⁴Oksep o'osti ta'apa wan okitakatilti okse nikonTakat, yewal okitokayolti Onán. ⁵Wan okipi okse nikon, yewal kitokayolti Selá, Yehudá katka pa in pweblo Kesib kwah takati Sela.

⁶Kikonanil Yehudá se siwat itoka Tamár, pa monamiktiskya nikon we Er. ⁷Wan Er, nikon ta'ishpa Yehudá katka se takat amokwal, yok in WeTatsDyos kikishtili niyoliliste. ⁸Kwakin Yehudá kili Onán: "Shimonamikti ka nisiwa monohni, kina kimatil kichiwal kwah miki se ninohni pa yok kinpiyas nikolinchim mopa tewal." ⁹Ma yok kinatiya Onán kampa amo yesloskya nikolinchim yewal. Kampa yok kwah motekaya inak yewal, tanokiyaya talpa pa amo kipiyaskya nikon, wan yok amo kipiyaskya nikolinchim ninohni mihke. ¹⁰Wan in WeTatsDyos, amokwal okit kina okichi Onán, wan niyok kikishtil niyoliliste. ¹¹Kwakin Yehudá kili nisiwamon Tamar: "Shimoka pa nikal motats, pa kimani mo'apawa nokon Selá." Kampa yewal tamat: Aso niyok miki kina ninohniwan. Yok Tamár panoti wan oy omochanti ka nitats.

¹²Panok myak tonatim, wan omik nisiwa Yehudá, yewal nikonSiwat Sú'a. Kwah otam okichokil, Yehudá panoti pa in pweblo Timenat kaha katkaloya in takam kinshimtikatkaloya niborrego'. Wan ninihni Hirá, in adulamteko kitokatiya.

¹³Kinawatik Tamár kampa nimontats panoti pa Timenat pa kinshimaskya niborrego', ¹⁴kwakin mokishtil nishashalme wan kati motakemiltiloya siwam yewal kwah mikiloya intintaka inintawikal, kitapach itsontek ka se rebos pa yok amo'ak ki'ishmatiskya, kwakin omotal pa in ot kaha kalakil pa in pweblo itoka Enayim, yewal onka pa in ot Timenat. Tamar okit kina omo'apawaya Selá, ma yok Yehudá amo kimak Selá pa yok yeskya nitaka.

¹⁵Wan Yehudá okit kwah panotiyaya wan mo'il pa niyol yewal siwat motek ka moshte, kampa tapachotikatka nishayak.

¹⁶Kwakin sela mochi pa ot pa ki'asiskya yewal wan kili:

—Shimotemak pa nimotekas ka tewal. Kampa amo kima-
tiya kampa yewal katka niswamon.

Wan yewal kili:

—Wan ten tinishmakas ta nimotemak pa timotekas ka newal?

¹⁷Yewal kinakili:

—Nimishtitanilis se chibo yewal nikinpi pa noyolikilme.

Wan yewal kinankili:

—Shinishkawil pek ten ka tewal kampa nihmatis ta melak
tishwaltitanilis.

¹⁸ Wan Yehudá kili:

—Ten tihnek pa nimishmakas?

Wan Tamár kinankili:

—Moseyo kipi ikpal, wan mobara yewal tihwik.

Wan Yehudá okinmak, wan omotek inak yewal, wan
pa yewal ta'apa. ¹⁹Kwakin omokets, haniman panoti wan
mokishtil yewal ka tapachotiyaya, wan omotakemilti oksep ka
ishashalme kina se siwat mihki nitaka.

²⁰O'as Yehudá kaha nitanichikolme, konan se chibo wan
kititanili in siwat inak in ninihni in adulamteko, pa yok
kiwalkwepaskya oksep inik yewal kikawil in siwat; ma yok amo
kit in siwat. ²¹Kintahtanili inik takam yehwante ompa katkaloya:

—Kaha onka in siwat yewal motek ka moshte takam nika
pa Enayim, yewal katka pa sela in ot?

Yehwante kinankilik:

—Nika amo onka siwat yewal motek ka moshte takam.

²²Ninihni mokwep kaha katka Yehudá kili:

—Amo nikit yewal. Nichilik in takam yewal mochantil
ompa amo katka se siwat kina yewal.

²³Wan Yehudá kito:

—Ma motakawil ka yewal ten nihkawil. Pa amo'ak wetskas
pa tehwante. Kampa melak newal nikttanil in chibo, wan
tewal amo tikit.

²⁴Panok yey mestim, wan kinawatik Yehudá, kilik:

—Tamár mosiwamon motek ka oksek takam, wan ashka
ostitik ta'apaktik.

Kwakin Yehudá kinmili:

—Shihkishtik shikchichinok ma mik!

²⁵Kwah kikishtitiyaloya yewal tatitan pa kinawatilosksya
nimontats: “Nimishtahtani, shikit akyewal niseyo kipi ikpal,
wan in bara, yewal nishta'apawilti.”

²⁶ Kimani Yehudá kinishmat wan kito: “Yewal okichi kwal wan newal amokwal onikchi, kampa amo nihnamikti inak nokon Selá.” Wan amo’ik oksep omotek inak yewal.

²⁷ O’as in tonat yewal takatilosky, wan katkaloya omente piltontim pa’itik yewal. ²⁸ Kwah takatitiyaloya se kikishti nimahwa; kwakin in siwatTapahti ki'ilpil se ikpal chichiltik pa nimahwa wan kito: “In okis ta'ishpa.” ²⁹ Oksep kikaklaki nimahwa in piltonte, kwakin okis ninohni. Wan in siwatTapahti kito: “Kina otikchi pa tikisaskya!” Wan kitokayolti Perets.^u ³⁰ Kwakin kis ninohni, yewal kipiyaya ta'ilpil pa nimahwa in ikpal chichiltik, wan kitokayoltik Séra.

Yosé wan nisiwa Potipar

39 ¹ Asik pa Egipto in takam, yishma’elteko’ wan kinamakiltik Potipar, Potipar in wetatakewan katka nitikipanol paraó katka niwetatakewan gwacho’. ² Kampa in WeTatsDyos katka ka Yosé wan kwal kiwikaya. Kwah mochantitikatkaya ka in egyptiyo niwetatakewan, ³ kwah okit niwetatakewan kina katka in WeTatsDyos wan kina kipalewiyyaya Yosé pa mochiten kichiwaya kisaya kwal. ⁴ Kwakin Potipar kitaya Yosé kina kwal kichiwaya, kitokayolti pa nikal kampa okitake pa takwitaptiyaskya mochi kishki tapiyaya. ⁵ Pa in tonat kima-ni Potipar kitakawili pa kikwitaptiyaskya nikal wan pa mochi kishki tapiyaya. Wan in WeTatsDyos kimashiyaya Potipar, yok kina pa nikal wan yok kina pa nitashosholtik. ⁶ Yok Potipar in egyptiyo okitakawil pa takwitaptiyaskya Yosé pa



© 1996 David C. Cook

*Potipar mokowil Yosé kina niti-
kipanol (Ipewaliste 39:1)*

^u 38:29 Perets in kinek kito: okichi otitonte.



© 1996 David C. Cook

Nisiwa Potipar kikweso Yosé (Ipewaliste 39:7)

mochi kishki tapiyaya, yahmo kimatiya pa kishki tapiyaya han-wel ten kikwaskya.

Yosé katka se takat kwal tachiyaya. ⁷Kwah panok myak tonatim, nisiwa niwetatakewan kwal okit Yosé wan kili:

—Shimotek nonak.

⁸Yosé amo kinek wan kili:

—Ka newal onka mochi yewal niyashka nowetatakewan pa nikal, wan yewal amoten ki'ilnamik pa nikal mochi yewal nishtake niyashka pa nikitatiyas. ⁹Amo onka okse yok wetatakewan kina newal. Wan amoten nishtatsotili pa kishki tapi, kampa hanwel tewal, kampa tewal ti'isiwa. Kina kwal nikchiwaskya ten amokwal wan nimokatsawiliskya inak Dyos?


¹⁰Hanse tonatim tahtowaya ka Yosé amo kinek motek ka yewal, amo momakawilti pa yeskyia ka yewal.

¹¹Pa se tonat, Yosé kalak kalitik pa kal pa kichiwaskya nitikipanoliste, amo'ak katka pa kalitik. ¹²Wan in siwat kikitski Yosé pa nishashal kili: “Shiwal shimotek nonak!” Ma yok Yosé, kikawil nishashal pa nimahwam in siwat, motal pa kiyawak in kal. ¹³Kimani yewal okit kina okikawil nishashal pa nimahwam wan motaloti okis pa in kal, ¹⁴in siwat okinnots yehwante tikipanolme pa in kal wan kinmili: “Shikitak!, in hebreteko yewal notaka otishwalikil kinekiya tishpenawaltiskyia tehwante. Okalak nika kinek motekaskya nonawak, wan wehwe nitsats. ¹⁵Kwah nishkak nitsats, kika nishashal ka newal wan motaloti pa kiyawak.”

¹⁶ Wan yewal okital nishashalme Yosé sela pa kimani nita-ka walmokwepaskya icha. ¹⁷ Kwakin kinawati kili: “In tikipa-nol hebreteko yewal titishwalikil oval ka newal kinek omotek nonawak. ¹⁸ Kwah nitsats pa nishpalewiloskya, okika itakemtel nahnewal wan omotal pa kiyawak.”

¹⁹ Kwah niwetatakewan kikak kina kitakichili nisiwa, yok onishchiwil motikipanol, yewal hyero kwalan ²⁰ kikitskik Yosé kitsakwak pa in kalitik kaha kintsakwaloya yehwante nitakam in we para’o.

Ompa kitsakwak Yosé ²¹ katka WeTatsDyos inak Yosé kaha tatsakwal wan ki’ihniliyaya. Okichi kampa kwal kiwetsiskya in wetatakewan pa in tatsakwal, ²² niwe nitatsakwalme kimak Yosé pa kinkwitawiskya moshte yehwante ompa kat-kaloya, kitaliyaya Yosé pa kinkwitawiskya mochi in tikipano-liste yewal mochiwaya ompa kalitik. ²³ In wetatakewan kaha tatsakwal amo monekiya pa takwitawiskya, amoten pa kish-ki takwitaptikatkaya Yosé kampa katka in WeTatsDyos inak yewal, wan kiyawiya kwal pa mochiten yewal kichiwaya.



© 1996 David C. Cook

Yosé kikalaktik kaha kintsakwal (Ipewaliste 39:20)

Nitatemikiliste in kopero wan in panadero

40

¹Panok tonatim, ka in wetatakewan in kopero wan ka in wetatakewan panadero pa in werey Egipto kichiwak ten amokwal ika in tats. ²Wan in okwalan ka in omente tatakewalme, inak in wetatakewan kopero wan in wetatakewan panadero, ³wan tatake pa kintsakwalosky a kaha tatsawal katka Yosé, pa nikal niwetatakewan gwacho'. ⁴In wetatakewan gwacho okitake Yosé pa kinkwitaptiyaskya yehwante wan yewal kintikipanoliyaya wan yehwante oyek miyak tonatim tatsakwalme.

Wan yehwante miyak tonatim tsaktiyak, ⁵ompa pa in tatsakwaliste, pa se yowal in kopero wan in panadero ka in werey pa Egipto, kipiyak pa sesen se tatemikiliste pa se yowal wan pa sesen kipiyaloya ten kinek kitosky. ⁶Kwah Yosé oval okinmit pa watsinko, okinmit, wan kampa moyokoltitikatkaloya, ⁷kwakin kintahtanili inik wetatakewalme para'ó yewal katka-loya tatsakwalme kina yewal pa nikal in Tats:

—Pates anmoshayak amokwal nesil?

⁸Yehwante kinankilik:

—Moshte omente titatemikik wan amo'ak onka ak tishnawati ten kinek kito totatemikiliste.

Kwakin Yosé kinmili:

—Han Dyos yewal kipi chikawaliste pa tishmashtis ten kinek kili se tatemikiliste. Shichilik ten ankitemikik?

⁹Kwakin in wetatakewan ka in kopero kitakichili Yosé ten kitemiki:

—Pa notatemikiliste nikit se kwahmil ka uba' pa no'ishpa, ¹⁰pa in uba' katkaya yey tsimolinke uba'. Kikisaya nishoch; wan hani nitaki yoksiyaya. ¹¹Nikpiyaya pa nomahwa nitapalkatonte para'ó. Nihkitske in uba', nikpatska nihugoUba pa in tapalkatonte, wan niktal pa nimahwam para'ó.

¹²Kito Yosé:

—In kinek kili: in yey tsimolinke kat yey tonatim. ¹³Ma yok kwah panoske yey tonatim mishkishti para'ó wan mishtali oksep pa tiktikipanoli. Wan tiktali nitapalkatonte pa nimahwa para'ó, han kina tikchiwiliyaya, kwah tikatka nikopero. ¹⁴Kwah yok motachiwas in newal nimishtahtani kampa shinishihnil. Wan shikilnamikiltil nahnewal in para'ó pa yok nishkishti pa in tatsakwal. ¹⁵Kampa newal nishishtikik, pa in tal hebreteko!. Wan amoten onikchi pa nishtsakwalosky!

¹⁶Kwakin in panadero in wetatakewan kikak kina kili Yosé in kopero kina kwal katka tatemikiliste yewal kitakichiliya Yosé kili:

—Newal niyok nitatemik. Nikinmit yey chikiwim pa notson-tek ka pan. ¹⁷Pa in chikiwit katka takpak, katka ka miyak kwal nesiloya pane' ka in para'ó, wan inik totom walaloya kikwaloya inik pane' pa in chikiwit yewal katka ipa notsontek.

¹⁸Kito Yosé:

In kinek kito:

—In yey chikiwim kat yey tonatim. ¹⁹Kwah panoske yey tonatim, in para'ó mishkotonili moshontek misalo pa se kawwit, wan totom kikwaske monaka pa mokwerpo monakayo.

²⁰Kwakin pa yey tonatim katka in tonat yewal nitakatiliste para'ó, wan temak miyak takwaliste pa mitotiliste pa mosh-te inik inintikipanolme wetatakewalme. Tatake kinkishtik in wetatakewan kopero wan in wetatakewan panadero yehwante katkaloya tatsakwalme kinwalikak ininishpa inik inintikipanolme wetatakewalme. ²¹Kikwpil in we kopero pa kitikipanolli wan yok oksep kital nitapalkatonte pa nimahwam para'ó pa koniskyia nihugoubaBino. ²²Ma yok kisal pa se kwawit in we panadero han kina kili Yosé, kwah kinawat ten kinek kitoskyia nitatemikiliste. ²³Ma yok, in we kopero amo ki'ilnamik Yosé, ki'ilka.

Itatemikiliste para'ó

41 ¹Yok panok ome shiwim, wan se yowal tatemiki para'ó: Omo'it moketstikatka itenko atenko Nilo ²okit kampa, kisaloya pa atenko chikome baka' wan tohtomawak kikwatikatkaloya sakat. ³Haniman takwitap yehwante kisak oksek chikome baka', pa atenko Nilo pihpitsawak wan hyero nesiloya, moketsak itenko atenko Nilo, nahyehwante baka' kwal nesiloya. ⁴Wan in baka' pihpitsawak wan hyero nesiloya kinkwaloya in chikome baka' kwahkwalme wan tohtomawak!

Haniman para'ó wal o'is. ⁵Oksep walkoch para'ó, wan oksep tatemiki: Kinmit chikome trigo, wehwe wan kwahkwalme, mo'apawaloya miyak pa se nitankwa. ⁶Wan haniman kisaloya oksek chikome trigo, pihpitsawak kwihkwitanki kampa walyehyekaya kaha walkis tonat. ⁷Wan in chikome trigo pihpitsawak kinkwaloya in chikome trigo kwal nesiloya!

Temtikatkaloya ka trigo wan o'is para'ó amo kimatiya ten kinek kitoskyia nitatemikiliste. ⁸Watsinko, amokwal

nesiya hyero tamatiya yok kina tatemikiyaya, kwakin tatake pa walaloskya moshte in tashoshanilme wan in takam kimatiloya ten panoskya pa in Egipto, kintakichili nitatemikiliste. Ma yok amo'ak kinawatiyaya ten kinek kitoskya. ⁹Kwakin in wetatakewan kopero wan kili para'ó: "Ashka nikilnamik ten yewal amokwal nikchi. ¹⁰Se tonat kwah kwalan para'ó ka inintikipanolme, wan otishtsakwa newal wan niyok in wetatakewan panadero', pa nikal in wetatakewan gwacho'. ¹¹Pa se yowal, titatemikik moshte omente, ka sesen tehwante tikpiyaloya se ka okse tatemikiliste. ¹²Katka ompa se takatYankwik se hebreteko, katka ka tehwante, nitikipanol in wetatakewan gwacho'. Tiktakichilik totatemikiliste, wan yewal tichili ten kinek kitoskya. ¹³Wan yok motachi yok kina otichil! Newal nishtalik oksep kaha notikipanol, wan in okse kisalok."

¹⁴Kwakin tatake para'ó pa kiwalikaloskya Yosé, hanimam kikishtik kampa tsaktikatka. Kwakin moshim wan mali yok motakemilti okse nishashal, wan yok oy ka para'ó, ¹⁵para'ó kili Yosé:

—Nikpi se tatemikiliste amo onka amo'ak nishnawatis. Kampa nitakak kwah tewal tihkak se tatemikiliste, tihamat ten kinek kitos.

¹⁶Yosé kinankili para'ó:

—Ma yok amo pa newal onka, Dyos kimakas para'ó se tanankiliste kwal.

¹⁷Kwakin para'ó kili Yosé:

—Pa notatemikiliste, onimo'it nimoketstikatka pa itenko in atenko Nilo. ¹⁸Pa in atenko walkisaloya chikome baka' hyero tohtomawak wan kwal nesiloya, takwatikatkaloya sakat pa itenko in atenko. ¹⁹Haniman takwitapit ka yehwante kisaloya oksek chikome baka' pihpitsawak hyero nesiloya. Yok amo'ik ninkinmitaya baka' hyero nesiloya pa in tal Egipto! ²⁰Kwakin in baka' pihpitsawak hyero nesiloya, kinkwaloya in chikome baka' yehwante tohtomawak. ²¹Ma yok, kwah tamik kinkwak, nesiloya han amoten kikwaloya, yok han pihpitsawak katkaloya hyero nesiloya. Kwakin niwal is.

²²"Nikpi okse tatemikiliste: Niyok pa notatemikiliste ninkinmit chikome miyawalme trigo, temtikatkaloya ka trigo kwal nesiloya mo'apawaloya pa se nitankwa.

²³Haniman takwitapit kisak oksek chikome miyawalme katkaloya kwihkwitanki, tachichinolme kampa yehyekaya totonke kampa walkis in tonat.

²⁴Wan in miyawalme pihpitsawak kinkwaloya in chikome miyawalme kwal nesiloya. Nikintakichili in tashoshanilime, wan amo'ak kimat ten kinek kitos."

²⁵Kwakin Yosé kinankili para'ó:

—Melawak, in ome nitatemikiliste para'ó onka pa se. Dyos kinawati ten kinek kichiwas. ²⁶In chikome baka' kwal nesiloya chikome shiwim. Wan in chikome miyawalme kwal nesiloya niyok chikome shiwim. Inik tatemikiliste in pa se han. ²⁷Inik chikome baka' pihpitsawak wan hyero nesiloya, yewal takwita-pit waltakisaloya ka yehwante, chikome shiwim wan niyok in chikome miyawalme pihpitsawak wan tachichinolme ka yeh-yekat totonki kaha takis tonat yok yeske chikome shiwim ka mayanaliste.

²⁸Yok nihnankili para'ó, Dyos kineshtili ten para'ó ten kichiwas. ²⁹Walaske chikome shiwim kwah moshte tapishkaske miyak pa mochi in tal Egipto, ³⁰kwakin walaske chikome shiwim ka mayanaliste, wan ki'ilkawaske mochi in miyak tapishkaliste yewal katka. Kwakin in mayanaliste kishitinis in tal! ³¹Kampa yes miyak mayanaliste, yahmo ki'ilnamikiske in miyak tapishkaliste. ³²Wan para'ó kipi ohpa tatemikiliste kampa melak Dyos yok kichiwas, amo wehkAwas pa yok motachiwas.

³³"Ashka, ma kitem para'ó se takat kimat hani motanishtili, se takat yewal hanse tonatim kimatitiyas ten monek pa kichiwas, wan shiktal ipa mochi in tal Egipto. ³⁴Ma kintal para'ó wetakwitawilme ma yak pa mochital Egipto, ma konanak pa sesen makwil kostal se han ka in tapishkaliste kwah yeske in chikome shiwim ka miyak tapishkaliste.

³⁵Monek pa ankinichikoske mochi in trigo wan oksek shinaste pa inik shiwim ka miyak tapishkaliste shihwikak pa nichahpilme para'ó wan shikahkokik pa kishki Wehwepweblo', ka kintamakaske masewalme.

³⁶Kampa yewal ta'ahkokil yes ten kikwaske pa mochital pa kwah asiske inik chikome shiwim ka mayanaliste, pa yok in masewalme amo mikiske ka mayanaliste."

³⁷Yok para'ó kwal kikak nitahtol Yosé wan moshte inik tikipanolme wetatakewalme. ³⁸Wan para'ó kintahtanili:

—Aso tikitaske okse takat kina yewal, kipi pa'itik ni'Espíritu Dyos?

³⁹Yok para'ó kili Yosé:

—Dyos mishmashti mochi in, se takat kimat hani motanishtili amo onka okse yok kina tewal, se takat yewal hanse tonatim kimatitiya ten monek pa kichiwas.⁴⁰ Nimishtalis niwetatakewan nokal wan moshte masewalme mishmawishtilityaske, pa mochiten tikintakiptiyas. Tewal tikpiyas chikawaliste, hanwel newal nikpiyas we chikawaliste ipa tewal, kampa newal niwerek.

Yosé wetatakewan ipa mochital Egipto

⁴¹ Wan niyok para'ó kili Yosé:

—Nimishtali niwetatakewan ipa mochital Egipto.

⁴² Kwakin para'ó mokishtil ni'aniyo yewal kiwikaya wan okitalil Yosé. Kitakemilti ka takemtel tachiwal ka lino, wan kita-lil se koskat tachiwal ka oro.⁴³ Wan Yosé kitehkolti pa se yawal-tik tatilanl ka kabayo' yewal takwitap kitokatiwalaya yewal wan yok tatake pa tsatsilosky: "Shimotankwaketsak!" Yok para'ó kitali ipa mochital Egipto.

⁴⁴ Wan para'ó kili Yosé:

—Newal nipara'ó, amo'ak pa mochi Egipto ki'olini nimahwa wan niyok nitankwa, ta tewal amo tикинмакавалти.

⁴⁵ Para'ó kitokayolti Yosé, Tsapenat-panéha; wan kimak Asenat, nikonSiwat Potipera, totats in On pa yeskya nisiwa Yosé. Wan nehnemtinem Yosé ipa mochital Egipto.⁴⁶ Kipiyaya Yosé 30 shiwim kwah kiwikak ka para'ó, in weRey pa Egipto.

Wan okis Yosé kaha katka para'ó, wan nehnemtinem pa mochital Egipto.⁴⁷ Pa in chikome shiwim ye miyak tapishkaliste,⁴⁸ kinichiko Yosé mochi in tapishkaliste pa in chikome shiwim, kimani tapishkaloya miyak wan ki'ahkokiloya tapishkaliste pa in kwahmilme kitaliyaya pa inik Wehwepweblo' yewal amo katkaloya wEhka kampa katkaloya in kwahmilme.⁴⁹ K'i'ahkoki Yosé miyak trigo, yok kina shal pa itenko in we'at. Kampa amokwal kina kipowalosky!

⁵⁰ Pa in tonatim kwah astiwalaloya in shiwim kampa yeskya in mayanaliste, Yosé nisiwa Asenat, okintakatilti ome ininpilwaTakam Asenat ye nikonSiwat Potipera in totats On.

⁵¹ Yosé nikon yewal okitakatilti ta'ishpa kitokayolti Manashé, kampa kito: "Niktokayolti yok kampa Dyos nishilkawilti mochi noyolkokoliste yewal nidan, wan moshte pa nikal notats."

⁵² Okse nikon okitokayolti Eprayím, wan kito: "Kampa Dyos nishneshti kina se kwawit kimat taki pa in tal kampa newal onipan noyolkokoliste."

⁵³Kwakin tamik in chikome shiwim ka miyak tapishkaliste pa in tal Egipto ⁵⁴kwakin asiyaya in chikome shiwim ka mayanaliste, kina kinmili Yosé. Katka mayanaliste pa mochital ma yok pa in tal Egipto katka pan. ⁵⁵Kwah moshte yehwante pa Egipto mayanak, in masewalme kitsatsilik para'ó pa kinmakaskya ten kikwaloskya. Wan para'ó kinmili moshte in egyptiyo': "Shiyak ka Yosé wan shikchiwak kina anmichili."

⁵⁶Wan kimani o'as in mayanaliste pa mochi in tal, kwakin kin-tapo Yosé in kalme kaha kinahkokiloya in trigo wan kinnamakilti in egyptiyo' kampa katka miyak mayanaliste pa Egipto. ⁵⁷Wan pa mochi in oksek talme walak pa Egipto pa kikowililoskya trigo Yosé, kampa katka miyak mayanaliste pa mochi kishki tal.

Yosé ninohniwan yal pa Egipto

42 ¹Kwah Yakob kimat kampa pa Egipto, katka takwal kwa-kin kinmili ininpilwam: "Ten ankichiptyak kan, pates amno'itifikat ka anmehwante sek ka oksek? ²Kampa nitakak yok pa Egipto onka takwaliste, wan shiyak ompa wan shihkowak takwaliste pa tehwante, pa amo timikiske, pa yok tiyoliske."

³Kwakin inik matahti ninohniwan Yosé yak pa Egipto kikowak trigo. ⁴Ma yok Yakob amo kititan ka yehwante BenYamín, ninohni Yosé, kampa ma yok tamatiya pek ten kipanoskya pek ten amo-kwal. ⁵Oyak ininpilwam Isra'El okikowak takwal, niyok yaloya oksek, kampa mayanaliste katka pa tal Kanán.

⁶Wan Yosé reynarowaya pa Egipto, yewal kinnamakiltiya trigo moshte yehwante pa mochi kishki tal. Kwah asik Yosé ninohniwan, motankwaketsak talpa. ⁷Kwah kinmit Yosé ninohniwan, haniman kinishmat; ma yok, omochi kina amo kinishmatiya, wan kintakichili ka kwalaniliste; kintahtanili:

—Wan anmehwante!, kampa anwalal?

Kinankilik:

—Tiwalal pa tal Kanán, pa timishkowiliske takwal.

⁸Ma yok kinishmat Yosé, yehwante amo ki'ishmatik. ⁹Kwakin ki'ilnamik Yosé nitatemikiliste nahyehwante, wan kinmili:

—Anmehwante anta'ispiyarotikat, anwalal pa ankitaske kaha amo onka takwitawil total pa yok kwal ankishitiniske!

¹⁰Yehwante kinankilik:

—Amoyok, Tats! In motikipanolme tewal, walal kikowal takwal. ¹¹Moshte tehwante ininpilwam se takat kwal, tehwante titakam kwahkwalme. Amo tiwalal tita'ispiyarol!

¹² Yosé kinmili:

—Amo melak! Anwalal antachiyal kaha kwal kalakiske pa total ka anmogwacho' pa mo'onanaske.

¹³ Yehwante kinankilik:

—Tehwante, motikipanolme, titakatilme 12 ininpilwam, pa se takat yewal mochanti pa tal Kanán. In tipichi moka ka nitats, wan in okse nikon yahmo yoltik.

¹⁴ Yosé kinmili:

—Yok kina annimichilis. Amehwante anta'ispiyarotikat! ¹⁵ Wan ka in nihmati: Nimishmak notahtoliste ka niyoliliste in para'ó, wan amo kisaske nika kaha kat hanwel kwah walas monohni tipichi.

¹⁶ Shiktitanik se ka anmehwante pa kiwalikas monohni; in oksek mokawaske tsaktiyaske kampa yok nihmati ta melak nichilitikat. Ta amo annichilitikat melawak, wan nimishmak notahtoliste ka niyoliliste in para'ó, kampa anmehwante anta'ispiyarotikat!

¹⁷ Kintsakwa Yosé pa yey tonatim. ¹⁸ Pa in yey tonatim kinmili Yosé:

—Ta ankinekil yoliske shikchiwak in kampa newal nimo-mapti pa i'ishpa Dyos. ¹⁹ Ta ankat takam kwahkwalme, ma



*Yosé kinmili ninohniwan kampa yehwante
ta'ispiyarotikat (Ipewaliste 42:14)*

moka se ammonohni tsaktiyas wan in oksek ma mokwepak wan ma ankiwikak trigo pa yok antakwaske pa anno'icha.
²⁰Shihwalikak ammonohni tipichi pa nihmatis ta ankitotikat melawak. Wan yok amo anmikiske.

Wan yehwante kitol haha,²¹mo'ililoya sek ka oksek:

—Tehwante timokatsawaltik ka tonohni.

Moyolkokotikatkaya wan tishtahtaniyaya pa tikihnilirosky
wan amo tihnekik tihkakik. Kampa ashka tishpanotik in
amokwal.

²²Rubén kinnankili:

—Amo annimichili pa amo kikatsawiltilosky in
takatYankwik, wan amo ankinekik annishkakik. Ashka monek
pa titashtawaske kampa tihmiktik!

²³Yehwante amo kimatiloya kampa Yosé kimatiya kinkakiya,
kampa yewal kintakichiliyaya ka se takat tahtowaya hebreteko
ka yehwante. ²⁴Yosé panoti oksela ka yehwante wan cho-
kaya, kwakin, walmokwep pa tahtosky ka yehwante, wan
ika ka yehwante kikitski Shime'ón pa i'ishpa moshte yehwante
kitsakwak.

²⁵Kinmili Yosé ininwetatakewan pa nikal pa
kintemiltilosky inintamamal ka trigo, wan pa
kinkwepilosky mochi sesen inintomi kintalilik pa sesen
inintamamal, wan kinmakalosky takwaliste pa kikwalosky
pa ot. Wan yok kichiwak. ²⁶Kwakin yehwante kintamamaltilik
ininburro' ka trigo wan mokwepak.

²⁷Asik ompa kaha panolosky in yowal se ka yehwante
kitapo nitamamal pa kitamakaskya niburro, wan okit nitomi
pa ikamak nitamamal! ²⁸Kinmili ninohniwan:

—Nishkwepilik notomi! Shikitak, nika onka, pa nokostal!

Wan hyero moyoyokatikatkaloya, mo'ililoya sek ka
oksek:

—Ten yewal Dyos tishchiwilitik?

²⁹Asik pa ikal itats Yakob pa in tal Kanán, kitakichilik ten
kinpanowaya, wan kilik:

³⁰—In takat tahto ka tehwante ka kwalaniliste pa mochi-
tal tichiliyaya kampa tikatkaloya kina ta'ishpiyaroliste.

³¹Wan tikitok: “Tehwante titakam kwahkwalme. Amo tikat
takam ta'ispiyaroliste.” ³²“Tikat 12 tinohniwan, ininpilwam
totats. Se amo yoltik, wan tonohni tipichi onka ka totats pa
Kanán.”

³³ 'Kwakin in takat yewal niwetatakewan in tal tichili: "Ashka nihmati ta anmehwante ankat takam kwahkwalme: Shihkawak se ammonohni, ka newal wan shiyak shihwikak takwaliste pa amo mayanaske pa anmokal. ³⁴ Shinishwalikilik ammonohni tipichi ka newal. Pa yok nihmati kampa amo ta'ispiyarotikat kampa ta melak kat takam kwahkwalme. Kwakin annimishkwepli ammonohni, wan annimishmakawalti pa antakowaske wan antanamakaske pa mochital."

³⁵ Kwah kinokiloya inintamamal, ninohniwan Yosé kitak pa sesen inintamamal katka inintomi yehwante. Kwah yehwante wan nitats kitak inintomi, hyero momaptik. ³⁶ Kwakin Yakob kinmili:

—Anmehwante annishkistiliske mochi nopilwam! Yosé yahmo onka ka tehwante, niyok Shime'ón, wan ashka ankinekil ankiwikaske BenYamín! Mochi inik tachiwaliste wetsil nopa newal!

³⁷ Kwakin Rubén kili nitats:

—Tikinmiki in omente nopilwam ta amo nimishwalkwepil BenYamín. Shinishkawil kampa newal nihkwitawis wan nimishwalkwepilis.

³⁸ Yakob kili:

—Nokon amo yas ka anmehwante! Kampa omik ninohni, wan yewal han moka. Ta ten okipan pa ot yewal kampa yal, kwakin anmehwante ankihiyaske teshpawiliste kampa nimikis pa nimoyolkokos nitemos pa She'ol^v kaha kat mihmihke.

Ninohniwan temok oksep pa Egipto

43 ¹Katka we mayanaliste pa tal Kanán. ²Kwah kitamik in trigo yewal kiwalikak pa Egipto. Yakob kinmili:

—Shimokwepak, wan shiyak shihkowak oksep trigo pa titakwaske.

³ Wan Yehudá tanankili:

^v 42:38 She'ol in kinek kitos, kaha kat mihmihke. Inik kaha yeske tahosgarilme moshte yehwante kishki mikik, kwakin ompa yeske ta'ishtapolme inik amamtakwiwkwilome, wan pa in se amattakwiwkwil amo moshte yeske tapahwilme ininitokalme; wan pa in okse amattakwiwkwil yeske moshte tapahwilme in ten kichiwak kwah yoliloya pa in mochital.

—Wan yewal takat otichil ta amo ankwalikal ammonohni tipichi, amo shiwalak shichitak.⁴ Ta tiktitan tonohni ka tehwante, titemoske timishkowiliske trigo.⁵ Ta amo tihnek tiktakewas amo titemoske. Kampa in takat tichili amo annimichitas ta amo ankwalikal ka anmehwante.

⁶ Kwakin kito Isra'El:

—Pates yok okilik kampa ankipiyaloya okse takat ammonohni?

⁷ Yehwante tanankilik:

—Kampa tishtahtanili in takat ka myak tahtolme ka tehwante pa tokal. “Yoltik anmotats? Tishtahtanili: Ankipiyal okse ammonohni?” Tihnankilik ten tishtahtanilitikatkaya. Kina tihmatiloskya kampa yewal tichiliskyka shihwalikak ammonohni?

⁸ Kwakin Yehudá kili Isra'El:

—Shikttitan takatYankwik ka newal wan ma tiyaptiyak, kampa yok tewal wan topilwam tiyoliske amo timikiske.⁹ Newal nihkwitawis; pa amoten kipanos yewal. Newal tirishtahtanis in tapowaliste ten panos, ta amo nimishwalkwepil nika kaha tikat, newal nikpiyas tateshpawiliste pa hanse.¹⁰ Ta amo inik timochiptiyaloskya, ashka yatiyaloskya wan tiwalmokwepalosya ohpa!

¹¹ Kwakin nitats Isra'El, kinmili:

—Ta amo onka kina kwal, kwakin shikchiwak in: Shihwikilik pa anmotamamal temakaliste kwal in takat, yewal tikchiwal wan mo'apawal pa in tal, shihwikilik tipit balsamo, tipit nekti, wan sek yewal fragante, wan mira yewal fragante, wan sek nwese', wan almendra!¹² Shihwikilik in tomi yewal anmishwalkwepil kwah anwalmokwepak, yewal ankitak pa nikamak anmotamamal. Wan shihwikilik oksep in tomi wan niyok shihwikak ka tashtawaske, kampa oksela okital.¹³ Shihwikak ammonohni tipichi wan shimokwepak ka in takat.

¹⁴ Yewal in Dyos kipi chikawaliste ma kichi pa in takat pa kipiyas ta'ihnihiliste pa anmehwante pa yok kimakawas in okse ammonohni wan BenYamín! Pa kishki newal, hanwel ta monek pa nikinpolos nopolwam, yewal ten nikchiwas! Ma nimoka ka amoten nokon!

¹⁵ Kwakin kiwikak yehwante takam inik temakaliste, wan niyok kiwikak tomi, pa kikwepililoskya wan ka takowaloskya wan niyok kiwikaloya ninohni BenYamín, temok pa Egipto.

Wan moneshtik pa i'ishpa Yosé.¹⁶ Kwah kit Yosé ninohni BenYamín ka yehwante, kili yewal niwetatakewan pa nikal: "Shikinwik inik takam pa nokal. Wan shihmiki se yolke wan shikyokshit, kampa yehwante takwaske takwalispa nonawak."

¹⁷In takat kichi kina kili Yosé wan kinwik pa nikal.¹⁸ Kampa yehwante momaptitikatkaloya in takam kwah kinwikaloya pa nikal Yosé: "Kitoloya ka in tomi yewal tishkwepilik kwah timokwepaloya pa tokal. Ashka kinek tishkitskis, pa tishchiwas inintikipanolme, wan pa tishkishtilis toburro!"

¹⁹Kwakin ki'asik in wetatakewan pa nikal Yosé, wan pa in tatapoli pa in kal tahtok inak yewal kilik:

²⁰Shitishihnil, tats:

—Melak setonatim tehwante tiwalak timokowilik takwal;

²¹kwah timokwepak, timoketsak kaha timosewilosky in yowal, kwah tikintapok totamamal ompa katka totomi pa sesen nikamak totamamal mochi totomi. Yok tihwalikak oksep in tomi ka tehwante!²² Niyok tihwalikak tomi pa titashtawaske in trigo yewal tihkowaske. Amo tihmatil akyewal kital totomi pa totamamal!

²³Wan in wetatakewan pa nikal kinnankili:

—Amo shimomaptik. AnmoDyos anmehwante wan niDyos anmotats anmishtalil in tomi pa anmotamamal. Newal nikonan anmotomi yewal nishtashtawilik.

Kwakin kiwalikak Shime'ón ka yehwante,²⁴ wan in wetatakewan pa nikal kinwik in takam pa kalitik pa nikal Yosé. Kinmak at pa kinpakalosky nikshiwam, wan kintamak ininburro'.²⁵ Yehwante, kichiwak temakaliste, inik yewal kiwalikilik Yosé kwah asiskya takwalispa, kampa takakik ompa takwalosky.

²⁶O'as Yosé pa nikal, ninohniwan kimakak inik yewal kiwalikilik, wan mopachok ni'ishpa pa in tal.²⁷ Kintahtanili Yosé kina katkaloya, kwakin kinmili:

—Kina onka anmotats, in tats kolinche yewal annichilik? Yoltik?

²⁸Yehwante kinankilik:

—Totats, motikipanol, kwal onka, wan yoltik.

Wan mopachok ni'ishpa yewal pa kichiwilosky tamawishtiliste.²⁹ Kwakin Yosé otachi wan okit BenYamín, ninohni in okse nikon nitats wan ninantsi, wan kito:

—In yewal ammonohni tipichi, in yewal nishtakichilik anmehwante? Ma mishmashti Dyos, nokon!

³⁰Kwah kit Yosé ninohni, kinekiya chokaskya, kampa kinekiya kinapaloskya yok yewal mo'isiwilti. Okalak pa nikwarton wan ompa chokaya. ³¹Kwakin mosham, wan mopohipo nishayak wan okis, wan kito: “Shihwalikak takwaliste!”

³²Yosé takwaya oksela, katkaloya ninohniwan pa okse, kaha takwal wan in egyptiyo katkaloya ka Yosé takwaloya pa okse kaha takwal. Katka in egyptiyo' kampa amokwal takwaloskya kaha takwaloya hebreteko', kampa tatatsotal katka pa egyptiyo. ³³Motalik Yosé ninohniwan pa annimesa han kina shiwim kinpiyaloya, kina takatiloya yewal we ka Rubén wan tam ka BenYamín kwah tamik motalik, ninohniwan Yosé mokawak mo'itatikat. ³⁴Katka in takwaliste kaha takwa Yosé, wan nitikipanol ki'onan in takwaliste wan kinwalikilik sesen wan sesen ninohniwan se shikal temtiyaya ka takwaliste wan kiwikilil BenYamín we takwal kina makwil shikalme pa nishikal, yok we katka nitakwal. Wan takonik ka Yosé, wan kipiloya pakiliste ka yewal.

Yosé okital tapalkatonte tachiwali ka plata pa BenYamín

44 ¹Kwakin Yosé okinots niwetatakewan pa nikal: “Shikintemiltil inintamamal inik takam ka trigo kishki temi, shikintalil inintomi pa mochi sesen pa nikamak inintamamal. ²Shiktal niyok notapalkatonte tachiwal ka plata pa itik nitamamal in tipichi yankwik ika nitomi, ka tashta tri-go.” Wan niwetatakewan pa nikal kichi kina kili Yosé.

³Tahtanesti, ninohniwan Yosé kintakewak pa yaloskya pa mokwepaloskya inak ininburro'. ⁴Ayamo'ok yaloya wEhka pa in wepweblo' wan Yosé okinots niwetatakewan pa nikal: “Shi! Shikinas in takam! Kwah tikinasis, shikinmil: 'Pates annishtashtawilik amokwal wan anmishmak in kwal? ⁵Pates anki'ishtikilik yewal nitapalkatonte tachiwal ka plata wan kaha nowetatakewan takoni wan kaha kit ten panos? In amokwal ten ankichiwiwak!”

⁶Kwah niwetatakewan pa nikal kinas, kinmili oksep inik tahtolme. ⁷Wan yehwante kinankilik:

—Pates yok tikito, notats we in? Tehwante motikipanol amo'ik tikchiwal ten yok! ⁸Shikit, timishwalkwepilik tomi yewal tikitak pa'itik nikamak totamamal sesen ka tehwante,

tihwalikak kwah tikisak pa Kanán. Kina yok tikištikililoskya plata, oro pa nikal in tats? ⁹Ta se ka tehwante motikipanol tikit, ma kimiktik wan tehwante, in oksek timochiwaské nitikipanol nikal in notats.

¹⁰Wan niwetatakewan pa nikal kito:

—Ma ye kina ankitol, akyewal kipiwas tapalkatonte tachiwal ka plata yes notikipanol; wan anmehwante mokawaske tamakawaliste pa in tateshpawiliste.

¹¹Kintemowik sesen intamamal wan kitalik pa tal, wan ka sesen kintapok. ¹²In wetatakewan otatem okipewalti ka ninohni we wan otam ka ninohni tipichi. Kitak yawiya pa nitamamal BenYamím in tapalkatonte tachiwali ka plata! ¹³Kwakin motsayanilik ininshashalme.^w Kintamamaltilik ininburro' wan mokwepak pa in Wepweblo.

¹⁴Kimani Yehudá wan ninohniwan asik pa nikal Yosé, yewal ompa katkaya ayamo yawiya tikiapanowaya. Kwakin motankwawetsak pa tal ni'ishpa yewal, ¹⁵kinmili Yosé:

—Ten in yewal ankichiwak? Amo ankimatil ta se takat kina newal, kimat kit ten motachiwas?



© 1996 David C. Cook

*In tapalkatonte tachiwal ka plata okitak pa
nitamamal BenYamín (Ipewaliste 44:12)*

^w 44:13 Motsayanilik ininshashalme in kinek kitos, se tanestiliste ka tayolkokoliste.

¹⁶Kinankili Yehudá:

—Kina timichiliske Tats! Ten tikitoske! Kina timishnishtiliske kampa amo tikpiyal takokoliste? Ka Dyos yewal kineshti totakokoliste tehwante motikipanol. Ashka tehwante tiyeske motikipanol, notats we, tehwante tonohniwan wan in se yewal kipiyaya in tapalkatonte tachiwal ka plata.

¹⁷Yosé kinmili:

—Amo'ik pek ten nikchiwaskya! In yewal aki kipiyaya tapalkatonte yes notikipanol. Wan in oksek mokwepaske ka anmotats ka mosewiliste, amo'ak anmehwante anmishtsakwili.

¹⁸Kwakin Yehudá o'as ka yewal wan kili:

—Newal nimishtahtani tewal, Tats, shikit newal nimishtahtani motikipanol nimichili tewal tats sek tah-tolme pa monaka. Amo shikwalan ka newal motikipanol, kampa newal, nimichit tewal ti'onka kina para'ó. ¹⁹Tewal tats titishtahtanil tehwante motikipanol ta ankipiyal anmotats wan okse ammonohni, ²⁰wan tehwante titanankilik tikpiyal totats kipi myak shiwim, wan se tonohni tipichi yewal okitakatilti kwah notats kolinche katka ka myak shiwim. Wan niyok tikitok kampa totats hyero miyak kinek wan yewal hanse mokawiliyaya nikon ka in se han nisiwa, kampa nokse ninohni omik. ²¹Kwakin tewal timotikipanolme otishtahtan pa tihwalikaloskya kampa tih-nek tikishmatiskya. ²²Wan timichilik tewal notats kolinche amo kika in piltonte nitats kampa, ta kika, kwakin nitats miki. ²³Ma yok titichili tehwante motikipanol, ta amo ankwalikal ammonohni tipichi ka anmehwante, kwakin amo annichitaske. ²⁴Timokwepak kaha motikipanol notats, wan tikilik in tewal tats titichili. ²⁵Kwah tichili totats: “Shimokwepak shihkowak tipit takwaliste pa tehwante.” ²⁶Wan tehwante titanankilik: “Amokwal tiyaske ta amo ya ka tehwante tonohni tipichi amo tiyaske. Amo tikitaske nishayak in takat ta amo oy ka tehwante tonohni tipichi.” ²⁷Totats, in motikipanol, kito: “Ankimatil kina annishtakatilti nosiwa ome nopilwam. ²⁸Ka in omente se yahmo onka ka newal. Wan nikito kampa melak se yolikilme kika tahtakito, wan ashka amo'ik nikita pa mochi in shiwim. ²⁹Ta annishkishtilik niyok nokon, wan niyok ta

okipan pek ten, kwakin kichiwaske kampa in tsontek temos pa She'ol^x kaha kat mihmihke!"

³⁰'Ashka, shikit, kimani nimokwepas newal motikipanol, ta in takatYankwik ta amo ya ka tehwante, in niyoliliste notats pipichotik inak niyoliliste in takatYankwik,
³¹in panos kimani ta amo okit in piltonte, mikis, wan motikipanolme kichiwaske pa moyokoltis kampa notsontek istak yok temos pa She'ol kaha kat mihmihke. ³²Newal motikipanol nikili notats melak kampa nihkwepiliskya in piltonte. Nikili: "Ta amo nihwalik oksep ka tewal, noTats newal, kwakin newal nikpiyas hanse tateshpawiliste mo'ishpa." ³³Ashka, shinismakawilti pa newal motikipanol nimokawas nika pa niyes motikipanol pa tewal, tats ma nimoka wan in piltonte shihmaka pa mokwepas ka ninohniwan. ³⁴Kina nimokwepas kaha notats ta amo nihwik in piltonte? Amo nihnek ten kipanos amokwal notats!



© 1996 David C. Cook

Yehudá otahto ni'ishpa Yosé pa Egípto (Ipewaliste 44:34)

^x 44:29 She'ol in kinek kitos, kaha kat mihmihke. Inik kaha yeske tahosgarilme moshte yehwante kishki mikik, kwakin ompa yeske ta'ishtapolme inik amamtakwiwkwilome, wan pa in se amattakwiwkwil amo moshte yeske tapahwilme ininitokalme; wan pa in okse amattakwiwkwil amo moshte yeske tapahwilme in ten kichiwaske kampa in tsontek temos pa She'ol kaha kat mihmihke.

Yosé kinmashti ninohniwan

45 ¹Kwakin Yosé yahmo kwal kina motsakwiliskya ininishpa pa moshte inintikipanolme, yewal tsats: "Shikisak moshte anmehwante nika!" Yok amo katkaya ni se inintikipanolme Yosé hanwel ninohniwan. Kwah yewal kinnawati akyewal katka, ²kwakin walchokaya chikawak wan kimatik inik egyptiyo', wan niyok kimatik yehwante pa nikal para'ó.

³Newal niYosé kinmili ninohniwan:

—Yoltik notats?

Wan amokwal kina kinankililoskyia ninohniwan kampa momaptiloya i'ishpa yewal. ⁴Kwakin Yosé kinmili:

—Shiwalak ka newal!

Yehwante monichikok ka yewal, wan kinmili:

—Newal annimonohni Yosé, in yewal ankinamakak pa Egipto. ⁵Ashka, amo shimoyokoltitiyak wan amo shikwalantiyak ka anmehwante moselte kampa annishnamakak, kampa Dyos nishwaltitan ta'ishpa pa yoltiyaloskyia amo mikiloskyia. ⁶Ashka panok ome shiwim ka mayanaliste pa in tal, wan pa inik oksek makwil shiwim amo yes tatokaliste wan tapishkaliste. ⁷Dyos onishwaltitan ta'ishpa ka anmehwante: pa yok mokawaloskyia anmokolinchim pa in mochital wan pa anmishmakas yoliliste ka we tapololtiliste. ⁸Amo anmehwante aki annishtakewak pa nkek han Dyos. Kampa onishtal kina nitats para'ó wan niwetatakewan pa mochi nikal, wan in wetatakewan pa mochi in tal Egipto. ⁹Ashka, shi'isiwik! Shimokwepak kaha notats wan shikilik: "Yok kito yewal mokon Yosé: Dyos nishchi we nireynaroliste pa mochi Egipto. Ma wal ka newal. Amo shiwehkA. ¹⁰Timochanti pa in tal Goshen, amo wEhka kaha newal niyes, ompa anyeske tewal wan anmopilwam, wan anmokolinchim wan mochi inik tanichikolme borrego', chibo', baka' wan mochi yewal ten tikpi. ¹¹Nika annimishmakas takwaliste tewal wan moshte mochantilme pa mokal. Wan moshte yehwante kat ka tewal, pa mochiten kipiyaske, kampa yeske oksek makwil shiwim ka mayanaliste." ¹²Anmehwante ankital wan BenYamín kampa melak newal nitahtotik ka anmehwante. ¹³Shikilik notats kina niWe nitatakewan nika Egipto, wan shikilik mochi yewal ankitak. Wan shi'isiwik wan shihwalikak notats!

¹⁴Kwakin Yosé kinapalo ninohni BenYamín, wan walchokaya BenYamín wan Yosé. ¹⁵Chokaya niyok, kintenamikik moshte ninohniwan wan walchokaya ka yehwante. Kwakin ninohniwan kiwaltakichilik.

¹⁶Tamashtiliste o'as pa nikal para'ó kampa asik Yosé ninohniwan, para'ó wan moshte inintikipanolme para'ó kipiyaloya pakiliste. ¹⁷Wan kili para'ó Yosé: “Shikinmil monohniwan ma kintamamaltilik anniyolikilme wan ma mokwepak pa in tal Kanán. ¹⁸Shinishwalikilik anmotats wan moshte mochantilme pa nikal. Wan newal animishmakas in kwahkwalme talme pa Egipto, wan ammehwante ankikwaske in kwal yewal pa in mochital. ¹⁹Niyok shikinmil, shikinwikak sek yawalkilme nika pa in tal Egipto pa ankwalikaske anmosiwam wan anmopilwam, wan shihwalikak anmotats, ²⁰amo shikilnamikik amoten yewal pa anmoyashka, kampa mochi yewal onka kwal pa Egipto wan yok anyes anmoyashka.”

²¹Yok kichiwak ininpilwam Isra'El. wan Yosé kinmak yawalkilme kina kili para'ó, wan niyok kinmak takwaliste ten monekiska pa ot. ²²Kinmak sesen wan sesen shashalme yahyankwik, wan BenYamín kimak 300 tomiplata wan makwil takemiltiliste shashalme. ²³Wan nitats kititanil matahti burro'ka tamamaltiliste ka in kwahkwal ten onka pa Egipto, wan matahti burra' tamamtiyaloya trigo, wan ten monekiya pa ot. ²⁴Kwakin Yosé kintake ninohniwan pa yaloskyá pa in ot kinmili: “Amo shimokwalantik pa ot!”

²⁵Yok kisak pa in tal Egipto wan asik kaha nitats in Yakob, pa in tal Kanán. ²⁶Kilik: “Yosé yoltik! Yewal reynarotik pa mochi Egipto!” Amo kimat ten kitoskyá Yakob amo kinneltokaya, ²⁷kwah yehwante kitakichilik mochi kina kinmili Yosé. Wan kwah okinmit Yakob in yawalokilme yewal tatitan Yosé pa kinwikaloskyá, ni'ihyo walyol. ²⁸Kwakin kito: “Melak! Yoltik nokon Yosé! Niyas nikitas ashka kwah ayamo'ok nimiki.”

Yakob wan ininpilwam pa Egipto

46 ¹Yok panoti Isra'El ka mochiten tapiyaya. Yok o'as pa BérSheba, kitalili tatamakal niDyos nitats Itsak. ²Pa setayo Dyos otahto ka Isra'El tachiyaya kina tatemiktiyaskya kili:
—Yakob! Yakob!
Kinankili:

—Nika ni'onka.

³Kili:

—Newal niDyos, niDyos motats. Amo shimomaptiti pa tiyas Egipto, kampa ompa nikchiwas se tanichikol we. ⁴Niyas monak Egipto, wan niyok nikchiwas pa tiwalmokwepas. Wan Yosé yes ka tewal pa kintsakwas moshtololme kwah timiki.

⁵Yok Yakob okis pa BérSheba, wan ininpilwam Isra'El kitilik nitats Yakob, wan ininpilwam wan ininsiwam, yehwante pa in yawalolme tatilanayewal kintitaniliyaya para'ó ka kinwikaloskya. ⁶Niyok kinwikak ininylolikilme wan kinwikak mochi ininylashka, yewal Yakob tapiyaya pa Kanán. ⁷Yok Yakob kinwik pa Egipto ininpilwaTakam wan ininpilwaSiwam wan nikolinchimTakam wan nikolinchimSiwam, moshte yehwante oyak inak yewal.

⁸Yok itokaloya ininpilwam Isra'El wan Yakob nikolinchim yehwante oyak pa Egipto:

Rubén ye nikon we, Yakob.

⁹Ininpilwam Rubén yek: Henok, Palú, Hesrón wan Karmí.

¹⁰Ininpilwam Shime'ón yek: YemuEl, Yamín, Óhad, Yakín, Tsohar wan Sha'úl, yewal katka nikonSiwat kananeya.

¹¹Ininpilwam Lewí yek: Gershón, Koat wan Merarí.

¹²Ininpilwam Yehudá yek: Er, Onán, Selá, Perets wan Séra.
(Er wan Onán mikik pa in tal Kanán.)

Ininpilwam Perets yek: Hesrón wan Hamul.

¹³Ininpilwam Isakar yek: Tolá, Puwá, Iyob wan Shimróm.

¹⁴Ininpilwam Sabulón yek: Séred, Elón wan YahalelEl.

¹⁵Niyok yek ininpilwaTakam yewal Le'a okitakatilti Yakob pa in tal Padán-aram, wan niyok okitakatilti nikonSiwat Dína. IninpilwaTakam wan ininpilwaSiwam yek 33 masewalme.

¹⁶Ininpilwam Gad yek: Tsepón, Hagí, Eshbón, Shuní, Erí, Arodi wan Arelí.

¹⁷Ininpilwam Asher yek: Imná, Yishwá, Yishwí, Berihá wan Séra, ninohniSiwat yehwante.

Ininpilwam Berihá yek: Héber wan MalkiEl.

¹⁸Yehwante okintakatilti Silpa ininpilwam Yakob. Yewal Labán okimak Le'a pa yeskyá nitikipanolSiwat. Katkaloya 16 masewalme.

¹⁹Inik yek ininpilwam Rakel, nisiwa Yakob: Yosé wan BenYamín.

²⁰Pa Egipto, okitakatilti Yosé ka nisiwa Asenat, nikonSiwat Potipera, totats On: Manashé wan Eprayím.

²¹Ininpilwam BenYamín yek: Bela, Beker, Ashbel, Gerar, Namán, Ehi, Rosh, Mupim, Hupam wan Ard.

²²Inik yek ininpilwam Rakel, okintakatilti Yakob katkaloya 14 masewalme.

²³Nikon Dan ye: Hushim.

²⁴Ininpilwam Neptalí yek: YahetsEl, Guní, Yeser wan Shilem.

²⁵Inik yek ininpilwam Yakob yewal okinpi inak Bilha. In tikipanolSiwat yewal Labán kimak nikonSiwat Rakel. Yek chikome masewalme.

²⁶Moshte inik masewalme yehwante yaloya inak Yakob pa Egipto, moshte katkaloya nikolinchim wan katkaloya 66, amo katkaloya tapowalme ininsiwamom. ²⁷Wan ka in ome ininpilwam Yosé yewal okintakatilti pa Egipto. Moshte yehwante ininpilwam wan nikolinchim Yakob katkaloya 70 masewalme.

²⁸Kwakin Yakob kitake Yehudá kampa katka Yosé pa yok kiliskya Yosé pa kinamikiskyá pa in tal Goshen. ²⁹Kinmili Yosé nitakam pa kipiyaloskyá nikareta, pa yok yaskya pa Goshen pa kinamikiskyá nitats Isra'El. Haniman kwah okit Yosé pa



© 1996 David C. Cook

Yosé okonan nikareta pa kinamikis nitats (Ipewaliste 46:29)

i'ishpa nitats kinapalo, nitats wan owehkA moka chokati.
³⁰Isra'El kili Yosé:

—Ashka kwal pa nimikis! kampa nimichit tewal kampa tiyoltik!

³¹Kwakin kinmili Yosé ninohniwan wan yehwante pa nikal nitats:

—Ma nitakis pa nitahto ka para'ó pa nikili nonohniwan, wan yehwante kat ka nikal notats, yewal mochan-tiloya pa in tal Kanán, yehwante walak ka newal.

³²In takam takwitawilme tanichikolme ka yolikilme kinpiyal borrégo', chibo' wan baka', kinwalikak wan mochiten tapiyaloya. ³³Kwah anmishnotsa wan anmishtahtanili pa ten tikipanoloya, ³⁴shikilik pa kishki tiyoltikat wan pa ashka inik tehwante timotikipanolme tewal tikinkwitawil yolikilme, kina inik towichalme yehwante mikik. Yok anmokawaske pa in tal Goshen, kampa inik egyptiyo' kipiyl tatatsotalme pa mochantiske inak yehwante takwita-wilme yolikilme borrego.

47 ¹Yosé oy ka para'ó, wan kili:

—Notats wan nonohniwan walkisak pa tal Kanán wan asik pa in tal Goshen ka ininyolikilme, sek tanichikolme wehwe ka chibo', borrego' wan baka' ka mochi niyashka.

²Kinonan Yosé makwil ninohniwan wan kinwalik pa ni'ishpa para'ó. ³Kinmili para'ó ninohniwan Yosé:

—Ten tikipanoliste ankimatil?

Yehwante kinankilik para'ó:

—Tehwante motikipanol titakwitawilme tanichikolme ka yolikilme yok kina towichalme yehwante mikik tishkawilik.

⁴Niyok kilik para'ó tiwalak pa timochantiske nika kampa onka miyak mayanaliste pa Kanán, amo onka sakat pa niyolikilme motikipanolme. Kampa mayanaliste hyero we! Timishtahtanil kampa titishmakas pa timochantiske pa in tal Goshen.

⁵Para'ó kili Yosé:



© 1996 David C. Cook

*Yosé kinapal nitats in
Yakob (Ipewaliste 46:30)*

—Motats wan monohniwan ashka walak ka tewal. ⁶Wan in tal Egipto pa mo'ishpa onka tewal. Shikinmak motats wan monohniwan pa in tal kwal, ma mochantik pa Goshen. Ta tihmat ta ka yehwante kat sek kimatil takwitawil yolkilme, kwa-kin shikintal pa yeske notatakewalme pa noyolikilme.

⁷Yosé kiwik niyok Yakob, nitats kaha para'ó, pa ki'ishmatiskya wan Yakob kimashti para'ó. ⁸Kwakin para'ó kitahtanili Yakob:

—Kishki shiwim tikpi?

⁹Yakob kinankili para'ó:

—Newal nikpi 130 shiwim niyaptinem nika nepa amo myak shiwim nikpi pa niyoltik wan inik shiwim amokwal onipan, ayamo'ok nikashilti pa niyolis kina ininyoliliste nowi-chalme yehwante mikik, pa inik tonatim yaptinemil nika nepa.

¹⁰Kwakin Yakob kimashti para'ó, wan okis pa ni'ishpa.

¹¹Yok Yosé kinmak nitats wan ninohniwan talme pa Egipto, in tal kwal amoyok kina oksek talme kaha ta'itok Ramsés, kichi kina kili para'ó. ¹²Niyok Yosé kinmakaya takwa-liste ninohniwan, pa moshte nikal nitats, pa kishki myak ininpilwam katkaloya pa sesen nikal.

Yosé tikipanowaya pa in tonatim pa mayanaliste

¹³Amo katka ten kikwaloskya, pa mochi in tal kampa katka miyak mayanaliste pa Egipto wan pa Kanán. Amo kipiloya ten kikwaloskya, miktiyaloya ka mayanaliste. ¹⁴Yosé kinichiko mochi in tomi pa in tal Egipto wan pa tal Kanán, kampa kinamakaya trigo wan yewal kitashtawilloya in tomi kiwalikaya pa nikal para'ó. ¹⁵Kwah yahmo katka tomi pa egyptiyo' wan pa Kanán, kwakin walak moshte egyptiyo' kaha Yosé kilik:

—Shitishmak ten tikwaske! kampa timikiske pa mo'ishpa kampa amo tikpiyal tomi?

¹⁶Wan kinmili Yosé:

—Shikinwalikak anmoyolikilme, annimishmakas ten ankikwaske kampa antashtawaske ka anmoyolikilme.

¹⁷Yok kiwalikilik Yosé ininyolikilme, wan kinmak ten kikwaloskya, tashtawak ka ininkabayo', ininborrego', ininchibo', ininbaka' wan ininburro', yok Yosé in egyptiyo' kinnamakiltiyaya ten kikwaloskya yehwante tashtawaloya ka

nitanichikolme yolikilme. ¹⁸Kwah otam in shiwit walak ka Yosé oksep pa okse shiwit kilik:

—Amo tikpiyal ten, kampa otam totomi wan toyolikilme. Amo tikpiyal amoten pa timishmakaske, hanwel tokwerpo tonakayo wan totalme. ¹⁹Kampa timikiske mo'ishpa ka tewal wan ka totalme niyok? Shitishko tehwante wan totalme. Pa yok tishmakas ten tikwaske. Tehwante wan totalme tiyeske inintikipanolme para'ó. Hanwel shitishmak shinashte, pa yok tiyoliske wan yok in tal amo mo'ihtakos wan mokawas tawak!

²⁰Kwakin Yosé kinkowili mochi in talme pa Egipto, wan yok oye kina mokawil mochi in tal para'ó moshte in egyptiyo', kinnamakak inintalme kampa mayanaliste katka chikawak ipa yehwante, ²¹wan yok Yosé kintikipanolte inik egyptiyo' pa itenko in mochital Egipto, han itenko analko. ²²Amo kiko nitalme in totatsim. Yehwante amo kinnamakak inintalme, kampa totatsim takwaloya ka nitomi para'ó, amo monekya pa kinnamakaloskyia inintalme.

²³Wan in egyptiyo' kinmili Yosé:

—Annimishko anmehwante wan anmotalme pa anyeske niyashka para'ó, ashka nika onka shinashte pa yok tatokaske. ²⁴Pa sesen makwil kostal se han ka in tapishkaliste kimakaske para'ó. In oksek nawi kostale' ka in tapishkaliste yeske pa anmehwante, pa yok tatokaske in talme wan ka kintamakaske yehwante mochantilme pa anmokal wan pa takwaske anmopilwam.

²⁵Yehwante kinankilik:

—Tewal tishwalkwepil toyoliliste! Ma tiyek inintikipanolme in para'ó!

²⁶Yok kina Yosé okital tahtoliste pa mochital Egipto pa kimakaloskyia para'ó. Pa sesen makwil kostal se han ka in tapishkaliste, wan pa ashka in tahtoliste kipiyl pa yok kichiwaske. Hanwel in talme ka in totatsim amo temakaloya in sesen makwil kostal, kampa amo katkaloya pa para'ó.

²⁷Wan yok ye kina moka mochantiti Isra'El pa in tal Egypto, pa in pweblo Goshen. Ompa mokowilik kwahmilme, wan kinpiyaloya ininpilwam wan momiyaptik hyero myak. ²⁸Wan mochanti Yakob 17 shiwim pa Egipto, yolti pa 147 shiwim. ²⁹Kwah astiwalaya in tonat pa mikiskya Isra'El, okinots Yosé nikon wan kili:

—Ta melak tirishtasot, shikta momahwa itsinta nopyerna wan shinichil motahtol ka ni'itokaliste Dyos. Kampa tinishchiwilis kwal ka ta'ihniliste wan melak nimishtahtani amo shinishtapach pa Egipto! ³⁰Kwah nimosewis ompa kaha nowichalme yehwante mikik, shinishwík pa kiyawak Egipto, shinishtapach kaha yehwante tapachotikat.

Kili Yosé:

—Nikchiwas kina tinichilitik.

³¹Isra'El kito:

—Shinismak motahtol ka ni'itokaliste Dyos!

Kwakin Yosé kimak se tahtol ka ni'itokaliste Dyos, kwakin Isra'El motankwakets kaha westotikatka.

Manashé wan Eprayím

48 ¹Panok sek tonatim wan kinawatik Yosé kampa kitakoko motats. Óy Yosé okit wan okinwik in omente ininpilwam, Manashé wan Eprayím. ²Kimani kinawatiloya Yakob kampa mokon Yosé oval omichit, kwakin konan Isra'El nichikawaliste, pa motaliskya pa nitapeshte.

³Yakob kili Yosé:

—Ones ka newal Dyos ka miyak chikawaliste pa in Wepweblo Luts, pa in tal Kanán, wan nishmashti ⁴wan nichili: “Nimishchiwas pa momiyaptiske mopilwam, nimishchiwas pa tewal kisas se pweblo ka masewalme. Wan takwitap yeske miyak tanichikolme ka masewalme wan nikinmakas in tal pa mokawiliske mokolinchim pa hanse.” ⁵Ashka, mopilwam in omente yehwante takatik nika Egipto kwah ayamo'ok ni'asiyaya. Eprayím wan Manashé yeske nopilwam kina yehwante nopilwam Rubén wan Shime'ón. ⁶Ashka mopilwam yeske inik tikintakatilti takwitap wan kampa yeske ninohniwan, Eprayím wan Manashé kipiyaske takawaliste pa in tal. ⁷Kimani niwalaya pa Padáncaram pa nimokwepaskya pa Kanán, kampa omik Rakel pa tal Kanán kwah tikatkaloya pa ot, opoli amo wEhka katka in pweblo Eprata. Ompa niktapach pa Eprata, yewal niyok itok BetLéhem.

⁸Isra'El okinmit ininpilwam Yosé wan kitahtanili:

—Akyehwante inik?

⁹Kili Yosé nitats:

—Yehwante nopilwam onihsmak Dyos nika.

Kwakin Isra'El kili:

—Shiwalak pa nkek yok nimishmashti ika Dyos.

¹⁰Nishtololwa Isra'El shiyaptikatkaloya kampa kolinche katka amo tachiyaya; kwakin kinwalikil Yosé ininpilwam ka nitats kintenamik wan kinnapalo. ¹¹Wan Isra'El kili Yosé:

—Nitamatiya kampa amo nimichitaskya, wan ashka Dyos onishmakawalti pa ninkinmitaskya nokolinchim!

¹²Kwakin Yosé kinkishti ininpilwam pa nitankwam Isra'El wan motankwakets pa ni'ishpa. ¹³Wan kinonan Yosé in omente, kikets Eprayím pa nimahwakwal wan kikets Manashé pa nimahwamapoch wan kinashilti ka nitats. Wan Eprayín moka pa nimahwamapoch Manashé pa nimahwakwal. ¹⁴Kwakin Isra'El, kimela nimahwam, kipanolti wan okital nimahwakwal ipa itsontek Eprayím, yewal otakat takwitap, kwakin okital nimahwamapoch ipa nitsontek Manashé, yewal otakat ta'ishpa. ¹⁵Wan kinmashti Yosé ka inik tahtolme:

“In Dyos yewal

nehnemetyak inak notahwan, AbRaham wan Itsak,

yewal in Dyos hanse tonatim nishkwitawiyaya

wan pa ashka in tonat,

¹⁶in nitakwitawilanel pa in takpakIlwikak yewal nishkishti

pa mochiten amokwal,

ma kinmashti inik piltontim.

yewal no'itokaliste yes ta'ilnamikiliste

wan ni'itokaliste notahwan, AbRaham wan Itsak.

Ma kinpiyak myak ininpilwam wan ma yek wehwe

tanichikolme ka masewalme

pa in mochital.”

¹⁷Okit Yosé kina nitats kital nimahwakwal pa itsontek Eprayím, wan mokwalanti kikitski nimahwa nitats, pa kitaliskyá pa itsontek Manashé, ¹⁸Yosé kili nitats:

—Amoyok tats! Kampa in okse nitakatiliste ta'ishpa nokon! Shiktal momahwakwal pa nitsontek!

¹⁹Kampa nitats amo kinek kichi, yok:

—Nihmat nokon, nihmat! Yewal niyok momiyaptiske pa mochiwas se tanichikol we. Ma yok ninohni tipichi yes hyero we amoyok kina Manashé, ninohni tipichi nikolinchim yeske myak tanichikolme pa Wehwepweblo.

²⁰Pa in tonat Yakob kinmashti ka inik tahtolme:

“Kimani Isra'El kinmashti kito

ka mo'itokalme anmehwante:

“Yewal Dyos ma kichi ka tewal

kina kichi pa Eprayím wan Manashé.”
 Yok Isra'El kital Eprayím ta'ishpa yewal ka Manashé.

²¹ Kwakin Isra'El, kili Yosé:

—Newal nimikis pa se tonat; ma yok Dyos yes ka anme-hwante wan annishkwepas oksep pa nital mowichalme yehwante mikik. ²² Wan tewal, nimishmak ma we amoyok nikanmak monohniwan, nimishmak in tal yewal onikinkishtil in amoreteko' ka noteposte pa momiktiliste ka notawitol.

Yakob kinmashti ininpilwam

49 ¹ Kwakin Yakob kinnots pa walaloskyá ininpilwam wan kinmili: “Shimonichikok, pa yok annimichilis ten annishpanos pa inik tonatim yewal astiwalal:

² ² Ininpilwam Yakob: Shimonichikok wan shitakakik; shihkakik anmotats Isra'El.

³ ³ 'Rubén, tewal, titakat ta'ishpa,
 tewal nitanishtiliste nochikawaliste,
 tikpi ipewaliste ka tamawishtiliste, wan nichikawaliste.

⁴ Amo tihamat titamawishtili kina atim,
 yahmo tiyes ta'ishpa:
 kampa otikoch inak nosiwa;
 wan tihkatsawilti kaha nikochi.

⁵ ⁵ 'Shime'ón wan Lewí kat ninohni;
 ininmomiktiliste ka miyak motakokoltil.

⁶ Amo nihnek niyes kaha taketsal,
 kampa kwah kwalantikatkaloya!
 kinmiktik takam
 wan han kintahtapanilik inintankwam toro'!

⁷ Ma amokwal yes mokwalaniliste,
 anmokwalaniliste ka chikawiliste!
 Nikinsesemana pa in tal ka Yakob,
 pa mochi in tal Isra'El.

⁸ ⁸ 'Yehudá, wan monohniwan; michiliske tahtolme wehwe,
 tikinkitski yehwante mishkokolil,
 ininpilwam motats motankwaketsaske pa mo'ishpa.

⁹ Tewal Yehudá nokon newal! Ti'onka kina se nikon leon,
 kwah tami kikwa nita'asil:

mowalpacho, motek talpa kina se leon,
 ka miyak shiwim. Ak mochika ki'ishilti.

- ¹⁰ Yehudá hanse tonatim kipiyas bordon bara, pa reynaros,
 han amo kikawayा,
 kaha ipanta intankwam nibordon nibara, han amo
 kikawas
 kwah walas yewal yes niyashka pa reynaros,
 wan kineltokas mochi pweblo.

- ¹¹ Yewal ki'ilpi burro pa se kwawitUba,
 nikon niburro ki'ilpis kaha kwal tatsimolinke;
 kipak nishashal ka nihugoUbaBino,
 wan kipak nitakemtel ka niyEste nihugoubaBino.
¹² Nishtololme tihtiltik amoyok onka nihugoubaBino;
 wan nitankochowam ihistak kina lech.

- ¹³ 'Sabulón mochanti pa itenko in we'at;
 nital mochiwas kaha asil barko',
 Astiyaske pa itenko Tsidón.

- ¹⁴ 'Isakar kina se burro yewal kitamamaltilil yetik
 yewal motek ipanta ka ome tatsakwalme.
¹⁵ Kampa okit kina kwal katka pa mosewiskya
 wan in tal kina kwal katka pa kitikipanoskya,
 wan mokwalpacho pa kiwikas tamamaltiliste pa niyahkwal
 wan motemak pa kitikipanoltiske.

- ¹⁶ 'Dan yes se wetatakewan pa nipweblo,
 onka in se tanichikolme ka Isra'El.

- ¹⁷ Dan yes kina se kowat pa in ot,
 se kowat kochi pa itenko ot,
 kikwa nitankwam kabayo'
 kampa kichi pa wetsis pa takwitap takat.

- ¹⁸ 'Nikchishtik pa tinishkishti pa in polewiliste, WeTatsDyos!

- ¹⁹ 'Gad kinamiki se tanichikol gwacho' ta'ishtikiyanilme,
 wan kinekiske kimiktiske ma yok yewal kintohtokas.

- ²⁰ 'Asher kipiyas miyak takwaliste;
 in takwaliste yeske kina nitakwalme in reye!'

²¹ 'Neptalí onka kina se masatSiwat,
yewal onka kina tamakawal okintakatilti ininpilwam
kwahkwalme.

²² 'Yosé onka kina se kwawit
kimat miyak taki kaha nalkistik at,
wan nimahmashaltik mowilanal pa tepante.

²³ Masewalme ka inintawitolme, kiminaloya
amo kipiyalo ta'ihniliste kikwalaniloya.

²⁴ Ma yok amo ki'oliniyaya nitawitol Yosé,
mo'isiwiloya ininmahwam.
Tashta ka Dyos nichikawaliste Yakob,
ka ni'itokaliste in takwitawilme borrego', yewal tatsawkili
pa Isra'El!

²⁵ Tashta ka niDyos motats, yewal mishpalewis!
In Dyos niChikawaliste, yewal mishmashti!
Ka tamashtiliste pa in takpakIlwikak!
Ka tamashtiliste pa in we'at wehwekatim!
Ka tamashtiliste ka myak mopilwam wan myak yolikilme!

²⁶ Nitamashtiliste oye we motats
amoyok we kina nitamashtiliste notahwan,
asis itenko in tepeLom amoTamis.
Inik tamashtiliste yeske
ipa nitsontek Yosé,
yewal oye ta'onanal ka ninohniwan!

²⁷ 'BenYamín onka kina se lobo tekwanim
yewal ta'asi pa watsinko kikwa
wan pa tyotak temak tahtahko nita'asil."

²⁸ Moshte yehwante in 12 tanichikolme Isra'El, wan in yewal
nitats kinmili kwah kinmashti ka sesen ka yehwante.

Miki Yakob

²⁹ Kwakin, Yakob kinmashti: "Ashka nimonelo ka nonoh-niwan. Shinishtapachok ka nowichalme yehwante mikik, in koyonke kweba yewal onka pa nikwahmil Eprón in heteteko. ³⁰In kweba onka pa in kwahmil Makpela, amo wEhka onka Mamré pa Kanán. Yewal kiko AbRaham, kinamakilti Eprón in heteteko, kampa kintapacholoskyá nikolinchim kiko in Teshkalkoyonke pa in kwahmil. ³¹Ompa tapachotikat

AbRaham wan nisiwa Sara, ompa tapachotikat Itsak wan Rebe-ka, wan ompa niyok tapachotik Le'a.³² In kwahmil wan kweba tishnamakiltik in heteteko'."

³³ Kwah Yakob otam okinmil inik tahtolme ininpilwam, Isra'El walmotek pa nitapeshte, mihyot, yok omik yok oy omonel inak niwichalme yehwante mikik.

50 ¹Kwakin kinapalo Yosé nitats, wan chokaya ipa nimihki, wan kitenamiki. ²Kwakin Yosé kinmili in tapahtilme walaloskya kishiloloskya pa kishawililoskya ahwiyawiliste pa amo palaniskya nimihki nitats, wan in tapahtilme ki'ahwiyawiltik Isra'El, wan yok kichiwak. ³Panok 40 tonatim, kina kimatił kichiwal ka ta'ahwiyawilme. Inik egiptiyo', kichokililoya Isra'El 70 tonatim.

⁴Panok in tonatim pa kichokililoskya, wan Yosé kinmili in rey pa nikal para'ó:

—Ta annichital kwal, shiyak ka para'ó wan shikilik ika newal ⁵kampa notats, onishchiwalti ka tahtol melawak shikit newal nimiki, nihnek pa tirishtapachos ompa kaha nitahtak newal pa in tal Kanán ompa shinishtapach. Ashka ma nishmakawalti, ma ni niktapach notats, wan hani niwalmokwepas.

⁶In para'ó kinankili:

—Shi shiktapach motats, kina yewal michili pa i'ishpa Dyos.

⁷Yosé oy ompa ikpak pa kitapacholoskya nitats wan kitokak moshte masewalme ka para'ó, in Abwelolme Wehwetsim pa nikal pa mochi tal Egipto. ⁸Moshte yehwante oyak pa nikal Yosé, wan ninohniwan pa nikal nitats. Kinkawak ininpilwam tipichim wan ininyolikilme pa Goshen. ⁹Niyok kintokatiyaloya yawalolme tatilanilme ka kabayo', wan niyok yaloya masewalme pa kabayo', yaloya hyero myak masewalme.

¹⁰Kwah asik kaha kipohpowal trigo ta'itok Atad, kaha waltakis tonat pa analko in atenko Yordán, wan ompa hyero kichokililoya Isra'El. Wan ompa Yosé omo'ahkokil chikome tonatim kampa omik nitats. ¹¹Kwah kitak in kananeyo', inik mochantiloya ompa pa in tal wan kitak in chokiliste katka pa tepet ta'itoka Atad kitok: "Hyero we ininchokiliste egiptiyo', omik se wemonots." Yok okitokayoltik Abel-misrayim^y kaha waltakis tonat pa analko in atenko Yordán.

^y 50:11 Abel-misrayim in kinek kito: ininchokiliste inik egiptiyo'.

¹² Yok kichiwak ininpilwam Yakob kina kinmili: ¹³ Kiwikak pa Kanán wan kitapachok pa in koyonke kweba yewal katka pa in kwahmil Makpela, amo wEhka Mamré, in koyonke kweba yewal katka niyashka Eprón in heteteko yewal AbRaham mokowil, ompa kinekiya kitapacholoskya ka Sara. ¹⁴ Kwah otam kitapachok nitats, omokwep Yosé pa Egipto wan mokwepak ka yewal moshte ninohniwan wan kishki kitokatiyaloya.

Yosé kinmili ninohniwan amo momaptiloskya

¹⁵ Taketstikatkaloya ninohniwan Yosé kampa nitats omikiya kitoloya: “Ten tikchiwaske ta Yosé tishkokoli, wan ta ashka tishkwepilis mochiten amokwal tikchiwilik.” ¹⁶ Kwakin tatake-wak pa kililoskya: “Kwah ayamo’ok mikiyaya motats, otichil: ¹⁷ ‘Shikilik Yosé in nimishtahtani pa tikinihnivilis inintakokoliste monohniwan, in yewal amokwal mishchiwilik.’ Yok otichil motats ashka timishtahtanil shitishihnil totakokoliste, kampa tehwante inintikipanolme niDyos motats.”

Kwah in tanawatilme kinawatiloya Yosé chokaya. ¹⁸ Walak ninohniwan ka Yosé, wan motankwaketsak pa tal niishpa Yosé wan kilik:

—Tehwante tiyeske motikipanolme.

¹⁹ Yosé kinnankili:

—Amo shiomaptik. Newal amo niDyos pa annimishkokoltis? ²⁰ Anmehwante tamatiloya kampa nishchiwililoya ten amokwal, ma yok Dyos okichi in amokwal pa yeskyá se kwal pa kichiwaskya yewal ashka ten titikitikat: Kampa mokishtililoskya yoliliste myak masewalme. ²¹ Yok yewal, amo shiomaptik! Annimishtamakas anmehwante wan anmopilwam.

Wan yok, takets ka yehwante pa amo momaptiloskya.

Miki Yosé

²² Moka mochantiti Yosé pa Egipto. Yewal wan moshte ininpilwam wan nitahwan Yakob, yolti Yosé pa 110 shiwim, ²³ wan okinmit takatik niwichalme ka Eprayím niyok kinmit takatik ininpilwam nikolinche. Makir yewal nikon Manashé, yewal kinapa Yosé.

²⁴ Kwakin pa se tonat, kinmili Yosé ninohniwan: “Newal amo niwehkAwas pa nimikis, ma yok melak Dyos anmishpalewis, wan anmishwikas pa kiyawak pa in tal yok

kinmili pa i'ishpa AbRaham, Itsak wan Yakob.”²⁵ Kwakin Yosé kinmili ininpilwam Isra'El pa kililoskya ni'ishpa Dyos kinmili: “Melak Dyos walas anmishpalewis. Kimani panos in, anmehwante ankiwikaske noweso nika kimani nimikis.”

²⁶Omiik Yosé kwah kipiyaya 110 shiwim. Kwah ki'ahwiyawiltik, ki'ahkokik nimihki kitalik pa se tatsakwal pa Egipto.